

# San Juan

## San Juan Alli Willacuyta

### Gellgangan

Señor Jesucristopa discipulun apostol San Juanmi cay libruta gellgangan. Paywan pagta purirnin llapan rurangancunata ricar parlangancunatapis wiyashga car, cay libruta gellgangan Salvamagnintsic Señor Jesucristo Dios Yayapa Tsurin canganta musyatsimänapag. Tsaynö rasumpacagta musyarmi, Señor Jesucristo imaycata rurangantawan pü canganta musyatsicuya munargan. Tsaynöpam Juanga librunpa gallananchöpis (1:1-18), Señor Jesucristoga Dios Yayapa mana ushacag Palabran car, tucuyläya milagru rurangan señalcunawan quiquin Dios canganta willacur musyatsicun.

Tsaymi San Juanga ima señalcuna canganta willacun, cawatsicug chuya yacu, cada junagpag tantantsic, cushicuypag actsinöcaptin, Señor Jesucristo nänintsicwan rasumpacag cawaynintsic canganta rasumpa firmi criyicur chasquirga, quiquin Dios Yayapita cay patsachöwan janag patsa glorianchöpis alli cawacuya chasquir cushishga cawacunapag. Tsaypagmi quiquin Señor Jesucristo “Nogam cä” nirgan: “Nogam cä” cawatsicug tanta, cay tutapay munduchö actsi, üshacuna yaycuyänan puncu, alläpa allish üsha mitsicug, wañushgapita cawatsicug caway, rasumpacag näniwan caywayniquicuna, rasumcag üvapa yuran. Tsaynöpam chuscun Alli

Willacuy librucuna gellgashgapitapis, Juanlla gellgargan: pipis cay libruta liyirnin Señor Jesucristoga Diospita Shamushga änimangantsic Dios Yayapa japallan Tsuringanta rasumpa firmi criyicur, mana ushacag cawayta tariyänanpag (20:31).

Runacuna cay libruta liyirnin Señor Jesucristollaman rasumpa firmi criyicuyänanta munar, umilde mana aläbacuya munarnin, Juanga quiquinpa shutinta gellgashgatsu, sinöga “cuyay discipulun” nirlla churashga.

*Señor Jesucristo musyatsimantsic, Dios Yayawan jucllaylla cayanganta*

<sup>1</sup> Manarag ni imapis camashga captinmi, Señor Jesucristoga caycarganna. Tsaynöpam imaypitapis Dios Yayawanga jucllayllam cayargan. <sup>2</sup> Tsaymi Payga rasumpa Diosnintsic car gallananpitinan quiquin Dios Yayawan cargan. <sup>3</sup> Paywanmi Dios Yaya llapan imayca ricangantsictapis camargan. Manam cantsu ni imapis, Señor Jesucristowan mana camashgaga. <sup>4</sup> Llapan imayca cawagcunapis paypitaragmi cawayta chasquiyán. Tsaynöllam Dios Yaya imanö canganta musyatsicur, llapan runacunapag imayca juc actsinö caycan. <sup>5</sup> Tsaynö musyatsicuycaptinpis runacuna jutsata rurar cawarmi, Señor Jesucristota chasquiyantsu.

<sup>6</sup> Dios Yayam Juan Bautistata acrargan Señor Jesucristopag willacunapag. <sup>7</sup> Tsaymi payga imayca juc testigunö willacurgan Señor Jesucristoman rasumpa criyicurnin, runacuna chasquir Payllamanna criyicuyänanpag. <sup>8</sup> Juan

Bautistaga manam Dios Yaya cachamungan actsinö Salvacug Jesucristotsu, sinöga Señor Jesucristo imayca juc actsinö shamunanpag willacug testigunllam cargan.<sup>9</sup> Señor Jesucristom cay patsaman imayca juc actsinö shamurgan, imaypis llapan runacunata Dios Yaya imanö canganta musyatsinanpag.

<sup>10</sup> Señor Jesucristo llapan imaycacunata camashga caycaptinpis, runacunaga manam pii cangantapis tantiyayantsu cay patsachö caycaptin. <sup>11</sup> Tsaymi cay patsachö runama-jincunaman shamuptinpis chasquiyargantsu. <sup>12</sup> Pero waquincagmi siña Señor Jesucristo salvacugnintsic canganta criyir chasquiyargan. Tsaynö criyicur chasquigcunataga, quiquin Dios Yayam “wamräcunanam cayanqui” nin. <sup>13</sup> Manam mamancunapita yuriyangapitatsu ni taytancunapa munaynincunapitatsu, Dios Yayapa wamrancuna cayan, sinöga Señor Jesucristota cäsurnin chasquiyanganpitam.

<sup>14</sup> Señor Jesucristoga runaman ticrasquirmi, nogantsicwan rasumpacag allicunallata rurar cay patsachö cawargan. Paywan purirmi nogacuna ricäyargä poderöso cayninwan alläpa cuyamangantsicta. Dios Yayapa japallan Tsurin canganta ricarmi musyayargä, rasumpa Dios Yaya imanö cangantapis. <sup>15</sup> Señor Jesucristopagmi Juan Bautista testigunö gayaycachar willacurgan: “Cay shamug Salvadorpagmi noga parlargä, ‘Nogapita mas poderösom. Payga manarag yuriptimi, unaypitana cargan.’ ”

<sup>16</sup> Tsaynö alläpa cuyamarnintsicmi, Señor Jesu-

cristoga llapan imaycachöpis yanapamashcantsic. Tsaymi llapan bendiciunninta yapay yapay chasquishcantsic. <sup>17</sup> Naupatam quiquin Dios Yaya mandamientun leyta unay Moisésta entregargan, llapan runacunata willacuptin cäscuyänanpag. Pero Señor Jesucristoga alläpa cuyamarnintsicmi tantiyatsimantsic, Dios Yayapa mushog salvacug rasumpacag willacuyninta. <sup>18</sup> Manam ni pipis Dios Yayataga ricashgatsu. Paytaga ricashga japallan Tsurin Dios carmi, Dios Yayapa lädunchö car. Paypita shamurmi, Dios Yaya imanö cangantapis rasumpa musyatsimantsic.

*Juan Bautista Señor Jesucristopag willacun  
(Mateo 3:11-12; Marcos 1:7-8; Lucas 3:15-17)*

<sup>19</sup> Jerusalén templuchö autoridäcumam sacerdöticunatawan levita casta runacunata mandayargan, Juan pii canganta tapuyänanpag.

<sup>20</sup> Tsaynam Juanga rasuncagllata willargan: “Manam nogaga Diospita Shamushga Salvador Cristotsu cä.”

<sup>21</sup> Tsaypitanam yapay tapuyargan: “Tsaypunga ¿pitán canqui? ¿Dios Yayapa unay profétan Eliáschu?”

Juannam nirgan: “Manam tsaypistsu cä.”

Paycunanam yapay niyargan: “Tsaypunga ¿Shamunapagcag profétacu canqui?”

Juannam contestargan: “Manam.”

<sup>22</sup> Paycunanam niyargan: “Tsaypunga ¿pitán canqui? Cachayämagnicunaman cutirnin willayänäpag, quiquipi willayämay pii cangayquitapis.”

<sup>23</sup> Juan Bautistanam unay proféta Isaías gellgangannö contestargan: “Nogaga willacug

profëtallam cä. Tsaymi tsunyagcunachö runacunata willacuyca, imayca mana alli nänita allitsagnö jutsancunata dëjayänanpag. Tsaynö willacuptümi listuna cayanga, Salvadorintsic shamugta rasumpa chasquiyänanpag.”<sup>23</sup>

<sup>24</sup> Fariseocuna Juan Bautistata tapuyänanpag mandayangan runacunam, <sup>25</sup> niyargan: “Si Dios Yaya cachamungan Salvador ni Elías ni unay Moisés gellgangannö shamunanpagcag profëta mana caycarga, ¿ima poderniquiwantan runacunata bautizanqui?”

<sup>26</sup> Juannam contestargan: “Nogaga yacullawanmi bautizä, pero gamcunawanmi caycan juc mana regeyangayqui Runa. <sup>27</sup> Tsaymi Pay alläpa poderöso captin, nogaga llangenpa watunta umpuycur pascanällapagpis servïtsu.”

<sup>28</sup> Tsay llapantam Juan Bautistata tapuyargan, Jordan mayupa wac tsimpan Betania marcachö runacunata bautizaycaptin.

### *Juan Bautista Señor Jesucristo shamuycagta rican*

<sup>29</sup> Tsay waräninnam Juan Bautista Señor Jesucristo shamuycagta ricasquir nirgan: “¡Ricäyay! Dios Yayapa mallwa Cordérunnömi Salvamagnintsic shamuycan. Paymi wañunga llapan runacuna jutsancunapita perdonashga cayänanpag. <sup>30</sup> Paypagmi willacurgä, ‘Payga manarag yuriptü unaypitana cargan. Tsaymi nogapitaga mas poderoso.’ <sup>31</sup> Nogaga manam musyargätsu Pay Dios Yaya cachamungan canganta. Tsaynö caycaptinpis nogaga

---

<sup>23</sup> **1:23** Is 40:3.

yacullawanmi runacunata bautizargö,  
Salvadornintsic chämunganta musyar Israel  
runacunapis chasquiyänanpag.”

<sup>32</sup> Tsaypitanam Juan nirgan: “Cielupita urämur Espíritu Santo imayca palomanö Payman ratagtam ricashcä. <sup>33</sup> Tsayta ricarllaga manam musyämantsu cargan, Dios Yaya cachamunanpag Acrashga Runa canganta. Sinöga unaynam musyargä, yacuwan bautizanäpag cachamagni Dios Yaya nimanganta: ‘Juc runapa jananman Espíritu Santo ratagta ricarmi musyanqui, Espíritu Santowan bautizacug runa canganta’ nir. <sup>34</sup> Tsay nimangannöllam payman Espíritu Santo ratagta ricargö. Tsaymi gamcunata willayag Dios YAYAPA rasumpa Tsurin canganta.”

### *Señor Jesucristopa puntacag discipuluncuna*

<sup>35</sup> Tsay waräninnam yapay Jordan mayu cuchunchö Juan Bautista ishcag discipulunwan caycäyargan. <sup>36</sup> Tsaypa Señor Jesucristo päsaycagta Juan Bautista ricasquirnam nirgan: “¡Ricäyay! Paymi Dios Yaya cachamungan mallwa Cordérunnö Salvamagnintsic.”

<sup>37</sup> Tsaynö niptinnam, Juan Bautistatapa ishcan discipuluncuna jagesquir Señor Jesucristopa gepanta gatirnin aywayargan. <sup>38</sup> Señor Jesucristonam gepanman tumaycur tsay runacunata tapurgan: “¿Imatatan ashiyanqui?”

Tsaynö niptinnam niyargan: “Maestru, ¿maychötan patsacushcanqui?”

<sup>39</sup> Señor Jesucristonam nirgan: “Shayämuy ricätsiyänagpag.”

Tsaynö nirmi, maychö patsacunganta ricätsiptin, las cuatro de la tardipita Señor Jesucristowan quëdayargan. <sup>40</sup> Juan Bautistata cäsurnin gatiragnincuna aywagcunapam juccagpa shutin cargan Andrés. Payga Simón Pedropo waugenmi cargan.

<sup>41</sup> Tsaymi Andrésga jina öra waugen Simónta ashignin aywargan. Tincusquirnam nirgan: “¡No-gacunam Dios Yaya cachamungan Salvamagnintsic Cristowan tincuyargö!”

<sup>42</sup> Tsaypitanam Andrés waugenta pushargan Señor Jesucristocagpa. Chäriyaptinnam Simónta ricaycur Señor Jesucristo nirgan: “Gamga Jonáspa tsurin Simónmi canqui. Cananpitam shutiqui ‘Cefas’ canga.” (“Cefas” ninanga Pedro ninanmi cargan.)

### *Felipetawan Natanaelta Señor Jesucristo acran discípuluncuna cayänanpag*

<sup>43</sup> Tsay waräninnam Galilea provinciaman Señor Jesucristo aywananpag caycar, Felipewan tincusquirgan. Felipetanam “Acu, aywashun discípulu canayquipag” nirgan.

<sup>44</sup> Felipega Betsaida marcapitam cargan. Tsay marcallapitam Andréswan Pedropis cayargan. <sup>45</sup> Señor Jesucristo tsaynö niptinnam Felipe Natanaelta ashignin aywargan. Tincusquirnam nirgan: “¡Dios Yaya cachamungan Salvadorintsicwanmi tincuyargö! Payga Nazaret marcapita Josépa tsurin Jesúsmi. Paypagmi Dios Yayapa unay Moiséspis leyninchö gellgargan y waquincag profétacunapis, cay

patsaman shamunanpag canganta gellgayargan.  
¡Tsaymi cananga chämushgana caycan!”

**46** Tsaynö niptinnam Natanael nirgan: “Nazaret marcapitaga ¡Acäsu pillapis alli runaga yargon-mancu!”

Felipenam nirgan: “Masqui ¡acu aywashun regenayquipag!”

**47** Tsaymi Natanael chaycagta ricaycur Señor Jesucristo nirgan: “Cayrunam siga rasumpa Israel runacunanö mana mantsacur imatapis parlan. Payga manam ni imaypis llullacuntsu.”

**48** Tsaynö niptinnam Natanael tapurgan: “Señor, ¿imanöpatan nogata regemanqui?”

Señor Jesucristonam nirgan: “Nogaga musyämi imanö shongoyqui canganta. Tsaymi Felipe manarag gayashuptiqui ricargog, ïgos jachapa chaquinchö jamaycagta.”

**49** Tsaynö niptinnam Natanael declarargan: “Maestru, gamga Diospa Tsurinmi rasumpa canqui, Israel runacuna shuyäyangä reynicuna.”

**50** Señor Jesucristonam nirgan: “Ígos jacha chaquinchömi ricargog niptillagcu, ¿gamga criyinqui Diospa Tsurin cangäta? Cananpitaga mana ni imay ricangayqui atsca milagrucunataran ricätsiyäshayqui.” **51** Señor Jesucristonam yapay nirgan: “Rasuncagtam niyag: ¿Yarpäyanquicu Jacob sueñuyninchö cielupita angelcuna urämuña y witsaypa cutigta ricarnin musyanganta, Dios Yaya paywan caycanganta? Tsaynöllam gamcunapis cielu quicharaycagchö ricäyanqui, Dios Yaya Tsurin maytsicag angelnincunawan caycagta.”

## 2

*Juc casamientuchö Señor Jesucristo yacuta  
vïnoman tictatsin*

<sup>1</sup> Tsaypita quimsa junagtanam Galilea provinciachö Cana niyangan marcachö juc runa casarargan. Tsaychömi Señor Jesucristopa mamanpis caycargan. <sup>2</sup> Tsay casamientumanmi Señor Jesucristotapis discipuluncunatawan invitashga cayargan. <sup>3</sup> Manarag fiesta ushacaptinmi vïnoncuna ushacasquirgan. Tsaymi Señor Jesucristoman manan witiycur nirgan: “Vinoncunam ushacashga.”

<sup>4</sup> Señor Jesucristonam nirgan: “Mamay, ¿imanirtan tsayta nimanqui? Manaragmi örä chämunragtsu milagrucunata ruranäpag.”

<sup>5</sup> Señor Jesucristopa mamannam tsay fiestachö yanapacugcunata nirgan: “Mandayäshungayquita rurayanqui.”

<sup>6</sup> Tsaychömi yacu wiñäcuyänan sogta jatusag aswanacuna cayargan. Tsay aswanacunamanmi yaycug, cada ünuman chuscu lätapita asta sogta lätayag. Tsay yacuwanmi Israel runacuna maquincunata mayllacusquir, costumbrincunamannö Dios Yayata adorayag.

<sup>7</sup> Tsaypitanam Señor Jesucristo tsaychö yanapacugcunata nirgan: “Cay aswanacunaman yacuta juntat wiñäyay.” Yanapacugcunananam aswana juntata wiñäyargan.

<sup>8</sup> Tsaynö wiñasquiyaptinnam, yanapacugcunata Señor Jesucristo nirgan: “Cananga ichicta chagarcur quiquin mayordömu yawanapag apapäyay.”

Señor Jesucristo ningannömi yanapacugcuna chagarcur apapäyargan. <sup>9</sup> Tsay mayordömunam

alläpa shumag mishquig vïnota yawarcurgan. Pero manam musyargantsu ni maypita apayämungantapis. Yacuta gorir yanapacugcunallam musyayargan Señor Jesucristo yacuta vïnoman tictratsishga canganta. Tsay mayordömunam noviota gayasquir nirgan: <sup>10</sup> “Imayca fiestachöpis puntataga allicag vïnotaragmi servicuyan. Tsaywan machasquiyaptinragmi gamyacag vïnotaga garacuntsic. Pero gamga, fiesta ushacänanpagrag mas allicag vïnotaga pacarätsishcanqui.”

<sup>11</sup> Tsay Galilea provincia Cana niyangan marcachö yacuta vïnoman tictratsirmi, puntacag milagruta rurarnin Señor Jesucristo poderoso cayninta musyatsicurgan. Tsaynö musyatsicuptinmi, discipuluncuna Dios Yaya cachamungan Cristo canganta criyicuyargan.

<sup>12</sup> Tsaypitam Señor Jesucristo mamanwan waugencuna y discipuluncuna Capernaum marcaman aywacuyargan. Tsay marcachöga juc ishcay junagllam pärayargan.

*Señor Jesucristo gargon templupa patiunchö ranticugcunata*

*(Mateo 21:12-13; Marcos 11:15-18; Lucas 19:45-46)*

<sup>13</sup> Israel runacunapa Pascua fiestancuna chaycämuptinnam, Jerusalén marcaman Señor Jesucristo aywargan. <sup>14</sup> Tsayman chaycurmi templupa patiunchö atscag runacuna mallwa törrucunatawan üshacunata y palomacunata ranticuycäyagta tarirgan. Tsaynöllam gellayta cambiacugcunapis tsaychö caycäyargan. <sup>15</sup> Tsay templupa patiunchö

llapan imaycata ranticugcunata tarisquirmi, chicötiwan astaraycar llapan wä tacunatawan runacunatapis gargamurgan. Tsaynöllam gellayta cambiacugcunapa mësancunatapis wicacur gellaynincunatapis jancat witsir ushasquirgan.

**16** Paloma ranticugcunatanam piñapar nirgan: “¡Caycunata wagtaman sas jipiyay! Cay templuga Taytäman mañacuna wajim. Pero gamcunaga juc mercädomanmi tigratsiyashcanqui.”

**17** Tsaynö Señor Jesucristo ruranganta ricaycurmi, discipuluncuna yarpasquiyargan, Diospa Palabanchö gellgayanganta: “Wañutsiyämaptinpis adorayäshunayqui wajiquitam chiquicurnin respetatsishag.”<sup>17</sup>

**18** Israel runacunapa templuchö autoridäcunanam niyargan: “¿Ima puedig cayníquiwantan cay ranticugcunata gargonqui? Mä, ima milagrullatapis ruramuy rasumpa Dios Yaya cachamushungayquita musyayänäpag.”

**19** Señor Jesucristonam contestargan: “Cay templuta juchutsir ushasquiyaptiquim, quimsa junagllata sharcatsimushag.”

**20** Tsaymi Israel runacunapa templuchö autoridänincuna niyargan: “¡Imanötan cayga! Cay templutagam chuscu chunca sogta (46) watachörág shärtsiyashga. ¿Tsaytsurag gamga quimsa junagllachö sharcatsimunquiman?”

**21** Tsaynö Señor Jesucristo parlarga manam templuta yapay shäratsinanpagtsu parlargan, sinöga wañunganpita quimsa junagllata cuerpu cawamunanpagmi. Tsaynö parlangantaga

---

<sup>17</sup> **2:17** Sal 69:9.

manam ni ichicllatapis entendiyargantsu autoridäcunawan discipuluncunapis. <sup>22</sup> Wañunganpita cawascamuptinragmi, discipuluncunapis Señor Jesucristo quiquinpag parlanganta yarpasquiyargan. Tsaynö musyasquirragmi Dios Yayapa Palabran gellgayanganwan Señor Jesucristo parlangan rasumpacag cangantapis criiyiyargan.

<sup>23</sup> Jerusalénchö Señor Jesucristo tucuyläya milagrucunata ruragta ricarmi, atscag runacuna Dios Yaya rasumpa cachamungan Cristo canganta criiyiyargan. Tsay milagrucunataga rurargan, Pascua fiesta caycaptinmi. <sup>24</sup> Pero Señor Jesucristoga runacuna janan shongolla cayanganta musyarmi, paycunata confiacurgantsu. <sup>25</sup> Manarag ni pí willaptinmi, Señor Jesucristoga runacuna shongoncunachö mana allicunata yarpäyanganta musyarganna.

### 3

#### *Señor Jesucristo Nicodemowan parlayan*

<sup>1</sup> Juc fariseo Nicodemo shutiyog runam, Israel runacunapa autoridänincunawan mandacug cargan. <sup>2</sup> Paymi Señor Jesucristoman pagasllapa aywaycur nirgan: “Maestru, musyayämi yachatsiyämänayquipag Dios Yaya cachamushungayquita. Dios Yaya mana yanapaptinga manam ni pipis gamnöga milagrucunata ruranmantsu.”

<sup>3</sup> Señor Jesucristonam nirgan: “Rasuncagtam nig: Pipis mamanpita yuringannö mana yapay

yurirga, manam Dios Yayapa Mandacuy Reynonmanga yaycuyangatsu.”

**4** Nicodemonam nirgan: “Pero yashganaga ¿imanöttagshi yapayga yurinman? ¡Acäsu pipis mamampa pachanman cutiyta puedinmancu yapay yurinanpag!”

**5** Señor Jesucristonam contestargan: “Rasuncagtam nig: Manam mamayquipa pachanman cutinayquipagtsu nicag, sinöga Espíritu Santopa poderninwan imayca yapay yurignö yacuwan bautizacunanpagmi. Tsaynö mana yapay yurirga manam ni imaypis Dios Yayapa Mandacuy Reynonmanga yaycuyangatsu.

**6** Pipis cay patsachö mamanpita yurishga runaga, cay patsachöcagcunallatam ruran Dios Yayapa mana wamran car. Pero Espíritu Santopa poderniwan yurigcagmi siña, Dios Yayapa rasumpa wamranna car, Espíritu Santo mandangallanta ruran. **7** ¿Caynö niycuptigcu mantsacanqui? Imanö captinpis yapayragmi yuriyänan salvacuyta munagcagga.

**8** “Wayra gayarar wayrämuña wiyarpis manam ricäyanquitsu maypita shamunganta ni maypa aywangantapis. Tsaynöllam ricäyantsu, Espíritu Santo poderöso cayninwan juc mushog cawayman pitapis tictratsiptin.”

**9** Tsaynö Señor Jesucristo niptinmi Nicodemo yapay tapurgan: “Señor, manam musyallätsu. ¿Imanörag tsaynöga yapay yuriyanga?”

**10** Señor Jesucristonam nirgan: “Israel runacunapa yachatsicugnín caycarpis ¿manacu cay ningacunata tantiyar entendinqui?

**11** Rasumpa musyangätawan cieluchö ricangätam,

imayca juc testigunö willacur parlä. Pero tsaynö willayangagta wiyaycarpis, gamcunaga manam criiyämanquitsu. <sup>12</sup> Si cay patsachö caycagcunapag willayangagta mana criiyicarga, ¿imanörag cieluchö caycagcunapag willayaptigpis criiyämanquiman?

<sup>13</sup> “Manam ni pipis cielman aywasquir cutimushgatsu imanö cangantapis willayäshunayquipag. Mas bienmi Dios Yaya cachamuptin cay patsaman willacunanpag Shamushga Runalla, cielutaga rasumpa regen.

<sup>14</sup> Unay Moisés tsunya jircachö broncipita rurashga culebrata tucrupa puntanman watarcur jawingannöllam, Dios Yaya cachamungan runatapis cruzman clävaycur jawiyanga.

<sup>15</sup> Tsaynö wañutsiyangan runaman criyicugcunaga llapanpis mana ushacag cawaytam tariyanga. Tsaynöllam Espíritu Santopa poderninwan yurishga carga cieluchö imayyagpis shumag cawacuyanga.

### *Llapan runacunata Dios Yayaga cuyan*

<sup>16</sup> “Dios Yaya llapan runacunata alläpa cuyarmi, cay patsaman japallan cuyay Tsurinta cachamurgan. Tsaymi Payman llapan criyicugcunaga, infiernuman manana aywayanganatsu, sinöga mana ushacag cawaytam tariyanga, cieluchö imayyagpis shumag cawacuyänanpag. <sup>17</sup> Manam Dios Yayaga runacunata infiernuman garpunanpagtsu japallan cuyay Tsurinta cachamurgan. Sinöga llapan jutsasapa runacunapa jutsancunata perdonar salvananpagmi.

<sup>18</sup> “Tsaymi pipis Dios Yayapa japallan Tsurinman rasumpa criyicurga, condenacar infiernuman aywangatsu. Pero Dios Yayapa japallan Tsurinman mana criyicugcunam sīga, condenacarnin infiernuchö imayyagpis sufrinanpa aywanga. <sup>19</sup> Rasumpa cangantam niyag: Imayca mana alli ruraycunallachö cawayta munarmi, Dios Yayapa Tsurin cay patsaman imayca actsinö salvamänapag shamuptinpis chasquiyargantsu. Tsaynö mana allicunata rurar tutapaychönö cawayanganpitam condenashga cayanga. <sup>20</sup> Tsaymi llutan mana alli rurag runacunaga Señor Jesucristo imayca actsinö car, llapan jutsancunata musyacätsinanta mantsacurnin chiquiyan. <sup>21</sup> Pero Dios Yayapa Tsurinta chasquigcagmi sīga, alli ruraynincuna musyacänanpag Dios Yaya yanapaptin allish cawacuyan.”

*Juan Bautista Señor Jesucristopag yapay willacun*

<sup>22</sup> Tsaypitanam Judea provinciaman Señor Jesucristoga discipuluncunawan aywargan. Tsaychömi discipuluncunawan runacunata bautizarnin unayrag cayargan. <sup>23</sup> Juan Bautistanam Enon marcachö runacunata bautizaycargan. Enonga Salim marcpa amänonllam cargan. Tsaychö atsca yacu captinmi, maytsicag runacuna segidu shayämurgan Juan Bautista bautizananpag. <sup>24</sup> Autoridäcuna Juan Bautistata carcelman manarag gaycatsiyaptinmi, tsaychö runacunata bautizaycargan.

<sup>25</sup> Tsaychömi Juan Bautistapa discipuluncuna juc Israel runawan discutinacuyargan, “Imanötan

mas alli canman yacuwan bautizacunapag” nir. <sup>26</sup> Tsaymi Juan Bautistata discipuluncuna tapuyargan: “Maestru, Jordan mayu wac tsimpanchö runacunata bautizaycaptiquim chämurgan juc runa. Paypagmi niyämargayqui, ‘Cay runaga Dios Yayapa Tsurin Salvacugmi’ nir. Cananga Pay runacunata bautizaptinmi, llapan runacuna Payman aywar bautizacuycäyan. Tsaymi nogantsicmanga manana shayämunnatsu.”

<sup>27</sup> Tsaynö willayaptinnam Juan Bautista nirgan: “Dios Yaya cielupita llapan poderninta entregashga captinmi, paymanga tsaynö runacuna aywayan. <sup>28</sup> Gamicunaga musyayanquim, rasumpacagta niyangagta: ‘Nogaga manam quiquipagtsu Salvacugmi cä’ nirgä, sinöga Dios Yaya cachamaptinmi puntanta shamurnin, Salvador shamananpag willacurgä. <sup>29</sup> Musyayangayquinöpis juc noviowan novia casaraptin padriünun alläpa cusicungannömi, nogapis cananga llapan shongöwan alläpa cusicü Señor Jesucristo yachatsicuptin atscag runacuna aywayanganta wiyar. <sup>30</sup> Ama llaquicuyaytsu nogaman runacuna manana shayämuptin. Payga Dios Yaya munanganno poderösom. Tsaymi nogaga ni imapgipis välenatsu.

<sup>31</sup> “Cielupita Shamushga salvacug Runaga rasumpam llapan cay patsachögacagcunapitapis mas poderoso. Nogam siga cay patsallachö yurishga car, waquincag runacunanölla parlar paymanga ni imanöpa iwalätsu. <sup>32</sup> Dios Yaya cachamungan Salvador mi willamantsic cieluchö ricangantawan wiyanganta. Pero tsaynö willacuptinpis waquincag runacunaga

mana cäsurmi criyyantsu. <sup>33</sup> Waquinmi siga rasumpa criyicurnin tantiyayan, Señor Jesucristo Dios Yayapag rasumpacagllata willacunganta. <sup>34</sup> Tsaycunataga Diospita shamushga carmi, Dios Yayapa Palabranta willacuycan Espíritu Santopa poderninwan. Paynöga manam ni pipis Espíritu Santopa poderninta catsintsu. <sup>35</sup> Quiquin Dios Yayam japallan Tsurinta alläpa cuyarnin, llapan imaycatawan poderninta entregashga paynölla poderöso cananpag. <sup>36</sup> Pipis Dios Yayapa Tsurinta chasquir Payman criyicurga cay patsachöwan janag patsachöpis alläpa cushishgam cawacunga. Pero mana chasquirnin mana criyicugcagmi siga, tsay alli cawaytaga ni imaypis taringatsu. Payman mana criyicuyanganpitam Dios Yaya rabiayninwan castigarnin infiernum condenanga imayyagpis sufrirnin ñacayänanpag.”

## 4

### *Señor Jesucristo Samaria Marcapita warmiwan parlan*

- 1 Tsaypitanam fariseocuna musyasquiyargan Juan Bautistaman aywayanganpitapis, mas atscag runacuna Señor Jesucristopa gatiragninman ticrar bautizacug aywaycäyanganta.
- 2 Pero rasumpacagtaga manam quiquin Señor Jesucristotsu bautizargan, sinöga discipuluncunallam runacunata bautizayargan.
- 3 Fariseocuna tsaynö parlayanganta Señor Jesucristo musyasquirnam, Judeapita yargosquir Galilea provinciaman discipuluncunawan cuticuyargan.

<sup>4</sup> Judeapita Galileaman aywayänanpagga Samaria provinciaparagmi päsayänan cargan.

<sup>5</sup> Aywaycarnam Samariachö Sicar niyangan marcaman chäyargan. Tsay marcaga unay Jacob tsurin Joséta garangan chacrapa amänonchömi cargan. <sup>6</sup> Tsay chacrachömi unayna Jacob juc pösuta yacupag uchcutsishga cargan. Tsaymi Señor Jesucristo pullan junag jancat pishipashga chaycurnin, tsay pösu cuchunman jamaycurgan.

<sup>7</sup> Tsaychö Señor Jesucristo jamaycaptinmi, samaritäna warmi yacu apag chargan. Tsay warmitanam Señor Jesucristo mañacurgan: “Yacuyquita garaycamay upyanäpag.” <sup>8</sup> Tsay örágam discípuluncunaga micuyänanpag rantipacug marcapa aywashga cayargan.

<sup>9</sup> Tsay warminam nirgan: “Jidiu runa caycarga ¿imanirtan yacuta mañacamanqui samaritäna cangäta musyaycar? Musyantsicmi judiucunawan Samaritänocunaga ni imaypis mana parlapänacungantsicta.”

<sup>10</sup> Tsaynö niptinnam Señor Jesucristo nirgan: “Dios Yayapita chasquinayquipagcagtawan piwan parlaycangayquitapis musyarga, gammi yacutaga mañacamanquiman. Nogaga garaycugmanmi cawatsicug chuya mana ushacag yacuta.”

<sup>11</sup> Samaritänanam nirgan: “Señor, chuya yacuga alläpa rurichömi. ¿Tsay chuya cawatsicug yacuta garamänayquipagga, imawantan jorgamunquiman ni imallapis chaganayquipag mana caycaptina? <sup>12</sup> Unay awiluntsic Jacobmi cay pösuta uchcutsirgan. Cay pösullapitam tsurincunawan aylluncuna, wätancuna y

quiquinpis upyayargan. Paypis cay yacullata upushga caycaptina, ¿Acäsu gamga paypita mas importanti poderösoci canqui?”

**13** Señor Jesucristonam nirgan: “Pipis cay yacullata upyagcagga yapaypis yacunasquingallam.

**14** Pero pipis noga garangä yacuta upyagcagmi sığa, ni imaypis mana yacunanganatsu. Tsay cawatsicug yacuga shongonllachömi imaypis canga mana tsaquig pucyunö Dios Yayawan imayyagpis alli päsacuychö cawacuyänanpag.”

**15** Tsay warminam nirgan: “Señor, manana ni imaypis yacunänäpag ni cay pösUMANPIS manana yacu apag cutinyämünäpag tsay chuya yacuyquita garaycallämay.”

**16** Señor Jesucristonam nirgan: “Canan aywar gojayquita gayasquir cayman ishcayqui shayämuy.”

**17** Tsaynö niptinmi warmiga nirgan: “Señor, manam gojä cantsu.”

Niycuptinnam Señor Jesucristo nirgan: “Rasumpacagllatam nicämanqui. **18** Tsaypunga imanirtan pitsga gojayog cashcanqui. Y tsay canan täcungayqui runaga rasumpa manam gojayquitsu. Tsay nimangayquiga rasumpacagmi.”

**19** Tsaynö niptinnam warmiga nirgan: “Señor, gamga Dios Yayapita shamushga profëtam illu callanqui. **20** Unaycag awilücunaga tagay jircaman aywarmi Dios Yayata adorayag. Pero gamcunam sığa, ‘Jerusalénllachömi Dios Yayataga adoranantsic’ niyanqui. ¿Maychötan allipaga Dios Yayata adorashwan?”

<sup>21</sup> Señor Jesucristonam nirgan: “Criyimay warmi, cananga tiempu chämushganam maychöpis Dios Yayata adoranapag, manam tagay jircaman ni Jerusalénman aywarllatsu adorashun. <sup>22</sup> Gamicunaga manam musyayanquitsu pita adorayänayquipagcagtapis. Pero nogacunam sığa rasumpa regeyangä Dios Yayata adorayä. Tsaytaga musyayä israelcunapita Salvadorta Dios Yaya acrashga captinmi. <sup>23</sup> Israel runacunawan mana israelcagcunapis Espíritu Santo yanapaptin llapan shongonwan Dios Yayata adorayänan tiempu chämushganam. Tsaynö llapan voluntänintsicwan adoranatam Dios Yayaga munan. <sup>24</sup> Dios Yaya Espíritu captinmi, runacuna mana ricaycarpis Espíritu Santo yanapaptinmi, llapan voluntänincunawan adorayänan.”

<sup>25</sup> Warminam nirgan: “Nogaga musyämi Dios Yaya cachamungan Cristo cay patsaman shamanpagcagta. Tsaymi Pay chaycamurrag llapanta willamarnintsic musyat simäshun.”

<sup>26</sup> Señor Jesucristonam contestargan: “Tsay shamugpagcag Cristoga nogam cä, canan öra gamwan parlaycag.”

### *Señor Jesucristopa discipuluncuna cutiyangan*

<sup>27</sup> Tsaynö parlaycäyaptinnam discipuluncuna rantipacug aywayanganpita chäriyargan. Tsay Samaria warmiwan Señor Jesucristo parlaycagta tarisquirmi yarpachacuyargan: “¿Imata munartan o imanirrag tagay warmiwan parlaycan?” Pero manam ni mayganpis tapuyargantsu ni imata parlayangantapis.

<sup>28</sup> Tsay warminam puyñunta jagesquir, runacunata willag cörrilla marcaman aywargan.

<sup>29</sup> “¡Shayämuy! Llapayqui ricäyänayquipag juc runam cawaynichö llapan imayca rurangätapis nimashga. ¿Payga manatsurag shamugpagcag Cristo?” <sup>30</sup> Warmi tsaynö willacuptinnam atscag runacuna Señor Jesucristoman aywayargan.

<sup>31</sup> Tsayyagnam Señor Jesucristota discipuluncuna niyargan: “Señor, micurcuyrag ari cay apayämungäta.”

<sup>32</sup> Pero Señor Jesucristonam nirgan: “Nogapa micuyniga jucmi. Tsaytaga manam gamcunaga regeyanquiragtsu.” <sup>33</sup> Tsaynö niptinnam, discipuluncuna quiquinama pura ninacuyargan: “¿Pirag micunan apamushga? Tsaychari micuya munannatsu.”

<sup>34</sup> Señor Jesucristonam nirgan: “Nogapa micuyniga cachamagni Dios Yaya mandamanganta cumplingämi. <sup>35</sup> Runacunanam niyan: ‘Usya tiempu ciega gallananpag chuscu quillaragmi faltan’ nir. Pero nogam niyag: ¡Ricäyay tagay runacuna muruyanganta coséchayangannömi listuna caycayan Dios Yayapa Palabranta chasquiyänanpag! Tsaynö chasquirnin wiyyacur nogaman mas firmi criyicugcunaga mana ushacag cawaytam tariyanga. ¡Imayca allish coséchata gorignömi goricayämunga! <sup>36</sup> Willacungäcunata chasquirga cay patsachöwan gloriachöpis cushishgam imayyagpis cawacuyanga. Tsaynö Dios Yayapag willacurmi, imayca murucug runawan ciegäsegnin alli cosécha yargoptin cushicuyangannö alläpa cushishga cayanga.

<sup>37</sup> Tsaymi cayga rasumpacag: Juc chacrayog runa mincaycunawan murungantam, juc mincaycunawanna cosechan. <sup>38</sup> Tsaynömi mana murushga caycäyaptiqui, cananga gamcunatapis cachayag willacuyaptiqui nogaman mas firmi criyicayämunanpag. Gamcunaga mana arurnin murushga caycarmi, juccuna alläpa sufrirnin murucuyanganta cushishga cosechayanqui.”

*Samaria marcapita atscag runacuna Señor Jesucristoman criyicuyan*

<sup>39</sup> Tsay marcachömi atscag runacuna criyyargan, Señor Jesucristoga Dios Yaya cachamungan Cristo canganta tsay samaritäna warmi. “Cawaynichö llapan imayca rurangätam shimpimashga” nir, willacuptin. <sup>40</sup> Tsaynam Samaria runacuna Señor Jesucristo caycanganman chaycur rugayargan paycunawan quëdacunapag. Tsaynö rugayaptinmi, ishcay junag paycunawan quëdargan. <sup>41</sup> Tsaychö Señor Jesucristo yachatsicuptinmi mas atscag runacuna Dios Yayapa Tsurin Cristo canganta criyyargan.

<sup>42</sup> Tsaynö criyicurnam tsay warmita runacuna niyargan: “Manam gam niyämaptiquillatsu Señor Jesucristoman criyicuyä. Cananga yachatsicunganta quiquicuna wiyarmi musyayä llapan runacunata salvananpag Dios Yaya cachamunganta.”

*Señor Jesucristo juc reypa mandacug autoridäninpa tsurinta cuticätsin  
(Mateo 8:5-13; Lucas 7:1-10)*

<sup>43</sup> Señor Jesucristo Samariachö ishcay junag goyasquernam, Galilea provinciaman aywargan.

<sup>44</sup> Quiquin Señor Jesucristo ningannöllam, Dios

Yayapa profétantapis marcanchöga respATAR cäsuyantsu.<sup>45</sup> Galileaman chaycuptinmi atscag runacuna alläpa cushishga chasquiyargan, Jerusalénchö Pascua fiestaman aywangancho imayca milagrucuna ruranganta ricashga car.

<sup>46</sup> Tsaypitanam Señor Jesucristo Galileachö Cana niyangan marcaman cutirgan. Tsay puntacag milagruta rurarnin, yacuta vänoman tictratsingan Cana marcachömi, juc reypa mandacug autoridaninta regergan. Tsay mandacug autoridäpa wamrannam Capernaum marcachö antsa geshyaycargan.<sup>47</sup> Señor Jesucristo Judeapita Galileaman chämungata musyasquirmi, tsay autoridäga cörrilla aywargan tsurin alläpa antsa geshyaptin. Señor Jesucristoman chaycurnam rugargan: “Señor, wamrallä wañuyccannam. Aywayculläshun cuticaycatsilläpamänayquipag.”

<sup>48</sup> Señor Jesucristonam nirgan: “Gamcunaga Dios Yayapita shamungäta manam criyyämanquimantsu, llapan imayca milagrucunatawan cusicupag señalcuna rurangäta mana ricätsiyaptigga.”

<sup>49</sup> Tsay autoridänam rugayargan: “Señor, wamrallä manarag wañnunganyag sas aywayculläshun.”

<sup>50</sup> Tsaynö niptinmi, Señor Jesucristo nirgan: “Wajiquipa cuticuy; wamrayquiga cuticashganam.”

Señor Jesucristo tsaynö ninganta criyirmi, tsay autoridä wajinpa cuticurgan.<sup>51</sup> Tsaypita cuticur

wajinman chaycaptinnam, servignincuna tincupasquir niyargan: “¡Taytay, wamrayquiga cuticas-hganam!”<sup>52</sup> Tsaynö niyaptinmi, servignincunata tapurgan: “¿Imay öratan wamralläga cuticargon?” Paycunanam niyargan: “Ganyan pullan junag pásaypitam achachaynin jancat pärasquírgan.”

<sup>53</sup> Tsaynö niyaptinnam wamrapa taytan yarpasquirgan, Señor Jesucristo tsay öra “Wamrayquiga cuticashganam” ninganta. Tsayta ricaycurmi wajinchö llapan caycagcunawan rasumpa criyicuyargan Señor Jesucristoga Dios Yaya cachamungan Cristo canganta.

<sup>54</sup> Tsay wamrata cuticätsinganwanga Galilea provinciachö ishcay cutinam Señor Jesucristo milagruta rurargan, Judeapita cutimurnin.

## 5

### *Mana puriyta puedig runata Señor Jesucristo cuticätsin*

<sup>1</sup> Tsaypitanam Señor Jesucristo Jerusalén mar-cachö Israel runacunapa fiestancunaman aywar-gan. <sup>2</sup> Jerusaléñchö “Üshacunapa puncun” niyan-gancagchömi juc pisïna pitsga corredoryog car-gan. Tsay pisïnapam hebreocunapa parlays-inchöga shutin cargan “Betzata.” <sup>3</sup> Tsay lädun patsachömi atscag geshyagyashacuna, gapracuna, ratacuna, inväliducuna jitaraycäyargan. Paycunam tsay pisïnachö yacu cuyugta shuyarar cäycäyargan. <sup>4</sup> [Tsay pisïnamanmi cielupita juc angel unaychö unaychö urämug yacuta cuyutsinanpag. Tsay yacu cuyugman maygan geshyagyashapis pun-tata yaycur ogocugcagmi cuticäyag.]

<sup>5</sup> Tsaychömi juc runa quimsa chunca pusag (38) watana geshyagyasha cargan. <sup>6</sup> Tsaynö runa unaypitana geshyagyasha ujuraycagta ricaycurmí, unayna geshyanganta musyasquir Señor Jesucristo tapurgan: “¿Coticayta munanquicu?”

<sup>7</sup> Tsay geshyagyashanam contestargan: “Señor, manam pñipis cantsu pisñachu yacu cuyugman yaycatsimänanpag. ‘Yarpushag’ nir ñacangäyagmi imaypis juc llalliscaman.”

<sup>8</sup> Señor Jesucristonam nirgan: “¡Cananga sharcurnin gopiquita aparcur aywacuy!”

<sup>9</sup> Tsaynö niptinmi, tsay geshyagyasha runa jina öra cuticasquirgan. Tsay gopinta aparcurcurmi aywacurgan. Sabado jamay junag captinmi,

<sup>10</sup> Israel runacunapa autoridänincuna tsay cuticashga runata niyargan: “Canan sabado jamay junag caycaptina ¿imanirtan gopiqui aparishga puriyanqui? Tsaynö puringayquiga leynintsicpa contranmi.”

<sup>11</sup> Pero tsay runanam nirgan: “Coticätsimagni runam ‘Gopiquita aparcur aywacuy’ nimargon.”

<sup>12</sup> Tsaynam autoridäcuna tapuyargan: “¿Pitan ‘Gopiquita aparcur aywacuy’ nishuruyqui?”

<sup>13</sup> Pero tsay runaga manam musyargantsu ni pí cuticätsingantapis, tsay maytsicag runacuna goricashgachö Señor Jesucristoga tallucarnin illacasquiptin.

<sup>14</sup> Tsaypitanam Señor Jesucristo cuticätsingan runawan tincusquir nirgan: “Canan cuticashgana caycarga, amana yapayga jutsata ruranquitsu. Si yapay jutsata rurarga, maypis geshyangayquipita mas peor canqui.”

**15** Tsaynö niptinmi, tsay runaga israelcunapa autoridänincunaman Señor Jesucristo cuticätsinganta willacug aywargan. **16** Tsay sabado jamay junagchö runata cuticätsinganpitam, Israel autoridäcuna Señor Jesucristota chiquirnin gaticachäyargan.

**17** Pero Señor Jesucristonam nirgan: “Taytäga imaypis allicunata rurarmi caycan. Tsaymi nogapis paynölla allita rurar caycå.”

**18** Tsaynö Señor Jesucristo niptinmi, autoridäcuna mas chiquiyargan. Manam sabado jamay junagchö runata cuticätsingallanpitatsu, sinöga “Dios Yayata Taytä” nir, Paywan iwalatsicunganpitam mas chiquirnin wañutsiyta munayargan.

### *Dios Yayapa Tsurin poderyog cangan*

**19** Señor Jesucristonam nirgan: “Rasuncagtam niyag: Dios Yayapa Tsurin carpis manam quiquinpa munayllanpitaga imatapis ruranmantsu. Taytan ruranganta ricashga carmi, Tsurinpis Taytannölla imatapis ruraycan.

**20** Taytan Tsurinta alläpa cuyarmi, llapan imayca rurangancunata ricätsishga. Tsaymi gamcunatapis mana ni imay ricäyangayqui milagrucunata ricätsiyäshuptiqui, alläpa mantsacashganö caycäyanqui. **21** Wañushgacunata cawatsimug poderöso Taytannöllam, Tsurinpis alläpa poderöso cayninwan wañushgacunata cawatsimunga.

**22** Taytanga manam pitapis juzgangatsu. Sinöga llapan mandacuynintam Tsurinta entregashga runacunapa jutsancunapita juzgananpag.

**23** Tsaymi Taytanta respetayangannölla,

Tsurintapis respetayänan. Tsurinta mana respetarga cay patsaman cachamug Taytantapis manam respetayantsu.

**24** “Rasuncagtam niyag: Pipis willacungäta cäsucur cachamagni Dios Yayaman criyicurga, manam infiernuman aywangatsu. Mas bienmi gloriaman aywayanga tsaychö cushishga imayyagpis cawanapag. **25** Rasumpam öra chaycämunna, jutsa rurayllachö imayca wañushganö cawagcunaga Diospa Tsurin willacunganta entendiyananpag. Tsay willacuycunata cäsurga mana ushacag cawaytam chasquiyanga. **26** Taytan mushog cawayyog carmi, Tsurintapis mushog cawayyog cananpag entregashga. Tsaymi Tsurinpis runancunata cawatsimur mushog cawayta garanga. **27** Quiquin Dios Yayam podernintawan llapan mandacuyninta entregashga Diospita Shamushga Runa captinmi, llapan runacunata juzgananpag. **28** Pero tsaynö niyangagta wiyar ama mantsacashganö cayaytsu. Juc junagmi chämunga Señor Jesucristopa Willacuyninta llapan pamparagcunapis wiyayänanpag. **29** Pamparäyangánpita yargascamurmi, allillata rurar cawashgacagcunaga Dios Yayawan imayyagpis glorianchö cawayanga. Pero mana alli ruragcagcunam sığa, infiernuchö imayyagpis sufrirnin ñacayanga.

*Dios Yayapita Señor Jesucristo shamunganta willacuyangan*

**30** “Nogaga manam quiquiipa munaylläpitatsu pitapis juzgayta munä, sinöga cachamagni

Taytä munar mandamangannöllam. Tsaymi Taytä mandamanganta cumplir, segun imatapis rurayanganpita rasumpacaglata juzgashag. <sup>31</sup> Si quiquillápita imaycatapis rurangäta willayaptigga manam criiyämanquimantsu, rasumpa cangata. <sup>32</sup> Pero nogapag willacug runaga jucmi. Musyämi nogapag llapan imayca willacungan rasumpa canganta. <sup>33</sup> Dios Yayam Juan Bautistata cachamurgan, puntata shamur nogapag willacunanpag. Tsaymi payman musyapacugcunata cachayaptiqui rasuncaglata willayäshurgayqui. <sup>34</sup> Nogaga manam wanätsu juc runa nogapag imayca testigunö willacunantarag. Mas bienmi gamcunata willayag tsay runa willacunganwan llapayquipis salvacäyänayquipag. <sup>35</sup> Gamcunaga Juan Bautista willacunganta imayca juc linterna caruman juc rätulla atsicyagnömi, juc rätulla cushishga wiyar chasquiyargayqui.

<sup>36</sup> “Nogapag Juan Bautista willacunganta criyir mana criyirpis, musyayanquimanmi Dios Yaya cachamaptin shamungätawan tucuyläya milagrucuna rurangäta ricaycarga. Tsaynö tucuyläya milagrucunata rurar cumplinäpagmi quiquin Dios Yaya mandamashga. <sup>37</sup> Tsaynöllam quiquin Taytä cay patsaman cachamanganta musyatsiyäshunqui. Paytaga manam imaypis parlagta wiyayashcanquitsu ni ricäyashcanquitsu. <sup>38</sup> Dios Yaya cachamungan Runaman mana criyirmi, Paypa Palabranmanpis mana criyianquitsu.

<sup>39</sup> “Gamcunaga yarpäyanqui: ‘Diospa Palabranta

yachacurmi, mana ushacag cawayta tarishun' nir. Pero tsay Palabran yachacuyangayquiga, imayca juc testigunömi nogapag willacur gellgashga caycan. <sup>40</sup> Tsaynö caycaptinpis gamcunaga manam chasquiyämaya munayanquitsu. Nogata mana cäsuyämarga, manam tsay mana ushacag cawayta tariyanquitsu mayjina yachacurpis.

<sup>41</sup> “Nogaga manam runacunalla aläbayämänanta munätsu. <sup>42</sup> Pero gamcunataga rasumpam regeyag imanö cayangayquita. Rasuncagtaga manam Dios Yayata cuyayanquitsu. <sup>43</sup> Cachamagni Taytäpa shutinchö shamuptimi nogata chasquiyämänquitsu. Pero juc runa quiquinpa yarpayllanpita shamuptinmi siga, alläpa cushishga chasquianqui. <sup>44</sup> Gamcunaga quiquipurallam imaycachöpis aläbanacur cayanqui. Pero japallan Dios Yaya gamcunapag munangantaga manam cäsuyanquitsu.

<sup>45</sup> “Ama gamcuna yarpäyaytsu Taytäpa puntanchö shimpianagpagcagta. Gmcuna unay Moisés gellgangancunaman criyirnin shuyaräyangayquiwanmi, quiquin Moisés Dios Yayapa puntanchö shimpianashunqui. <sup>46</sup> Si unay Moisés gellgangancunata rasumpa criyirga, nogamanpis criyianquimanmi. Tsay llapanta Moisés gellganganchöga nogapagmi gellgashga cargan. <sup>47</sup> Si tsaynö Moisés gellgangancunata mana cäsuycarga, ¿imanörög noga willayangagtapis criyianquiman?”

*Pitsga waranga (5,000) runacunata Señor Jesucristo micutsin  
(Mateo 14:13-21; Marcos 6:30-44; Lucas 9:10-17)*

<sup>1</sup> Tsaypitanam Señor Jesucristo Galilea gochapa wac tsimpanman päsargan. Tsay gochapa juccag shutinmi Tiberias cargan. <sup>2</sup> Geshyagyashacunata cuticätsinganta ricashga carmi, maytsicag runacuna Señor Jesucristopa gepanta gatirnin aywaryagan. <sup>3</sup> Señor Jesucristonam discipuluncunawan juc jircaman witsarcur, tsaychö jamaycuyargan. <sup>4</sup> Israel runacunapa Pascua fiestancuna cananpagmi ichicllana faltaycargan.

<sup>5</sup> Señor Jesucristonam maytsicag runacuna paycagman aywaycäyagta ricasquir, discipulun Felipeta nirgan: “Caytsicag runacuna micuyänanpag, ¿maypitaraq tantata rantishun?”

<sup>6</sup> Señor Jesucristoga tsaynö nirgan: “Mä Felipe imaningash” nirmi. Pero Señor Jesucristoga musyargannam micuynincuna imanö garananpagcagtapis.

<sup>7</sup> Felipenam nirgan: “Pusag quilla arupucur gänangantsicwan rantimushgapis īnumpatagcu caytsicag runacuna ichic ichicllapis micuyänanpag pagtangaga!”

<sup>8</sup> Tsaynam juccag discipulun Pedropa waugen Andrés nirgan: <sup>9</sup> “Caychö juc olgo wamrapam pitsga cebäda tantawan ishcay pescädollan caycäpun. Pero tsayllaga īimapagpis pagtanmanragcu caytsicag runapagga!”

<sup>10</sup> Tsaynam discipuluncunata Señor Jesucristo nirgan: “Runacunata niyay tsaychö jamacuyänanpag.” Tsaychöga juc jatun pampa

wayllam cargan jamacuyänanpag. Tsaychömi ollgocagcunalla (5,000) pitsga waranga cayargan, warmicunatawan wamracunata mana yupaycäyaptin. <sup>11</sup> Tsaypitanam Señor Jesucristo pitsga tantata achcurcur, Dios Yayata agradëcicurgan. Tsaypitanam discipuluncunata macyargan, llapan jamaycag runacunata aypuyänanpag. Tsaynöllam ishcay pescädotapis rurargan runacuna micuyänanpag.

<sup>12</sup> Llapan runacuna pacha junta micusquiyaptinnam, discipuluncunata Señor Jesucristo nirgan: “Llapan sobragcunata goriyay mana juc catur.” <sup>13</sup> Discipuluncunananam chunca ishcay (12) canasta juntatarag, tsay pitsga cebäda tantallapita atsca sobragcunata goriyargan.

<sup>14</sup> Tsay milagru ruranganta ricaycurnam runacuna ninacuyargan: “Cay runaga rasumpa unay Moisés gellganganchö cay patsaman shamugpagcag Profëtam.” <sup>15</sup> Tsaynö nirmi runacuna amälas reynincuna cananpag churayta munayargan. Tsaynö churayänanta mana munarmi, Señor Jesucristoga juc jircapa japallan aywacurgan.

*Señor Jesucristo yacu jananpa purin  
(Mateo 14:22-27; Marcos 6:45-52)*

<sup>16</sup> Patsa tutapaycaptinnam Señor Jesucristopa discipuluncuna, juc jatun gocha cuchunman aywayargan. <sup>17</sup> Tsaypitam discipuluncuna büquiman lätarcur wac tsimpa Capernaumman aywayargan. Pero patsa tutapashgana caycaptinpis Señor Jesucristoga manaragmi cutimurganragtsu. <sup>18</sup> Tsaynö jatun lamarnö

gochapa büquiwan aywaycäyaptinnam, alläpa wayrar lamarta lagchicätsir gallaycurgan. <sup>19</sup> Caru pitsga o sogta kilometrotana aywaycarmi, Señor Jesucristo yacu jananpa shamuycagta ricasquiyargan. Tsaynö shamuycagta ricasquirmi, alläpa mantsacäyargan. <sup>20</sup> Pero Señor Jesucristonam nirgan: “¡Ama mantsacäyaytsu! ¡Nogam cäl!”

<sup>21</sup> Tsaynö niptinnam alläpa cushicur büquiman lätatsiyargan. ¡Tsaypitaga sasllanam chäyargan aywayangan Capernaum marcaman!

### *Runacuna Señor Jesucristota ashayan*

<sup>22</sup> Tsay waräninam lamar wac tsimpanchö maytsicag quëdashga runacuna tantiyasquiyargan, tsaychö juclaylla caycag büquiwan discipuluncunalla aywayangata ricar, Señor Jesucristo quëdanganta. <sup>23</sup> Tsaynö caycäyaptinmi, Tiberias marcapita runacuna büquincunawan chäyargan, Señor Jesucristo Dios Yayata agradëcicusquir tantata miratsingancagman. <sup>24</sup> Tsaychö Señor Jesucristotawan discipuluncunata mana ricarmi, jina öra llapan tsay büquincunawan Capernaum marcaman Señor Jesucristota ashig aywayargan.

### *Señor Jesucristoga imayyagpis cawatsicug tantam*

<sup>25</sup> Tsay lamarnö jatun gocha wac tsimpan Capernaumman chaycurnam Señor Jesucristota tarisquir tapuyargan: “Maestru, ¿imaytan shämuryuyqui?”

<sup>26</sup> Señor Jesucristonam nirgan: “Rasuncagtam niyag: Gamcunaga manam milagrucuna

rurangäpitatsu ni Dios Yaya cachamanganta entendiyänayquipagtsu ashiyämanqui, sinöga pacha junta micutsiyangagpitam. <sup>27</sup> Ama tsay ushacag micuylapagga yarpachacur aruyaytsu. Tsaypa rantinga imayyagpis cawatsicug mana ushacag micuypag yarpachacurnin aruyayga. Tsay mana ushacag micuytaga nogam garayäshayqui, quiquin Dios Yaya llapan poderninta garamashga captin.”

<sup>28</sup> Tsaynam tapuyargan: “¿Imatatan rurayäshag Dios Yaya munangannö imayyagpis cawayänäpag?”

<sup>29</sup> Señor Jesucristonam nirgan: “Dios Yayaga munan cachamungan japallan Tsurinman firmi criyicur cäsucuyänayquitam.”

<sup>30</sup> Runacunanam niyargan: “Diospa Tsurin carga ¿mä, ima milagrullatapis ruramuy, tsayta ricarnin rasumpa criyyänagpag? ¿Mä imacunatatan rurayta puedinqui? <sup>31</sup> Unay tiempum Moisés tsunyachö caycar, waran waran milagruta rurarnin, ‘manä’ niyangan micuya awiluntsiccunata micutsirgan. Diospa Palabran gellgash-gachömi nirgan: ‘Cielupita shamug tantatam micutsirgan.’ Mä tsaypunga gampis tsay Moisésnölla ruramuy.”<sup>◊</sup>

<sup>32</sup> Señor Jesucristonam contestargan: “Rasuncagtam niyag: Manam Moisétsu tsay micuya unay awiluntsiccunata garargan. Sinöga Taytämi cielupita rasumpacag tantataga garargan. <sup>33</sup> Payllam garayäshunqui cielupita cachämungan tantatapis cay patsachö llapan runacunata imayyagpis cawatsinanpag.”

---

<sup>◊</sup> **6:31** Sal 78:24.

**34** Runacunananam niyargan: “Señor, tsaypunga tsay tantata cananpita imayyagpis garaycayällämäy.”

**35** Señor Jesucristonam nirgan: “Tsay cawatsicug tantaga nogam că. Nogaman rasumpa firmi criycugcunaga pacha junta micushganömi cayanga y yacuta tegllanganyag upyashganömi imaypis cushishga cawayanga. **36** Pero puntata niyangagnöpis gamcunaga manam criiyämanquitsu milagru rurangäta ricaycarpis. **37** Taytä entregamangan runacunaga llapanpis criyimarmi chasquiyäman. Tsaynö criyicur chasquimagicunataga puntäman shamuptinpis manam ni imay gorgoshagtsu. **38** Nogaga manam quiquipa munaylläpita mandacunäpagtsu janag patsa cielupita shamushcä, sinöga cachamagni Taytä munangannö mandamanganllata ruranäpagmi. **39** Cachamagniga manam munantsu entregamangan runacuna ni jucllayllapis ogracagnö infiernuman aywayänantaga. Taytäga munan cay patsa ushacangan junagchö cawatsimur cushishga cawayänanpagmi. **40** Tsaynöllam munan Tsurinman criycugcunaga alli cawaychö Dios Yayawan imayyagpis cawayänanta. Tsaynö criyicamugcunataga nogam cawatsimushag cay patsa ushacangan junagchöpis.”

**41** Tsaynö “Nogam cielupita shamushga tantaga că” niptinmi, judiucuna piñacuyargan: **42** “¿Cay runaga manacu Josëpa tsurin Jesús? Taytantawan mamantapis regentsicmi. Tsaynö regeycashaga ¿Imanirtan ‘cielupitam shamushcä’ nimantsic?”

**43** Tsaynö niyaptinnam, Señor Jesucristo nirgan: “Tsaynö niyangagta ama quiquillayquicunachöga rimayämar parlaycachäyaytsu. **44** Cachamagni Taytä pitapis acrar nogaman mana apamuptinga, manam nogaman shamur criiyämanmantu. Tsaymi nogata chasquimagicagtaga cay patsa ushacangan junagchöpis cawatsimushag. **45** Dios Yayapa unay profétancuna gellgayangan libruchömi nirgan: ‘Llapan runacuna musyayänanpagmi, quiquin Dios Yaya yachatsirgan.’ Tsaynö pipis Dios Yaya yachatsinganta cäsurnin cumplirmi, nogaman shamur rasumpa chasquiyäman.◊

**46** “Dios Yayataga manam ni pipis ricashgatsu. Paytaga ricashga Dios Yayapita Shamushga Runallam. **47** Rasuncagtam niyag: Pipis nogaman rasumpa criyicurga, Dios Yayawanmi imayyagpis cawacunga. **48** Nogaga cawatsicug tantam cä. **49** Rasumpam tsay tsunya mana imacagchö caycar, unay awiluntsiccunapis Dios Yaya cachämungan ‘manä’ niyangan micuyta micuyargan. Tsay micuyta micuycarpis, tsay tsunyachömi wañur ushacäyargan. **50** Pero cananmi sïga, cay rasumpacag tantataga, quiquin Dios Yaya cielupita cachamushga. Tsaymi cay tantata micugcagga mana ushacag cawaychö imayyagpis cawayanga. **51** Nogam tsay cielupita shamushga cawatsicug tantaga cä. Pipis tsay tantata micugcagga mana ushacag cawaytam taringa. Tsay tantaga nogapa cawag cuerpümi. Tsaymi noga wañushag cay patsachö llapan

---

◊ **6:45** Is 54:13.

runacunaráyacu, cieluchö mana ushacag cawayta tariyänanpag.”

<sup>52</sup> Tsaynö Señor Jesucristo niptinnam, tsay judiucuna mana tantiyar jucnin jucnin ninacuyargan: “¿Imanötan cay runaga quiquinpa cuerpunta micutsimäshun?”

<sup>53</sup> Señor Jesucristonam nirgan: “Rasuntam niyag: Pipis nogapa cuerpüta mana micurga y yawarnüta mana upyarga, manam ni imaypis mana ushacag cawayta taringatsu. <sup>54</sup> Pero pipis nogaman rasumpa firmi criyicamur cawagtam sığa, cay patsa ushacangan junag cawatsimushag cieluchö imayyagpis cawanpag.

<sup>55</sup> Nogaga rasumpacag cawatsicug micuymi că. Y yawarnüpis rasumpacag yacum. <sup>56</sup> Nogaman rasumpa firmi criyicayämurnin cuerpüta micur y yawarnüta upyar cawagcagga, imayca juclayllanömi nogawan cawan y nogapis tsaynöllam paywan cawä. <sup>57</sup> Cachamagni cawatsicug Taytä carmi, nogatapis cawatsiman. Tsaynöllam nogaman criyicamugcagtaga imayyagpis cawatsishag.

<sup>58</sup> Gamcunatam musyatsiyag cielupita shamugcag rasumpa tantapag. Tsay tantaga manam unay awiluntsiccuna ‘manä’ niyangan micuya micuyangannötsu. Paycunaga tsay manäta micuyarpis wañuyarganllam. Pero cielupita shamushgacag tantata micurmi sığa, imayyagpis cushishga cawayanga.”

<sup>59</sup> Tsaynömi Señor Jesucristo yachatsicurgan, Capernaum marcachö Dios Yayaman mañacuyänanpag goricäyänan wajichö.

*Señor Jesucristo parlan mana ushacag caway-pag*

<sup>60</sup> Tsaypitanam Señor Jesucristo tsaynö yachatsicunganta wiyar, tsay atscag gatiragnincuna niyargan: “¡Cay yachatsicunganga alläpa aja tantiyapagmi! ¿Pirag tsaytaga entendir chasquiman?”

<sup>61</sup> Gatiragnin discipuluncuna tsaynö niyanganta tantiyasquirmi, Señor Jesucristo nirgan: “¿Tsaynö nücuyaptigcu piñasquiyargoqui? <sup>62</sup> Pero gamcuna ¿ima niyanquimanrag Diospita Shamushga Runa, unay cacungan cieluman cutiycacta ricarnin? <sup>63</sup> Quiquillayquicunapa munayllayquicunawanga imayyagpis mana ushacag cawaytaga manam ni imay tariyanquitsu. Sinöga yachatsicurnin willacungäta chasquirmi sığa, Espíritu Santopita mushog cawayta tariyanqui. <sup>64</sup> Tsaynö caycaptinpis llapan willayangagcunata manaragmi waquiquiga criyyämánquiragtsu.”

Señor Jesucristoga tsaynö nirgan maygan runapis payta mana chasquinganta musyarmi. Tsaynöllam unaypitana musyargan maygan runa traicionarnin chiquignincunaman ranticunanpagcagtapis. <sup>65</sup> Tsaymi nirgan:

“Tsaynö mana criyyaptiquim unayna niyargag: Si Taytä poderninta pimanpis mana churamuptinga, manam ni pipis nogaman shamur rasumpa criyimanmantu.”

<sup>66</sup> Señor Jesucristo tsaynö yachatsicuptinmi atscag gatiragnincunapis dëjasquir aywacuyargan. <sup>67</sup> Waquincag gatiragnincuna tsaynö aywacuyaptinnam, tsay chunca ishcay (12) discipuluncunata Señor Jesucristo

tapurgan: “¿Gamcunapis paycunanö aywacuytacu munayanqui?”

**68** Simón Pedronam contestargan: “Señor, ¿pimantagshi aywayäshag Dios Yayawan imayyagpis cawayänäpag yachaycätsiyämaptiquiga?

**69** Nogacunaga Dios Yaya cachamungan rasumpa Cristo cangayquitam criyirnin musyayä.”

**70** Señor Jesucristonam nirgan: “¿Manacu gamcunata chunca ishcay (12) discipulücuna cayänayquipag acrayashcag? ¡Tsaynö acrayangag caycarpis, jucniyuiga Supaypa munayninchömi caycäyanqui!”

**71** Señor Jesucristoga tsaynö parlargan, Simón Iscariotepa tsurin Judáspagmi. Judásga Señor Jesucristopa discipulun caycarpis, mana alli rurag runacuna wañutsiyänanpagmi traicionarnin ranticurgan.

## 7

### *Señor Jesucristopa waugencuna payman mana criyiyangan*

**1** Tsaypitanam Galilea provinciachö marcan marcan Señor Jesucristo yachatsicur purirgan. Israel runacunapa autoridänincuna wañutsiyta munayaptinmi, Judea provinciamanga aywayta munargantsu. **2** Pero Israel runacunapa Ramäda niyangan fiestancuna gallananpagmi, juc ishcay junagcunalla faltaycargan. **3** Tsaymi Señor Jesucristopa waugencuna niyargan: “Ama cayllachöga caytsu. Ayway mä Judea marcaman tsaychöpis gatiräshugniquicuna milagru rurangayquita ricar, gamman criyiyänanpag. **4** Pipis alli regeshga

cayta munarga manam pacayllapaga imatapis rurantsu. Caynö milagrucunata ruraycarga, llapan runacuna musyayänanpag puntancunachö ruranquiman.”<sup>5</sup> Tsaynömi Señor Jesucristopa wau-gencunapis parlayargan, Dios Yaya cachamungan Cristo canganta mana criyir.

<sup>6</sup> Tsaynam Señor Jesucristo nirgan: “Manaragmi örä chämunragtsu Dios Yaya munanganno Jerusaléman aywar, llapanta rurar cumplinäpag. Pero gamcunam sığa imay örapis aywayta puediyanqui.<sup>7</sup> Gamcunataga cay patsachö llapan runacuna manam chiquiyäshunquitsu. Pero nogatam sığa chiquiyäman imayca juc testigunö jutsa rurag cayanganta musyatsipti.<sup>8</sup> Tsay fiestamanga gamcunalla aywayay. Noga aywanäpagga manaran öra chämunragtsu.”

<sup>9</sup> Tsaynö nisquirmi, Señor Jesucristoga Galileachö quëdacurgan.

*Israel runacunapa Ramäda niyangan fiestaman Señor Jesucristo aywangan*

<sup>10</sup> Tsaypita waugencuna fiestaman aywasquiyaptinnam, Señor Jesucristopis pacayllapa mana pitapis willarlla aywargan.<sup>11</sup> Jerusalén fiestachö Señor Jesucristota alläpa ricchacurnin ashirmi, judiu autoridäcuna tapunacuyargan: “¿Tsay runaga maychörag caycan?”

<sup>12</sup> Tsaychö maytsicag goricasgħa runacunanam, Señor Jesucristopag parlayargan: “Payga alläpa alli runam.” Pero waquinçagcunananam niyargan: “Tsayga manam alli runatsu. Llapan runacunatam engañar llutanta yachatsirnin puriyan.”

**13** Pero autoridäcunapita mantsacurmi, tsaynö pacayllapa parlayargan.

*Señor Jesucristo Ramäda niyangan fiestachö yachatsicun*

**14** Tsay pullan fiesta päsaycaptinnam templuman Señor Jesucristo yaycusquir, runacunata yachatsirgan. **15** Tsaynö yachatsicunganta wiyarmi, autoridäcuna niyargan: “Maychöpis mana estudiashga caycarga ¿imanöpatan cay runaga alläpa allish yachan?”

**16** Tsaynö niyaptinmi, Señor Jesucristo nirgan: “Nogaga caynö yachä cachamagni Dios Yaya yachatsimashga captinmi, manam quiquilläpitatsu yachagpis cä. **17** Pipis Dios Yaya munanganno cawarga, rasumpam musyanga cay yachatsicungäcuna Dios Yayapita o quiquiipa yarpaylläpita canganta.

**18** Waquincagcunaga runacunalla aläbayänanta munarmi, quiquincunapa yarpayllancunapita yachatsicur puriyan. Pero nogagam yachatsicü cachamagni aläbamänanpag. Tsaymi Pay munanganno rasumpacagllata yachatsicü, chasquiyämaptin o mana chasquiyämaptinpis. **19** Gamicunam unay Moisés gellgangán leyecunata chasquiyargayqui Dios Yaya munanganno cawayänayquipag. Pero tsay leyecunataga manam ni maygayquillapis cäsuyargayquitsu. Tsaynö mana cäsuycarga ¿imanirtan nogata wañutsiyämaya munayanqui?”

**20** Goricasgħa runacunananam niyargan: “Gampa shongoyquichöga supaymi caycan. ¿Pitan wañutsishuyniquita munan?”

**21** Señor Jesucristonam nirgan: “Sabado jamay junagchö juc geshyagyasha runata cuticätsingäpitam mantsacashga caycäyanqui. **22** Mä entendiyämäy. Unay Moisés yachatsicungan leyuncunata cumplirmi, sabado jamay junagcaptinpis, ollgo wamrayquicunapa cuerpunchö señalatsiyanqui. Moisés tsaynö yachatsicuptinpis, tsayga shamurgan unay awiluntsic Abrahampa tiempunpitanam. **23** Tsaynö Moiséspa leyninta cumplir jamay sabado junagchöpis, wamrayquicunapa cuerpunchö señalaycätsirga, ¿imanirtan piñacur rabiapäyämanqui sabado jamay junagchö geshyagyasha runapa entëru cuerpunta cuticätsingäpita? **24** Manarag allipa musyaycarga ama ricäyangayquillapitaga pitapis juzgayaytsu. Rasumpa pitapis juzgarga, imatapis alli musyar rasumpacagllata parlayanqui.”

### *Señor Jesucristo willacun maypita canganta*

**25** Tsaynam Jerusaléñchö täcug runacuna ninacuyargan: “¿Manacu cay runaga wañutsiyänanpag ashicäyangan?” **26** Llapan runacunapa puntanchö parlapaptinpis manatsag ima niyantsu. ¿Autoridäcunapis rasumpa Dios Yaya cachamungan Cristo cangantatsurag yarpäyan? **27** Pero nogantsicga Jesús may marcapita cangantapis musyantsicmi. Rasumpa Dios Yaya cachamungan Cristo shamuptinga, manam ni pipis musyanmantsu maypita shamungantapis.”

**28** Tsaynö niyanganta wiyasquirmi, templuchö yachatsicuycanganpita Señor Jesucristo jinchi nirgan: “Aumi, gamcunaga regeyämanquim y musyayanquim maypita shamungäta. Pero

nogaga manam quiquiipa munaylläpitatsu cay patsaman shamushcä, sinöga cachamagni Dios Yayapa mandädunta cumplirmi shamushcä. Dios Yaya rasumpacag captinmi, gamcunaga regeyanquitsu. <sup>29</sup> Nogaga Dios Yayapita shamushga carmi regë, Pay cay patsaman cachamashga captin.”

<sup>30</sup> Tsaynö niptinmi, autoridäcuna Señor Jesucristota prësu achcuya munayargan. Pero manarag wañunan öra captinmi ni pipis achcurgantsu. <sup>31</sup> Tsaynö nicäyaptinpis, atscagmi Señor Jesucristoman criyiyargan. Tsaymi llapan criyicug runacuna niyargan: “Rasumpa Dios Yaya cachamungan Cristo shamurga ¿cay runapita masragtsurag milagrucunata ruranga?”

### *Fariseocuna Señor Jesucristota prësu achcuya munayan*

<sup>32</sup> Tsaypitanam runacuna tsaynö parlapacuyanganta wiyasquir, sacerdöticunapa mandagnincunawan fariseocuna templu cuidag wardiacunata cachayargan Señor Jesucristota prësu achcuyänanpag.

<sup>33</sup> Señor Jesucristonam nirgan: “Gamcunawanga juc ishcay junagllanam pagta cashun. Pero tsaypitaga cachamagni Dios Yayamanmi cuticushag. <sup>34</sup> Ashiyämarpis mananam tariyämánquitsu. Noga aywangämanga manam quiquillayquicunaga aywayta pue diyanquitsu.”

<sup>35</sup> Tsaynö niptinmi Israel runacuna ninacuyargan: “¿Nogantsic mana tarinapagga mayparag

aywanga? ¿Juclä griegocunapa naciunninchö wit-sicashga marcamajintsiccunamantsurag o griego-cunamantsurag yachatsicug aywanga? <sup>36</sup> ¿Ima ninantan ‘Ashiyämarpis manam tariyämanquits’ ninganga? ¿Imanirag Pay aywanganmanga ay-wayta puedishuntsu?”

*Señor Jesucristoga mayunö cawatsicug yacum*

<sup>37</sup> Fiesta ushacänan junagragmi alläpa jatun dia cargan. Tsay junagchömi Señor Jesucristo ichircur jinchi nirgan: “Mayganpis yacunarga nogaman criyicurnin, cawatsicug yacuta upyag shayämutsun. <sup>38</sup> Pashtag pucyupita mana ushacaypa chuya yacu yargamungannömi, nogaman criyicugcunapa shongonchö Espíritu Santo imaypis caycanga. Tsaynö cananpagmi Diospa Palabran gellgashgachö cargan.”

<sup>39</sup> Tsaynö nirmi yachatsicurgan Payman criyicugcuna Espíritu Santota chasquiyänanpag canganta. Tsaymi paycunaga Espíritu Santota manarag chasquiyargantsu. Pero wañunganpita cawascamuptinmi siga Señor Jesucristoman criyicugcagcuna Espíritu Santota chasquiyargan.

*Señor Jesucristo parlanganta wiyar runacuna raquicäyan*

<sup>40</sup> Señor Jesucristo tsaynö parlanganta wiyarmi, tsaychö waquincag runacuna niyargan: “Cayga unay Moisés gellgangannö willacug shamugpagcag Profétam.” <sup>41</sup> Waquincagcunananam niyargan: “¡Payga Salvacug Cristom!”

Pero waquincagnam niyargan: “Manam, Galilea runam cayga ¿imanöpatan Galileapitaga Cristo shamunman cargan? <sup>42</sup> Diospa Palabran

gellgashgachö ningannöga, unay rey Davidpa ayllunpitam Belen marcachö Cristoga yurinan cargin, Davidpis tsay marcapita captin.”

<sup>43</sup> Tsaynö waquinga allita yarpar y waquincagnam mana allicunata yarpar, Señor Jesucristo janan raquicar ushacäyargan.  
<sup>44</sup> Waquincagcunanam prësu achcuya munayargan. Pero manam ni mayganpis achcuya balurayargantsu.

*Señor Jesucristoman autoridäcuna criyyiantsu*

<sup>45</sup> Tsaypitanam templuchö wardiacuna mandayangan sacerdöticunapa mandagnincunawan fariseocuna caycäyangaman cutiyargan. Chäriyaptinnam tapuyargan: “¿Imanirtan tsay Jesústa prësu mana apayämurgoyquitsu?”

<sup>46</sup> Wardiacunanam contestayargan: “¡Manam ni pipis cay runa parlangannö ni imaypis yachatsicushgatsu!”

<sup>47</sup> Tsaynö niyaptinnam, fariseocuna niyargan: “¿Asta gamcunatapiscu engañar criyiscatsiyämushurgoyqui? <sup>48</sup> ¿Acäsu tsay runamanga waquincag autoridänintsiccuna y fariseocunapis criyyashgacu? <sup>49</sup> ¡Manam! ¡Pero tsay mana ima musyag runacunallam, leynintsiccunata mana musyar Paymanga criyyian! ¡Tsay runacunaga alli castigashgam cayanga!”

<sup>50</sup> Juccutim judiucunapa autoridänincunawan mandacug Nicodemo pagasllapa Señor Jesucristota ricagnin aywar nirgan: <sup>51</sup> “Moisés yachatsicungan leynintsic ningannöpis, manam juc runata condenashwantsu jutsayog canganta

o imatapis ruranganta manarag allipa wiyarnin musyarga.”

<sup>52</sup> Paycunananam contestayargan: “¿Gampis Galileapitacu canqui? Masqui Diospa Palabran liyir yachacuy, manam ni maygan profëtapis Galileapitaga shamunanpag cangantaga willamantsictsu.”

<sup>53</sup> [Tsaynö nisquirnam cada ünu wajincunapa cuticuyargan.

## 8

*Señor Jesucristoman chätsiyan lluta jucnin jucn-inwan puricug warmita*

<sup>1</sup> Tsaypitanam Señor Jesucristoga olivos niyangan jircaman aywacurgan. <sup>2</sup> Waränin alleg patsa warasquiptinnam templuman cutiycur, maytsicag runacunna goricasquiyaptin jamaycur yachtsicurgan.

<sup>3</sup> Tsaymannam ley yachatsicugcunawan fariseocuna juc warmi olgowan mana alli jutsata ruraycagta tarisquir apayämurnin, llapan runapa puntanman ichiycatsir, <sup>4</sup> niyargan: “Maestru, cay warmitam tariyargö juc olgowan mana alli jutsata ruraycagta. <sup>5</sup> Leynintsicchömi unay Moisés gellgar mandacurgan, lluta puricug warmitaga sagmarnin wañutsinapag. Pero gamga ¿imaninquitan tsaynö warmipag?” <sup>6</sup> Paycunaga tsaynö Señor Jesucristota tapuyargan llutan mana allita parlascatsir, “Mana alli yachatsicugmi” nir acusayänanpag.

Pero tsaynö tapuyaptinmi Señor Jesucristo pat-saman umpuycur allpachö dëdunwan gellgargan.

<sup>7</sup> Tsaypitanam yapay yapay tapuyaptin ichircur

nirgan: “Mä maygayquipis mana juc jutsayo-gcag, cay warmita puntata sagmatsun.”<sup>8</sup> Tsaynö nisquirnam, yapay umpuycurnin patsachö gell-gar sigirgan.

<sup>9</sup> Señor Jesucristo tsaynö ninganta tantiyasquircam: auquincunapita gallaycur asta jövencunapis jucpa jucpa yargornin aywacuyargan. Llapan aywacusquiyaptinnam, tsay warmillana Señor Jesucristopata puntanchö quëdasquircam. <sup>10</sup> Tsaynam Señor Jesucristo ichircur warmita nirgan: “Warmi, ¿maytan shimpiyäshugniqui runacuna? ¿Manacu ni jucllagllapis condenashurgoyqui?”

<sup>11</sup> Warminam contestargan: “Señor, manam ni maygan.”

Tsaynam Señor Jesucristo nirgan: “Tsaynöllam nogapis condenagtsu. Pero cananga wajiquiman aywacur, amana yapaywanga jutsata rurar purinquinatsu.”]

*Señor Jesucristoga llapan runacunapag imayca  
juc actsinömi*

<sup>12</sup> Tsaypitanam atscag runacuna goricäyaptin Señor Jesucristo yapay nirgan: “Nogaga cay patsachö actsinömi cä. Tsaymi nogaman criyicamur gatimag runacunaga mananam tutapay-chönötsu puriyanga, sinöga imayca allish act-sichönömi cawayanga.”

<sup>13</sup> Tsaynam fariseocuna niyargan: “Gamga quiquillayqui alli canayquipagmi tsaycunata parlanqui. Tsay ningayquiga manam rasumpatsu.”

<sup>14</sup> Señor Jesucristonam contestargan: “Quiquilläpag imapata parlaptipis noga

willacungäga rasumpacagmi. Tsaymi nogaga musyä maypita shamungätawan maypa cutinäpagpis. Pero gamcunam sïga, ni maypita shamungätawan ni mayman cutinäpag cangantapis musyayanquitsu. <sup>15</sup> Gamcunaga quiquipiquicunapa yarpayllayquicunawanmi pitapis juzgayanqui. Pero nogaga manam ni pitapis jusgätsu. <sup>16</sup> Pero si noga pitapis juzgarga, rasumpacagllatam juzgashag. Nogaga manam quiquillätsu pitapis jusgä, sinöga cachamagni Taytäwan ishcämi juzgayä. <sup>17</sup> Leyni quicunachömi gellgashga caycan, si ishcag testigucuna iwalla parlayaptinga, tsay parlayangan rasumpa canganta. <sup>18</sup> Tsaynö captinmi, nogapis quiquipag juc testigu cä. Tsay juccag testigunam cachamagni Taytä.”

<sup>19</sup> Fariseocunananam tapuyargan: “¿Maychötan Taytayqui caycan?”

Señor Jesucristonam contestargan: “Gamcunaga manam nogata ni Taytätapis regeyanquitsu. Si nogata regeyämarga Taytätapis regeyämanguimanmi.”

<sup>20</sup> Señor Jesucristoga templuchö yachat-sicuycarmi caycunata parlargan, limushna goricyänancagchö. Pero manam ni pipis prësu achcuyargantsu, manarag öran chämuptin.

*“Noga aywangämanga, manam gamcunaga ay-wayta pue diyanquitsu”*

<sup>21</sup> Tsaypitanam Señor Jesucristo yapay nirgan: “Aywacusquiptümi ashirpis mana tariyämar jutsayquicunallachö wañuyanqui. Noga

aywangämanga manam gamcunaga aywayta puediyanquitsu.”

<sup>22</sup> Judiucunanam ninacuyargan: “¿Quiquillantsurag wañutsicuya munaycan? ¿Imanirrag ‘noga aywangämanga manam aywayta puediyanquitsu’ nimantsic?”

<sup>23</sup> Señor Jesucristonam nirgan: “Gamcunam cay patsapita cayanqui, pero nogaga janag patsa cielupitam shamushcä. Tsaynöllam gamcuna cay mundupita cayanqui, pero nogam siga cay mundupitatsu cä. <sup>24</sup> Tsaymi gamcunataga jutsayquicunallachömi wañuyanqui niyashcag. Si gamcuna noga cangätawan Diospita shamungäta rasumpa mana criyirga, jutsayquicunallachömi wañuyanqui.”

<sup>25</sup> Tsaynam tapuyargan: “¿Pitan gam canqui?”

Señor Jesucristonam contestargan: “Gallananpita niyangagnöllam cä. <sup>26</sup> Gamcunata niyänagpagwan jutsayquicunata juzgayänagpagga atscallaragmi can. Pero tsay cachamagniga imaypis rasumpacagllatam willacun. Tsaymi nogapis llapan runacunata willacü, cachamagni parlanganta wiyangänolla.”

<sup>27</sup> Pero paycunaga manam ni juc entendiyargantsu Taytanpag parlaycanganta.

<sup>28</sup> Tsaymi Señor Jesucristo nirgan: “Gamcuna altuman pallarcayämarmi rasumpa musyayanqui Diospita Shamushga Runata pii canganta. Nogaga manam quiquilläpitatsu imatapis parlar rurä, sinöga quiquin cachamagni Taytä yachatsimanganllatam willacü. <sup>29</sup> Tsay cachamagniga nogawanmi pagtä imaypis caycan,

manam japallätaga dëjamantsu. Nogaga Pay munangannöllam imaypis allicunallata ruraycä.”

<sup>30</sup> Tsaynö Señor Jesucristo yachatsicuptinmi, atscag runacuna payman criyicuyargan.

### *Unay awiluntsic Abrahampa aylluncuna*

<sup>31</sup> Tsaypitanam Payman criyicug judiucunata Señor Jesucristo nirgan: “Si gamcuna yachatsiyangagnölla rasumpa cäsucur cawarga, discipulücumnam cayanqui. <sup>32</sup> Tsaymi rasumpacagta regernin, jutsayquicunapita librina cushishga shumag cawacuyanqui.”

<sup>33</sup> Paycunanam contestayargan: “Nogacunaga unay Abrahampa ayllun carmi, ni imaypis jucpa servigninga esclävuga cayashcätsu. ¿Imanirtan gamga ‘librinam cayanqui’ niyämanqui?”

<sup>34</sup> Señor Jesucristonam nirgan: “Rasuncagtam niyag: Pipis jutsa rurayllachö cawarga, jutsapa servignin esclävunmi caycan. <sup>35</sup> Juc servicug esclävuga manam ni imaypis, patronninpa ayllunga cangatsu. Pero wamranmi sığa imaypis paypa rasumpa ayllun canga. <sup>36</sup> Tsaynöllam Dios Yayapa Tsurin perdonar librayäshuptiquiga, llapayquipis rasumpa libri Supaypa mana servigna cayanqui. <sup>37</sup> Musyämi gamcuna unay Abrahampa ayllun cayangayquita. Pero paypa ayllun caycarpis, yachatsicungäta mana criyyämarmi wañutsiyämaya munayanqui. <sup>38</sup> Nogaga Taytäpa puntanchö ricangällatam parlar gamcunata willayag. Tsaynömi gamcunapis taytayquicuna mandayäshungayquillata imatapis rurayanqui.”

**39** Paycunananam niyargan: “Nogacunapa taytäcunaga unay Abrahammi.”

Pero Señor Jesucristonam contestargan: “Si rasumpa gamcuna unay Abrahampa aylluncuna carga, pay allicunallata rurangannömi gamcunapis rurayanquiman. **40** Pero tsaynö caycaptinpis gamcunam siga, Dios Yaya rasumpacagllata musyatsimanganta willacuptipis wañutsiyämaya munayanqui. ¡Unay Abrahamga manam ni imay tsaynöga rurargantsu! **41** Gamcunaga imatapis rurayanqui taytayquicuna ruranganllatam.”

Judiucunananam piñacur niyargan: “¡Nogacunaga manam wachapucushgatsu cayä, nogacunapa jucclayllam taytäcunaga quiquin Dios Yaya!”

*Supayta servirnin wamranno jutsallachö cawagcuna*

**42** Señor Jesucristonam contestargan: “Si rasumpa Dios Yaya taytayquicuna captинга, nogatapis cuyayämämanquimanmi, Dios Yayapita shamushga caychö caycapti. Nogaga manam quiquipa munaylläpitatsu cay patsaman shamushcä, sinöga quiquin Dios Yayam cachamashgga. **43** ¿Imanirtan yachatsicuynitä gamcuna mana entendiyänquitsu? Gamcuna palabrä yachatsicungäta manam wiwayta munayanquitsu. **44** Gamcunaga Supaypa cayaptiquim, pay taytayquicuna. Tsaymi pay munangallanta imatapis rurayta munayanqui. Supayga unaypitam runacunata wañutsirnin jutsata ruratsirgan. Tsaymi payga ni imaypis rasumpacagtaga parlantsu imaycatapis llullacurllam puriyan. Payga alläpa llullam

rasumpa llullacuypa taytan car. <sup>45</sup> ¡Pero nogaga rasumpacagllata willayaptigmi, gamcunaga mana criiyämanquitsu! <sup>46</sup> ¿Mä maygallayquipis shimpiyämay nogá jutsayog cangäta? Rasuncagllata yachatsicur parlaycaptiga ¿imanirtan criiyämanquitsu? <sup>47</sup> Dios Yayapa runancunaga Diospa Alli Willacuynintam wiyarnin cäsuyen. Pero gamcunaga Dios Yayapa mana carmi, Palabranta yachatsicur willacungätapis chasquiyämanquitsu.”

*Señor Jesucristoga unay Abrahampitapis mas puntantanam cargan*

<sup>48</sup> Tsaynam judiucuna niyargan: “Rasuncagllatam niyag: ¡Gamga Samaritäno runam canqui! ¡Gamga supayyog carmi, alläpana löcuyaycanqui!”

<sup>49</sup> Señor Jesucristonam contestargan: “Manam nogachöga ni ima supaypis cantsu. Nogaga imatapis rurä Taytäta respetarnin cäsurmi. Pero gamcunaga mana respetarmi chiquiyämanqui. <sup>50</sup> Nogaga manam runacuna respetayämänanta munartsu willacur puriyä. Aunqui Taytäga runacuna respetayämänanta munaptinpis, mana respetayämanganpitam Taytäga juzganga. <sup>51</sup> Rasuncagtam niyag: Llapan yachatsicungäcunata cäsurnin criyimacunaga Dios Yayawanmi cieluchö imayyagpis cawayanga.”

<sup>52</sup> Judiucunanam contestayargan: “¡Cananmi sïga rasumpa musayargö, supayyog cangayquita! Abrahamwan Dios Yayapa unay willacug profëtacunapis llapanmi

wañuyargan. Pero gamga ‘yachatsicungäta criyicur cäsucugcunaga manam ni imaypis wañuyangatsu’ niyämanqui. <sup>53</sup> ¿Acaso gamga unay awilücuna Abrahampita mascu canqui? Paypis wañushgam y Dios Yayapa unay willacug profëtancunapis llapanmi wañuyashgalla. ¿Gamga pï cangayquitanatan yarpanqui?”

<sup>54</sup> Señor Jesucristonam contestargan: “Si quiquilläpita aläbacuptiga, aläbacungäpis manam ni imapag välenmantsu. Pero nogata aläbamagniga quiquin Taytämi, gamcuna tsay ‘Diosni’ niyangayqui. <sup>55</sup> Gämuncunaga manam Taytä imanö canganta ni imata rurangantapis regeyanquitsu. Pero nogam sïga rasumpa regë. Si ‘manam regëtsu’ nirga, gamcunanollam llullacur mana allicunata parlaycäman. Rasumpa Taytäta regermi Pay nimanganllata cumplirnin imatapis ruraycä. <sup>56</sup> Unay aylluuyquicuna Abrahampis alläpam cushicurgan cay patsaman shamunäpag cangan junagta musyasquir. Tsay musyangantanö ricaycurmi alläpa cushicurgan.”

<sup>57</sup> Judiucunanam Señor Jesucristota niyargan: “¡Gamga manaragmi pitsga chunca (50) watayo-gragtsu canqui! Pero ¿imanötan Abrahamta regë niyämanqui?”

<sup>58</sup> Señor Jesucristonam contestargan: “Rasuncagtam niyag: ¡Manarag unay Abraham yuriptinmi, mas puntatana noga cä!”

<sup>59</sup> Tsaynam rumita achcurcur sagmayta munayaptin, Señor Jesucristoga runacunapa rurinpa päasquir, templupita aywacurgan.

**9**

*Señor Jesucristo cuticätsin, yuringanpitana gapra runata*

<sup>1</sup> Tsaypa päsaycarnam Señor Jesucristo ricaycurgan, yuringanpitana juc gapra runata. <sup>2</sup> Tsaynam discipuluncuna tapuyargan: “Maestru, ¿imanirtan cay runaga gapra yurishga? ¿Taytancunapa jutsancunapitacu o quiquinpa jutsanpitacu?”

<sup>3</sup> Señor Jesucristonam nirgan: “Manam quiquinpa ni taytancunapa jutsanpitatsu gapra yurishga. Sinöga nogá cuticätsiptí Dios Yaya poderoso canganta runacuna musyayänanpagmi tsaynö yurishga. <sup>4</sup> Tsaymi cay patsachö cangäyag cachamagni Dios Yaya munanganta rurashwan, imayca juc runa junagpa trabajangannö. Pero tutapasquiptinmi siña ni pipis trabajayannatsu mana ricayta puedir. <sup>5</sup> Tsaymi nogaga cay patsachö cangäyagga, imayca actsinö llapan runacunapag caycä.”

<sup>6</sup> Tsaynö nisquirnam patsaman togaycurnin getäta rurasquir gaprapa ñawinta llushircurgan. <sup>7</sup> Tsaypitnam nirgan: “Canan ayway Siloé niyan-  
gan pösuman ñawiquita mayllacamunayquipag.” (Siloé ninanga “Cachamushga” ninanmi cargan.)

Gapra runanam aywarnin mayllacascamur, ñawin allish ricarna cutiscamurgan. <sup>8</sup> Tsaynö ñawin sänutana ricarmi, vecinuncunawan limushnata mañacur canganta regegnincuna tapunacuyargan: “¿Cay runaga manacu imaypis jamaycur limushnata mañacug gapra?”

<sup>9</sup> Waquinnam niyargan: “Aumi, paymi cayga.”  
Waquinnam niyargan: “Manam paytsu, aunqui payricugcarpis.”

Pero quiquinnam nirgan: “Aumi. Nogam cä.”

<sup>10</sup> Tsaynam tapuyargan: “¿Imanötan cananga ñawiqui allishna rican?”

<sup>11</sup> Paynam contestargan: “Tsay ‘Jesús’ niyangan runam patsaman togaycur getäta rurasquir ñawiman llushircamurgan. Tsaypitanam ‘Siloé’ niyangan pösuman ñawita mayllanäpag mandamargan. Tsaychö ñawita mayllascamurmi cananga allishna ricällä.”

<sup>12</sup> Tsaypitanam tapuyargan: “¿Maychötan tsay runa caycan?”

Paynam nirgan: “Manam musyätsu.”

*Fariseocuna obligarnin tapuyan gapra canganpita cuticashga runata*

<sup>13</sup> Tsaypitanam tsay gapra canganpita cuticashga runata pushayargan fariseocunaman.

<sup>14</sup> Señor Jesucristo tsay gapra runapa ñawinta cuticätsinanpag getäta rurangan junagga sabado jamay junagmi cargan.

<sup>15</sup> Tsayman chaycatsiyaptinmi, imanöpa ñawin allishna ricanganta tapuyargan. Paynam contestargan: “Ñawiman getäta llushircamuptin mayllacusquirmi, cananga allishna ricä.”

<sup>16</sup> Waquincag fariseocunaman niyargan: “Tsay cuticätsignin runaga manam Dios Yaya cachamungantsu. Tsaymi sabado jamay junagtapis respentantsu.”

Pero waquincagnam niyargan: “¿Imanötan cayläya señal milagrutaga ruranman jutsasapa

caycarga?” Tsaynö mana entendinacur llapan mana acuerdu carmi, quiquincura pura raquicar,<sup>17</sup> unay gapra canganpita cuticashga runata yapay tapuyargan: “Gamga ¿pi cangantan yarpanqui tsay cuticätsishugniqui runapag?”

Paynam contestargan: “Nogalläpagga Dios Yayapa profëtanami.”

<sup>18</sup> Pero judiucunaga manam criiyita munayargantsu, gapra canganpita allishna ricanta. Tsaymi gapra canganpita cuticashga runapa taytantawan mamanta gayatsiyämur,<sup>19</sup> tapuyargan: “¿Caycu gamcunapa wamrayquicuna? ¿Rasumpacu gapra yuringan? ¿Imanöpatan canga allishna rican?”

<sup>20</sup> Tsaynam mamanwan taytan contestayargan: “Aumi. Payga nogacunapa wamräcumam. Rasumpam yuringanpita gapra cargan. <sup>21</sup> Pero manam musyayätsu imanöpa cuticanganta ni pi cuticätsingantapis. Payga yashga runanam. Quiquinta tapuyay rasuncagta willayäshunayquipag.”

<sup>22</sup> Taytanwan maman tsaynö niyargan judiucunapa autoridänicunapita mantsacurmi. Puntatam autoridäcuna willanacushga cayargan maygan runapis “Jesús Dios Yaya cachamungan Cristom” niggataga Dios Yayaman mañacuyänanpag goricäyänan wajipita gargasquir manana ni imaypis consentiyänanpag. <sup>23</sup> Tsayta mantsacurmi taytanwan mamanpis niyargan: “Payga yashga runanam. Quiquinta tapuyay.”

<sup>24</sup> Tsaynam gapra canganpita cuticashga runata judiucuna yapay gayascatsimur niyargan: “Rasumpacagta willayämay Dios Yaya

ricaycäshunquim. Cuticätsishugniqui Dios Yayata alabayga. Nogacuna musyayämi tsay runaga jutsasapa canganta.”<sup>25</sup>

<sup>25</sup> Paynam contestargan: “Nogaga manam musyatsu jutsasapa o mana jutsannag cangantapis. Pero imatam sığa musyä gapra cangäpita, cananga cuticashga allina ricangäta.”

<sup>26</sup> Yapaynam tapuyargan: “¿Imatatan rurashurgoyqui? ¿Imanötan ñawiqui ricänanpag cuticätsishurgoyqui?”

<sup>27</sup> Tsaynam contestargan: “¡Nogaga willayashcagnam, pero gamcunaga manam wiyyämanquitsu ni criyyämanquitsu! ¿Imanirtan alläpa tapupäyämanqui yapay yapay wiyyatcu munayanqui? ¿Gamcunapis Paypa gatirag discipulun caytacu munayanqui?”

<sup>28</sup> Tsaypitam insultarnin niyargan: “¡Gammi tsay runapa gatiragninga canqui! ¡Pero nogacunaga unay Moiséspa gatiragninmi cayä! <sup>29</sup> Nogacunag musyayämi unay Moisésta quiquin Dios Yaya parlapanganta. Pero tsay runapagga manam ni pí canganta ni maypita shamungantapis musyayätsu.”

<sup>30</sup> Tsay gapra canganpita cuticashga runanam contestargan: “¡Imanötan tsayga! Gamcunaga musyayanquitsu maypita shamungantapis, pero nogatam sığa ñawí allish ricänanpag cuticätsimashga. <sup>31</sup> Musyantsicmi jutsasapa runacunataga Dios Yaya mana wiyyanganta. Pero Pay munanganllata rurar mañacurnin adorayaptinmi sığa, rasumpa wiyan. <sup>32</sup> Manam ni pipagpis ni imaypis wiyashgatsu cantsic,

yuringanpitana gapra runata cuticätsinganta. <sup>33</sup> Si tsay runa Dios Yayapita mana shamushga carga, manam ni imata ruraytapis puedinmantsu.”

<sup>34</sup> Tsaymi autoridäcuna niyargan: “¡Gamga yuringayquipitanam alläpa lluta jutsasapa canqui! ¿Jinapis nogacunatam yachatsiyämaya munanqui?” Tsaynö nirmi, Dios Yayaman mañacuyänanpag goricäyänan wajipita gargooyargan manana ni imaypis cutinanpag.

*Shongoncunachö imayca gapranö mana criyicugcuna*

<sup>35</sup> Tsay cuticashga runata Dios Yayaman mañacuyänanpag goricäyänan wajipita gargooyantam Señor Jesucristo musyasquirgan. Tsaynam runata ashirnin tarisquir tapurgan: “¿Gamga criyinquicu Diospita Shamushga Runaman?”

<sup>36</sup> Paynam nirgan: “Señor, ¿pitan tsay runa? Willaycamay payman firmi criyicunäpag.”

<sup>37</sup> Señor Jesucristonam nirgan: “Gamga ricas-hcanquinam. Nogam rasumpa cä, gamwan parlaycag.”

<sup>38</sup> Tsaynam runaga Señor Jesucristopa puntan-man gongorpacuycur adorarnin nirgan: “Señor, criyillämi.”

<sup>39</sup> Señor Jesucristonam nirgan: “Nogam cay pat-saman shamushcä llapan runacunapa jutsancunata juzganäpag. Tsaynöllam shamushcä gapracunata ricätsirnin, allish ricagtucugcunataga imay gapramannö ticrananpag, chucru shongo cayan-ganpita.”

<sup>40</sup> Señor Jesucristo tsaynö ninganta wiyasquirnam, tsaychö waquincag fariseocuna niyargan: “¡Imanö! ¿Acäsu nogacunapis gapracu cayaä?”

<sup>41</sup> Señor Jesucristonam contestargan: “Aumi, rasumpa gapranö carga manam jutsayquicunapita culpayogtsu cayanquiman. Pero ‘allish ricä’ nirmi, gamcunaga jutsayquicunapita rasumpa culpayog cayanqui.”

## 10

### *Üsha mitsicugwan üshancuna*

<sup>1</sup> Tsaypitanam Señor Jesucristo nirgan: “Rasuncagtagam pipis gencha puncupa mana yaycurnin, jucläpa lätar genchaman yaycugcagga alläpa mana alli rurag suwam. <sup>2</sup> Pero gencha puncupa yaycugcagmi sığa, üshacunata rasumpa mitsicug. <sup>3</sup> Genchata täpag runa puncuta quichasquiptin, mitsicug runa genchaman yaycusquir llapan üshacunata shutinllapa gayan. Tsaynö gayaptinmi rasumpa vozninta wiyar genchapita llapan yargayämun. <sup>4</sup> Tsay genchapita wagtaman gargosquiptinnam, llapan üshancuna mitsigninpa gepanta gatirnin aywayan, ämunpa vozninta rasumpa regernin. <sup>5</sup> Pero mana rasumpa mitsignin canganta tantiyasquirmi sığa, vozninta mana reger geshpirlrin jucläpa aywacuyan.”

<sup>6</sup> Tsaynömi Señor Jesucristo yachatsicurgan üshaman iwalatsicurnin. Pero tsaychö caycag runacunaga manam tantiyawargantsu ni imapag parlar yachatsicungantapis.

*Señor Jesucristoga allish mitsicugmi*

<sup>7</sup> Tsaymi Señor Jesucristo yapay nirgan: “Caytaga rasumpacagtam niyag: Nogam üshacuna gaycuräyangán puncuga cä. <sup>8</sup> Tsay nogapita mas puntata shamugcag runacunaga, llapanpis mana alli rurag suwam cayashga. Pero üshacunaga manam cäsuyargantsu. <sup>9</sup> Nogam puncuga cä: Tsaymi pipis nogaman criyicurga genchaman üsha yaycungannö salvacashga cayanga. Tsay üsha alli gewata taringannömi, yaycur yargorpis mushog cawayta tariyanga. <sup>10</sup> Suwagam shamun suwarnin wañutsir ushacätsinanpag. Pero nogam sığa shamushcä llapan runacuna cay patsachö y janag patsachöpis allicag mushog cawayta tariyaptin cushishga atsca cayäpunanpag.

<sup>11</sup> “Nogam rasumpa alli mitsicugga cä. Rasumpa alli mitsicugga, quiquinpa cawaynintapis perdenmanmi üshancuna jananga. <sup>12</sup> Págallapag mitsipucugcagmi sığa, atog shamuycagta ricasquirpis, üshacunata dëjasquir geshpirlin aywacun, mana rasumpa ämun car. Tsaynö jagesquiptinmi atog üshacunaman chaycur, wacpa caypa gaticachaptin geshpirlin witsicar aywacuyan. <sup>13</sup> Tsaynö runaga geshpin págayänanllapag yarpacurmi, manam üshacunapagga ni imapis gocuntsu.

<sup>14</sup> “Nogam rasumpa alli mitsicugga cä. Tsaymi üshäcunata rasumpa regë y üshäcunanan nogatapis regeyäman. <sup>15</sup> Tsaynöllam Taytä nogata regemangannö nogapis rasumpa regë. Tsaynöpam nogaga üshäcunaraycu jina wañushagpis. <sup>16</sup> Tsaynöllam capaman cay genchapita juclächöpis üshäcuna, tsay

üshäcunatapis cay genchamanmi llapanta gorimushag. Tsaynö maytsaypita goricascamupti voznüta wiyar cäsuyämaptinmi, juc genchalla y juc mitsicuglla canga.

**17** “Taytämi alläpa cuyaman llapan üshanö runacunaraycu wañuptipis, cawaynii yapay garamänanpag. **18** Manam ni pipis cawaynitäga gechumanmantsu, sinöga llapan runacunata cuyar quiqui munaptümi chiquimagnicunapis wañutsiyämanga. Puedimi cawaynitä llapan runacunapag entregacuya y wañusquir cawamuytapis. Rasumpa caynö cananpagmi Taytä mandamargan.”

**19** Judiucuna Señor Jesucristo tsaynö parlanganta wiyaycurnam yapay raquicäyargan. **20** Tsaychö atscag caycagcunam niyargan: “¿Imanirtan cäsuyanqui supayyog car, löguyäshga caycaptin?”

**21** Pero waquinacagnam niyargan: “Manam ni pipis shongonchö rasumpa supay captina caynö parlanmantu. ¿Acäsu juc supayga gapracunata cuticätsir allishcu ricätsinman?”

*Señor Jesucristota judiucuna mana criyirnin rechazayan*

**22** Jerusalén marcachönam tamya witsan, templuchö mana allicunata rurayanganpita limpiayangan fiestata ruraycäyargan. **23** Templuchö caycarnam, Señor Jesucristo puriy-cargan Salomón ningan corredorchö. **24** Tsaynam judiucuna Señor Jesucristota cunchawasquir tapuyargan: “¿Imayyagtan shuyarätsiyämanqui

rasumpacagta willayämänayquipag? Dios Yaya cachamungan Cristo carga sas juclla willayämay.”

<sup>25</sup> Señor Jesucristonam contestargan: “Unaynam gamcunataga willayashcag. Pero gamcunaga manam criiyämanquitsu. Tsaynöllam Taytäpa poderninwan llapan imayca milagrucuna rurangäta ricaycarpis criiyämanquitsu. <sup>26</sup> Pero gamcunaga manam criiyämanquitsu, mana üshäcuna car. <sup>27</sup> Üshäcuna vozniña regeyämaptinmi, nogapis regë. Tsaymi paycunaga nogata gatiräyäman. <sup>28</sup> Nogaga mana ushacag cawaytam llapan üshacunata garashag. Tsaymi ni imaypis asipäggä ogracarnin wañuyangatsu ni pipis gechumayta pueingatsu. <sup>29</sup> Taytä imayca üshacunatanö llapan criyicug runäcuna garamagga llapanpitapis mas poderösom. Tsaymi ni pipis Taytä cuidangantaga gechuyninta pueintsu. <sup>30</sup> Taytawan nogaga ishcäcunam juc persönnalla cayä.”

<sup>31</sup> Tsaynö niptinnam judiucuna yapay rumita aptarcäriyargan Señor Jesucristota sagmayänanpag. <sup>32</sup> Pero Señor Jesucristonam nirgan: “Taytäpa poderninwan allicunallata rurarmi, atsca cuti milagrucunata puntayquicunachö rurargö. ¿Maygan milagru rurangäpitatan sagmayta munayämämanqui?”

<sup>33</sup> Judiucunanam contestayargan: “Manam milagrucunata rurangayquipitatsu sagmayta munayag. Sinöga quiquirim Dios Yayapa contran mana allicunata parlaycanqui. Gamga juc runalla caycarmi, rasumpa ‘Diosmi cä’ nicanqui.”

<sup>34</sup> Señor Jesucristonam nirgan: “Gamcunapa

leyniquicunachömi gellgashga caycan:  
 ‘Gamcunatam niyag, dioscunam cayanqui.’<sup>35</sup>

<sup>35</sup> Musyantsicmi Diospa Palabran gellgash-gachötaga. Manam négayta puedintsictsu, tsay runacunaman quiquinpa Palabranta willacur, quiquin Dios Yaya gamcunaga ‘dioscunam cayanqui’ ninganta. <sup>36</sup> Si quiquin Dios Yaya raquimarni cay munduman cachamashga caycaptinga, ñimanirtan yarpäyanqui ‘Diospa Tsurinmi cä’ niyangagwan Paypa contran parlangäta? <sup>37</sup> Si noga Taytä munangannö imaycatapis mana ruraptiga, manam criiyämanquitsu. <sup>38</sup> Pero Taytä munangannölla rurar willacupti mana criiyämarpis, milagrucuna rurangäta ricarllapis criiyay. Tsaynö rurangäta ricarmi yachacurnin musyayanqui, Taytä nogachö rasumpa canganta y nogapis paywan juc persónalla caycangäta.”

<sup>39</sup> Tsaychömi yapay prësu achcuya munayargan. Pero Señor Jesucristoga geshpipusquirnincunam aywacurgan.

<sup>40</sup> Tsaypitanam Señor Jesucristo Jordan mayupa wac tsimpanman cutisquir, tsay sitiuchö Juan Bautista mas puntatana runacunata bautizarganchö pärargan. <sup>41</sup> Tsaymannam maytsicag runacuna ricagnin aywar niyargan: “Rasumpam Juan Bautistaga mana milagrucunata ruraycarpis, cay runapag llapan willacunganga rasuncagilla canag.”

<sup>42</sup> Tsaychö atscag runacunam Señor Jesucristo, Dios Yaya cachamungan salvacug canganta criiyargan.

---

<sup>35</sup> 10:34 Sal 82:6.

# 11

*Señor Jesucristopa amígón Lazaro wañungan*

<sup>1</sup> Juc runam Lazaro shutiyog alläpa antsa geshyaycargan Betania marcachö, Maríapawan Martapa turincuna. <sup>2</sup> Tsay antsa geshyaycag Lazaropa panin Maríam Señor Jesucristopa chaquinman mushcug perfümita wiñarcur agtsanwan pitsar tsaquitsirgan. <sup>3</sup> Lazaropa panincunam juc runata cachacuyargan Señor Jesucristota: “Señor, cuyay amígoyquim antsa geshyaycan” ninanpag.

<sup>4</sup> Tsayta wiyarmi Señor Jesucristo nirgan: “Tsay geshyaywanga manam wañungatsu. Tsay geshyayga tsarishga Dios Yaya poderoso cangantawan Tsurinpís rasumpa poderoso canganta musyayänanpagmi.”

<sup>5</sup> Aunqui Señor Jesucristo Lazarota y ishcan panincuna Maríatatawan Martata alläpa cuyaycarpis, <sup>6</sup> Lazaro alläpa antsa geshyaycangata willaycuyaptin, ishcay junag masran tsay caycanganllachö quëdargan. <sup>7</sup> Tsaypitaramgi discipuluncunata nirgan: “Acu, yapay Judea provinciaman cutishun” nir.

<sup>8</sup> Discipuluncunanam niyargan: “Pero Maestru, tsay sitiucunachöga ganyancunallaragtsag judiucuna sagmar wañutsiyniquita munayargan ¿Tsayño caycaptincu, gamga yapay tsaypa cutiyta munaycanqui?”

<sup>9</sup> Señor Jesucristonam nirgan: “¿Juc junagga manacu chunca ishcay örayog? Tsaymi pipis junagpa purirga trompesar ishquntsictsu, cay mundu allish atsicyaptin. <sup>10</sup> Pero tutapaypa

purirmi siña, trompesarnin tacacur ishquin mana actsi captin.”

<sup>11</sup> Yapaynam Señor Jesucristo nirgan: “Amígontsic Lazarom puñucashga caycan, pero aywā riccharcatsimushag.”

<sup>12</sup> Discípuluncunananam niyargan: “Señor, si puñucashgalla caycarga, rasumpam cuticämunga.”

<sup>13</sup> Señor Jesucristoga Lazaro wañushgana canganta musyarmi, discípuluncunata tsaynö “puñucashgallam caycan” nirgan. Pero discípuluncunaga mana tantiyayarmi, rasumpa puñucashgalla canganta yarpäyargan.

<sup>14</sup> Tsaynam Señor Jesucristo rasuncagta nirgan: “Lazaroga wañushgam. <sup>15</sup> Cushicümi tsaychö mana cangäta. Tsaynömi mas alli caycan gamcuna, rasumpa criiyänayquipag. Pero acu aywashun ricänapag.”

<sup>16</sup> Tsaynam “Millishu” niyangan Tomas discípulumajincunata nirgan: “Acu nogantsicpis Señor Jesucristowan pagta wañuna captinpis.”

### *Señor Jesucristoga, cawatsicug cawaymi*

<sup>17</sup> Tsayman chaycunam Señor Jesucristo tarirgan, Lazarota pampayan chuscu junagna päsashga canganta. <sup>18</sup> Betaniaga cargan quimsa (3) kilómetroschömi Jerusalénpita. <sup>19</sup> Tsaynö amänolla captinmi, atscag judiucuna Maríapawan Martapa turin wañushga captin shogarnin compañag aywashga cayargan. <sup>20</sup> Martanam Señor Jesucristo chaycanganta musyasquirnin tincug yargosquir aywargan. Pero ñañañ Maríaga wajichömi quëdargan. <sup>21</sup> Martanam tincusquir Señor Jesucristota nirgan: “Señor, caychö

captiquiga turillä manam wañunmantsu cargan.  
**22** Pero nogaga musyämi, cananpis llapan imayca mañangayquita Dios Yayaga rurananpagcagta.”

**23** Señor Jesucristonam contestargan: “Turiqiga cawamungam.”

**24** Martanam nirgan: “Aumi, rasumpam musyä cay patsa ushacangan junag llapan wañushgacuna cawayämuptin, turilläpis cawamunanpag canganta.”

**25** Tsaynam Señor Jesucristo nirgan: “Nogam wañushgacunata cawatsimurnin cawayga cä. Tsaymi pipis nogaman rasumpa firmi criyicurga, wañurpis cawamungalla. **26** Tsaynöllam llapan cawaycagcunapis, nogaman rasumpa firmi criyicamurga manam ni imaypis wañuyangatsu. ¿Cayta criyinqui Marta?”

**27** Paynam nirgan: “Aumi, Señor. Nogaga rasumpam criyï gam Cristo Diospa Tsurin, cay munduman shamugpagcag cangayquita.”

*Señor Jesucristo wagargan Lazarota pampayan sepultüra lädunchö*

**28** Tsaynö nisquirnam, Marta aywargan ñañan Mariata gayag. Gayasquirnam pacayllpa nirgan: “Maestrum cayman chamushga gayashunqui.”

**29** Tsaynö niptinnam Mariaga saslla sharcurnin Señor Jesucristo caycanganman ricag aywargan.

**30** Señor Jesucristoga manaragmi tsay marcamanga yaycushgaragtsu cargan, sinöga Martawan tincuyanganllachörägmi caycargan.

**31** Tsaynö María sas sharcurnin aywagta ricarmi, tsay judiucuna wajichö pagtan compañar

caycagcuna gepanta gatir aywayargan, “Turin pamparanganmanchari wagag aywan.”

<sup>32</sup> Marínam Señor Jesucristo caycanganman chaycurnin chaquin puntanman gongoricuycur nirgan: “Señor, si gam caychö captiquiga turillä manam wañunmansu cargan.”

<sup>33</sup> Tsaynam Mariatawan compaÑagnin judiucuna llaquishga wagagta ricaycur, Señor Jesucristopis shonganchö yarpachacurnin alläpa llaquishga, <sup>34</sup> tapurgan: “¿Maymantan pampayashcanqui?” Tsaynam niyargan: “Señor, shamuy ricätsiyashayqui”

<sup>35</sup> Tsaynam Señor Jesucristopis wagargan.

<sup>36</sup> Judiucunanam tsaynöta ricar niyargan: “¡Ricäyay alläpam cuyanag!” <sup>37</sup> Pero waquincagnam niyargan: “Manacu cay runaga gapratapis cuticatsirgan. Tsayga ¿manatsurag imallatapis ruranman cargan Lazaro mana wañunanpag?”

### *Señor Jesucristo Lazarota cawatsimungan*

<sup>38</sup> Señor Jesucristonam yapay alläpa llaquishga Lazaropa pamparanganman witiycurgan. Tsay sepultüra gagachö uchushga machay captinmi, puncunpis juc jatun parara rumiwan tsapashga cargan. <sup>39</sup> Señor Jesucristonam nirgan: “Rumita jipiyay.”

Tsay wañushga Lazaropa panin Martanam nirgan: “Pero Señor, cananyagga asyashganach chuscu junagnam wañungan.”

<sup>40</sup> Señor Jesucristonam contestargan: “¿Manacu nirgog, si rasumpa firmi criyicurga Dios

Yayapa poderninwan juc jatun milagruta ricäyänayquipag?"

**41** Rumita jipisquiyaptinnam, Señor Jesucristo cieluman ricarcur nirgan: "Taytallay, allápam agradëcicug, rasumpa wiyamangayquita.

**42** Musyämi imaypis wiyamangayquita, pero caynöga mañacug caychö caycag runacuna, gam cachamangayquita rasumpa criiyänanpagmi."

**43** Tsayta nisquirnam, jinchi gayacurgan: "¡Lazaro, tsaypita yargamuy!"

**44** Tsaynam wañushga yargascamurgan, maquinwan chaquin pitushga y gagllanpis alli wancupäcushga. Señor Jesucristonam nirgan: "Pascasquir, dëjayay aywacunananpag."

*Señor Jesucristota presu achcusquir  
wañutsiyänanpag yachatsinacuyan*

*(Mateo 26:1-5; Marcos 14:1-2; Lucas 22:1-2)*

**45** Tsayño Lazarota cawatsinganta ricarmi, Mariata compañagnin aywashga judiucunapis atscag criyicuyargan, Dios Yaya Señor Jesucristota cay patsaman cachamunganta.

**46** Pero waquincagnam fariseocunaman aywaycur willapäyargan wañunganpita Lazarota Señor Jesucristo cawatsimunganta.

**47** Tsayta musyasquirnam sacerdöticunapa mandagnincunawan fariseocuna y judiucunapa autoridänincunata gayascatsirnin secionta rurar niyargan: "¿Imatatan rurashun? ¡Tsay runaga tucuyläya milagrucunata rurarmi caycan!

**48** Si dëjaycushgaga llapan runacunam payman criiyiyanga. Tsaynam Romachö mandacug

autoridäcuna shamuycur, templuntsictawan naciunnintsictapis jancat ushacätsiyanga.”

**49** Pero jucnin sacerdöti llapan sacerdöticunata mandagnin Caifas shutiyog tsay watachö mas mandacuyyog carmi nirgan: “¡Gmcunaga manam ni imata musyayanquitsu, **50** ni siquiera tantiyayanquillapistsu! Mas mejormi canman juc runalla wañuptin, cay llapan naciunnintsic jancat ushacangampita.”

**51** Pero Caifasga manam cayta quiquinpa yarpayllanpitatsu nirgan. Sinöga tsay wata mas mandacug sacerdöti carmi, Dios Yaya tantiyatsiptin parlargan llapan Judea naciunchö runacunaraycu Señor Jesucristo wañunanpag canganta. **52** Y manam tsay Judea naciunllapagtsu, sinöga Dios Yayaman llapan criyicug runacunata maytsay munduchö witsicashga caycagcunata juclayllaman gorinanpag. **53** Tsayönümi tsay junagpita judiucunapa autoridäcuna acueduta rurayargan, Señor Jesucristota wañutsiyänanpag.

**54** Tsaymi tsay junagpita Señor Jesucristo manana purigantsu judiucuna ricänanchöga. Tsaynöpam Judea provinciapita yargsosquir aywacurgan mana runacuna täcuyangan tsunya cercanchö Efrain niyangan marcaman. Tsaychömi discipuluncunawan cayargan.

**55** Ichicllanam faltaycargan judiucunapa Pascua fiestancuna chämuptin, maytsay estanciaunapita maytsicag runacuna Jerusalénman aywar, Pascua fiestata celebrar jutsancunapita perdonta mañacur mayllacurnin cayänanpag. **56** Tsaynam Señor Jesucristota

ashirnin purir, templuchö quiquinçunapura tapunacuyargan: “Gamcunaga ¿imatatan yarpäyanqui? ¿Cay fiestaman shamungatsurag o manatsurag?”

<sup>57</sup> Pero fariseocunawan sacerdöticunapa mandagnincunam runacunata mandar niyargan: “Si pipis Jesústa maychöpis ricarga, saslla willayämanqui prësu achcusquir apayämunäpag.”

## 12

*Señor Jesucristopa umanman juc warmi mushcug perfumita wiñangan*

<sup>1</sup> Pascua fiestapag sogta junagllana faltay-captinmi, Señor Jesucristo Betania marcaman aywargan. Tsay marcachömi wañunganpita cawatsimungan Lazaro täcurgan. <sup>2</sup> Tsayman Señor Jesucristo chaycuptin cushicuypitam, alli micuycunata cocinapacuyargan llapan invitäduncunawan micupacuyänanpag. Tsayman Marta servicuptin turin Lazaropis mësachö jamagcunawan pagta micuycargan. <sup>3</sup> Tsaynö llapan micupacuycäyaptinnam, Maríaga alläpa chaniyog juc frascu perfumínwan witiycurgan. Tsay perfümiga nardo ninganpita pürum cargan. Tsaypitam Señor Jesucristopa chaquinman wiñarcur agtsanwan pitsar tsaquitsirgan. Tsay perfümiga, waji juntam alläpa shumag mushcurgan. <sup>4</sup> Pero tsayta ricaycurmi Señor Jesucristota traicionarnin chiquignincunaman entregananpagcag discipulun Judás Iscariote piñacur nirgan: <sup>5</sup> “¿Imanirtan cay perfumita mana ranticurgontsictsu, juc wata mas

aruypa chanin gellaywan wactsacunata yanapanapag?”<sup>6</sup> Pero Judásga manam wactsacunata rasumpa yanapananpag yarpartsu nirgan. Sinöga discipulumajincunawan churarnin goricuyangan gellayta tsarag car, quiquin suwacur buyllúcunanraycum.

<sup>7</sup> Señor Jesucristonam nirgan: “Déjacyu, cay perfümitaga churarätsishga pampayämänam junagpagmi. <sup>8</sup> Wactsacunaga imayyagpis pagtayquicunam caycäyanga. Pero nogam siga gamcunawan pagtaga cashagnatsu.”

### *Lazarota wañutsiyta munayan*

<sup>9</sup> Tsaynam Betaniachö Señor Jesucristo caycanganta judiucuna musyasquir, ricagnin aywayargan. Manam Señor Jesucristota ricagllatsu aywayargan, sinöga wañushgapita cawatsimungan Lazarotapis ricagmi aywayargan. <sup>10</sup> Tsaychönam sacerdöticunapa mandagnincuna, Lazarotapis wañutsiyänanpag acuerduta rurayargan. <sup>11</sup> Lazarota cawatsimunganpitam atscag judiucuna Señor Jesucristoman rasumpa criyicurnin, autoridäcunapita raquicäyargan.

*Señor Jesucristo Jerusalénman yaycun maytsicag runacunawan*  
(Mateo 21:1-11; Marcos 11:1-11; Lucas 19:28-40)

<sup>12</sup> Maytsicag runacunam Jerusalénchö Pascua fiestaman aywashga cargan. Tsay waränin allegnam musyasquiyargan, Señor Jesucristopis tsay fiestaman shamuycanganta. <sup>13</sup> Tsaynam palmerapa rämanta wallusquir aptarcurnin, Señor Jesucristota tincugnin gayaycachar aywarnin

niyargan: “¡Canan salvaycayällämäy! ¡Alläpa cusicuypagmi Dios Yayapa shutinchö Shamug Runa, Israelpuna mandacug reynin!”<sup>13</sup>

**14** Señor Jesucristoga juc mallwa ashnuta tarisquirmi montarcur, Jerusalénman yaycurgan Diospa Palabran gellgashgachö ningannömi cargan:

**15** “Ama mantsacaytsu Sión Marca.  
Ricay mallwa ashnun montashga,  
Reyniquicuna shamuycagta.”<sup>15</sup>

**16** Señor Jesucristo Jerusalénman ashnun montashga yacuptimmi, discipuluncunaga tantiyayargantsu ni imapag tsaynö ruraycangantapis. Wañunganpita cawascamur cieluman aywacuptinragmi, rasumpa musyayargan Señor Jesucristo rurangancuna Diospa Palabran gellgashgachö Paypag rasumpa canganta.

**17** Pero maytsicag runacuna Señor Jesucristopa pagtan aywarmi, Lazarota gayarnin cawatsimunganta ricashga car, llapan ricäyanganta parlapacuyargan. **18** Tsaymi maytsicag alläpa cushima Señor Jesucristota tincugnин shayämurgan, milagru ruranganta musyashga car. **19** Pero fariseocunananam quiyuincuna pura jucnin jucnin ninacuyargan: “Gamicuna ricäyangayquinöpis, tsaynöga manam ni imanayta puedishuntsu. Ricäyay illapan runacunananam gatirnin paywan pagta aywayan!”

*Señor Jesucristota Griego naciunpita runacuna  
ashiyan*

---

<sup>13</sup> **12:13** Sal 118:25-26. <sup>15</sup> **12:15** Zac 9:9.

<sup>20</sup> Jerusalénchö Pascua fiestaman Dios Yayata adorag maytsay naciuncunapita shayämugcunawanmi, Grecia naciunpita runacunapis caycäyargan. <sup>21</sup> Paycunam Galilea provinciachö Betsaida marcapita Felipeman aywaycur rugarnin niyargan: “Señor, tsay Jesústam regeyta munayä.” <sup>22</sup> Felipenam Andrésta willargan. Tsaynam ishcan Señor Jesucristota willagnin aywayargan. <sup>23</sup> Tsaynam Señor Jesucristo nirgan: “Öra chämushganam maytsay naciunchö runacuna Diospa Tsurin poderöso cangäta musyayänanpag. <sup>24</sup> Rasuncagtam niyag: Si juc trigu allpaman shicwar mana wañurga, imaypis juc gränullam canga. Pero allpaman pampasquishga wañusquirnin jegamurmi sığa, alläpa atsca coséchata wayun. <sup>25</sup> Si pipis cay patsachö cawayllanta alläpa cuyarga, imaypis ograngam. Pero cawayninta mana alläpa llaquirnin Dios Yaya munanganno cawagcagmi sığa, mana ushacag caway gloriapag catsinga. <sup>26</sup> Si mayganpis servimayta munarga, rasumpa gatirämantsun; noga maychöpis cangächömi tsay servimar gatirämagnipis canga. Si maygallanpis servimaptinga quiquin Taytämi cushishga aläbanga.

*Señor Jesucristo willacun wañutsiyänanpag cangkanata*

<sup>27</sup> “¡Cananmi alläpa mantsacaypag llaquicuy tsariman! ¿Imanishagrag? ¿Nishagchi: Taytay, cay alläpa mantsacaypa llaquicuypita libraycamay? ¡Pero nogaga caynö päsamänanpagmi cay

patsaman shamushcä! <sup>28</sup> ¡Taytay, poderöso cuyay respetashga shutiquita musyatsicuy!”

Tsaynam cielupita juc voz caynö nimugta wiwayargan: “Llapan runacunatanam musyatsicushcä, pero cananmi yapay musyatsicushag.”

<sup>29</sup> Tsaychö caycag runacuna wiyarmi: “Magaca-mushgam nipacuyargan.” Pero waquincagnam: “Juc poderöso angelmi parlapämushga” niryargan.

<sup>30</sup> Tsaynam Señor Jesucristo nirgan: “Manam nogapagtsu tsay voz wiwayangayqui, mas bien gamcunapagmi tsaytaga wiyayargoyqui. <sup>31</sup> Canan öram cay munduchö llapan runacuna juzgashga cayanga. Tsaynöllam cay munduchö imayca mana allita mandacur ruratsicug Supaypis gargonshga canga. <sup>32</sup> Pero cruzman clävarnin wañuscatsir pampayämangapita sharcamurmi, entëru munduchö llapan runacuna nogaman criyicuyänanpag gorimushag.”

<sup>33</sup> Caycunawanmi entenditsicurgan Señor Jesucristo imanö wañunanpaga canganta.

<sup>34</sup> Tsaynam runacuna contestayargan: “Leynintsicmi musyatsimantsic, Diospita Shamushga Cristoga imayyagpis cawananpag canganta. Pero tsayga ¿imanötan gamga altupa pallarirmi cruzchö wañutsiyämanga ninqui? Tsaypungan ¿Maytan Diospita Shamushga Runaga?”

<sup>35</sup> Señor Jesucristonam nirgan: “Gam-cunachöllaragmi tsay actsiga caycanga; pero pöcu tiempullanam canga. Ayway gamcunachö tsay actsi canganyag, tutapay mana achcuyäshunayquipag. Tutapaychö purigcagga

manam musyantsu ni maypa aywangantapis.  
**36** Rasumpa criyicuyay tsay actsi gamcunachö canganyag. Tsaynöpa imayca actsichönö cushishga shumag cawacuyänayquipag.” Tsaycuna llapanta parlasquirnam, Señor Jesucristoga paycunapita tsincarnin aywacurgan.

*Judiucuna Señor Jesucristoman mana criiyangan*

**37** Señor Jesucristo llapanpa puntancunachö tucuyläya milagrucuna ruranganta ricaycarpis, criiyita manam munayargantsu. **38** Tsaynömi cumplinan cargan Dios Yayapa unay proféstan Isaías gellganganchö:

“Señor, ¿pitan criyishga willacuynintsicta?  
 ¿Pitatan Dios Yaya poderninta regetsishga?”<sup>◇</sup>

**39** Tsaynö criiyita mana puediyänanpagmi, unay proféta Isaíasga masta gellgargan:

**40** “Dios Yayam ñawincunata wichgashga, mas chucru shongoman tictratsir, yarpaynincunatapis mana musyag upaman tictratsishga.

Mana ricayta pueadirnin, ni imatapis mana entendiyänanpag.

Nogaman manana cutiyämunanpag, ni nogapis paycunata manana cuticätsinäpag.”<sup>◇</sup>

**41** Isaíasmi tsaynö nirgan, Señor Jesucristo alläpa shumag poderöso canganta ricashga car, Paypag parlarnin.

**42** Tsaynö caycaptinpis maytsicag judiucunam Señor Jesucristoman criyicuyargan. Tsaynöllam waquincag mas importanti mandacug

<sup>◇</sup> **12:38** Is 53:1. <sup>◇</sup> **12:40** Is 6:10.

runacunapis chasquirnin criyyiyargan. Pero manam llapan runacunapa puntanchöga criyicuyangata parlayargantsu, fariseocunapa autoridänincuna Dios Yayaman mañacuyänanpag goricäyänan wajipita, mana mas cutinanpag gargoyänanta mantsacur. <sup>43</sup> Judiucunaga runacuna aläbayänantam mas munayargan, Dios Yaya aläbanantaga manam valorayargantsu.

*Señor Jesucristom yachatsicuyninwan llapan runacunata juzganga*

<sup>44</sup> Tsaynam Señor Jesucristo jinchicuycur nirgan: “Si nogaman rasumpa criyicurga manam nogallamantsu criyicuyan, sinöga cachamagni Taytämanpismi. <sup>45</sup> Nogata ricarnin regemar chasquimagicagga cachamagi, Taytätapismi regernin chasquin. <sup>46</sup> Cay mundupag imayca actsinö carmi, nogaga cay patsaman shamushcä llapan runacuna mana tutapaychönö cayänanpag. <sup>47</sup> Pero pipis nogapa yachatsicuynita wiaycar mana cäsucuptinga, manam nogatsu tsay runata juzgarnin condenashag. Nogaga manam cay patsaman shamushcä runacunata juzgarnin condenagtsu, sinöga llapan runacunata salvanäpagmi. <sup>48</sup> Si pipis nogata despreciamar willacuynita mana casucug runapaga, juc condenagninmi can. Tsay llapan yachatsicuyniçunallam tsay runataga condenanga cay patsa ushacan junagchö. <sup>49</sup> Nogaga manam quiquípa munaylläpitatsu yachatsicü, sinöga cachamagni Taytämi mandamashga imatapis Pay munangannölla willacurnin imanö yachatsicunäpagpis. <sup>50</sup> Nogam rasumpa musyä,

Taytäpa mandacuyninga mana ushacag cawayta tariyänanpag canganta. Tsaymi nogaga imatapis parlarnin willacü, Taytä mandamanganllata.”

## 13

*Señor Jesucristo alläpa cuyarnin discipuluncunapa chaquinta mayllan*

<sup>1</sup> Pascua fiestapag juc junagllana faltaycaptinmi, Señor Jesucristoga musyarganna cay patsata dëjasquir Taytanwan pagta cananpag cuticunan canganta. Payga payman llapan criyicugcunatam alläpa cuyarnin, asta ushacanganyagpis tsaynölla cuyanga.

<sup>2</sup> Meriendata micuyänanpagmi traicionarnin ranticunapag Supayga Simón Iscariotepa tsurin Judástapa shongonman yaycushgana cargan, tsay pagas Señor Jesucristota chiquignincunaman entregananpag. <sup>3</sup> Señor Jesucristoga musyarganmi Taytan llapan poderninta entregashga captin, Paypita shamungantawan Payllaman cutinanpag cangantapis. <sup>4</sup> Tsaynam mësachö meriendar jamaycanganpita sharcur, mantunta llushtisquir tsegllanman towällata watargan. <sup>5</sup> Tsaypitanam juc tänaman yacuta wiñarcur, discipuluncunapa chaquinta mayllasquir, tsegllanman watangan towällawan tsaquitsirgan.

<sup>6</sup> Chaquinta mayllananpag caycaptinnam, Simón Pedro nirgan: “Señor, ¿gamcu nogapa chaquïta mayllamunqui?”

<sup>7</sup> Señor Jesucristonam nirgan: “Cananga manam entendinquisu caynö ruraycangäta, pero tsaypitam sïga entendinqui.”

<sup>8</sup> Simón Pedronam nirgan: “Manam ni imaypis chaquïta mayllamunayquitaga dëjashayquitsu.”

Señor Jesucristonam nirgan: “Si chaquiquita mana mayllamuptïga, manam nogapa cayta pued-inquitsu.”

<sup>9</sup> Simón Pedronam nirgan: “¡Señor, tsaypunga ama chaquillätaga mayllamuytsu, sinöga maquïtawan umätaapis mayllascallämuy!”

<sup>10</sup> Pero Señor Jesucristonam contestargan: “Tsayrag armacushga caycagcunaga, chaquinllatanam mayllayta wanana, llapan cerpun limpiu captin. Tsaymi gamcunaga limpiu caycäyanqui, jucniqui mana limpiu carpis.” <sup>11</sup> Jesúsga tsaynö nirgan: “Manam llapayquitsu limpiu caycäyanqui” nir, juccag discipulun traicionarnin ranticunanpag canganta musyar.

<sup>12</sup> Llaparpa chaquincunata mayllar ushasquirnam, llushtingan mantunta shucucurcur yapay jamaycur nirgan: “¿Gamcunaga entendiyänquicu imata rurangäta?

<sup>13</sup> Gamcunaga ‘Maestru’ y ‘Señor’ rasuncagtam niyämangayqui, rasumpa niyangayquinöllam cä.

<sup>14</sup> Tsaymi si noga Maestru y Señor caycarpis cuyayarniqui chaquiquicunata mayllamurgö; tsaynölla gamcunapis jucniqui jucniquipa chaquiquicunata mayllapunacuyay. <sup>15</sup> Juc

ejempluwanmi yachatsiyargog, gamcunapis noga rurangänölla rurayänayquipag. <sup>16</sup> Rasuncagtan

niyag: Manam ni mayga servicugpis patronninpita masga canmantsu. Tsaynöllam maygan mandashgapis mandagninpita masga

canmantsu. <sup>17</sup> Si caycunata entendir rasumpa cumplirgan, alläpa cushishgam cawacuyanqui.

*Señor Jesucristo willacun Judás Iscariote traicionar ranticunananpag canganta*

<sup>18</sup> “Manam llapayquicunapagtsu nogaga parlaycä; musyämi picunata nogaa rasumpa acrangäta. Pero rasumpam cumplinga Diospa Palabran gellgashgachö ningan: ‘Nogawan pagta micuycag runam, conträ ticrashga.’<sup>18</sup> <sup>19</sup> Caytam canan gamcuna rasumpa tantiyayänayquipay niyag, llapan caycuna päsasquiptin nogaa rasumpacag quiqiü cangäta musyayänayquipag. <sup>20</sup> Rasuncagtam niyag: Si pipis nogaa mandangäta chasquirga, nogatapis rasumpam chasquiyäman. Noga chasquimarga mandamagnítapis rasumpam chasquiyan.”

*Señor Jesucristo willacun juccag discípulun traicionananpag canganta*

(Mateo 26:20-25; Marcos 14:17-21; Lucas 22:21-23)

<sup>21</sup> Tsaycunata parlar ushasquirnam, Señor Jesucristo shongonchö alläpa llaquicurnin yarpachacur yapay nirgan: “Rasuncagtam niyag: Gamcunachö caycagpita jucniquim traicionayämanqui.”

<sup>22</sup> Tsaynam discípuluncuna quiquincura pura ricaränacuyargan ni mayganpag parlaycanganta mana musyarnin. <sup>23</sup> Tsaychönám Señor Jesucristo cuyangancag discípulunpis, lädunchö meriendarnin jamaycargan. <sup>24</sup> Simón Pedronam

---

<sup>18</sup> **13:18** Sal 41:9.

señasllapa nirgan, pipag parlaycanganta tapunapag. <sup>25</sup> Paynam Señor Jesucristoman mas witiycur tapurgan: “Señor, ¿Maygantan tsay traicionashugniquiga?”

<sup>26</sup> Señor Jesucristonam contestargan: “Tantata tullpurcur garangäcagmi, tsay traicionamagni runaga.” Tsaynö nisquirnam tantata tullpurcur Simón Iscariotepa tsurin Judásta garargan. <sup>27</sup> Tsay tantata chasquingan öram, Judáspa shongonman Supay yaycurgan. Tsaymi Señor Jesucristo Judásta nirgan: “Ruranayquipag yarpangayquita sas ruray.”

<sup>28</sup> Pero manam ni mayganpis mësachö meriendar jamaycagcunaga ni jucta entendiayargantsu ni imapag tsaynö ningantapis. <sup>29</sup> Discipulumajincunawan goriyangan gellayta tsarag captinmi, waquincagga yarpäyargan fiestapag imallatapis rantipacamug Judásta mandanganta. Y waquincagcunananam yarpäyargan wactsacunata yanapananpag mandanganta.

<sup>30</sup> Tsaynö tantata chasquisquirnin micur ushasquirmi, jina öra aywacurgan. Tsay öraga patsapis tutapashganam cargan.

*Señor Jesucristo yachatsicun mushogcag mandamientuta*

<sup>31</sup> Tsaypita Judás aywasquiptinnam Señor Jesucristo nirgan: “Cananmi Diospa Tsurin poderöso cangantawan Dios Yayapis rasumpa poderöso cayniña Paychö musyatsicunga. <sup>32</sup> Tsaynö Diospa Tsurin rasumpa poderöso Dios Yaya canganta

musyatsicuptinmi, Dios Yayapis Paychö sasllana ricätsicur musyatsicunga.

<sup>33</sup> “Ijulläcuna, mananam gamcunawanga unaynatsu caycäshag. Gamcunam ashiyämanqui, pero judiucunata ningänöllam canan gamcunatapis niyag: ‘Noga aywangämanga manam aywayta pue diyanquitsu.’

<sup>34</sup> “Cay mushogcag mandamientutam entregayag: Jucnin jucninwan shumag cuyanacuyänayquipag. Gamcunata cuyayan-gagnölla jucnin jucninwanpis shumag cuyanacuyay. <sup>35</sup> Si tsay niyangagnölla jucnin jucninwanpis shumag cuyanacuyaptiquim, llapan runacunapis musyayanga rasumpa discipulü cayangayquita.”

*Señor Jesucristo willacun discipulun Pedro nüganapag canganta*

(Mateo 26:31-35; Marcos 14:27-31; Lucas 22:31-34)

<sup>36</sup> Simón Pedronam Señor Jesucristota tapur-gan: “Señor, ¿maypatan aywanqui?”

Señor Jesucristonam contestargan: “Noga aywangämanga manam gatimayta pue dinquitsu. Pero tsaypitam siga noga gatimanqui.”

<sup>37</sup> Pedronam nirgan: “Señor, ¿imanirtan cananga mana gatiniquita pue diitsu? ¡Gamraycuga jinam wañunäpagpis listo caycä!”

<sup>38</sup> Señor Jesucristonam nirgan: “¿Rasumpacu nogaraycu wañunayquipagpis listo caycanqui? Rasuncagtam nig: Manarag gallu cantaptinmi, quimsa cuti nügamanqui.

## 14

*Señor Jesucristom Dios Yayaman chänapag näninga*

<sup>1</sup> “Ama gamcunaga mantsacashga yarpachacuyaytsu. Tsaypa rantin Dios Yayallaman mas firmi criyicurnin confiacuyay. Tsaynölla nogamanpis rasumpa criyicur confiacayämuy. <sup>2</sup> Taytä täcungan wajichöga atsca sitiucunam can allish täcunapag. Si tsaynö mana captinga, imanörag alistag aywashag gamcuna shayämunayquipag niyagman cargan. <sup>3</sup> Tsaynö aywasquir alistascamurnam gamcunata pushayänagpag cutimushag. Tsaymi noga täcungächö gamcunawanpis pagta shumag cushishga täcushun. <sup>4</sup> Gamcunaga musyayanquim ima näni, noga aywangämán chätsiyäshunayquipag canganta.”

<sup>5</sup> Tomasnam Señor Jesucristota nirgan: “Señor, manam musyayätsu ni maypa aywangayquitapis. Tsayga ¿imanötan musyayäshag maygan näni cangantapis?”

<sup>6</sup> Señor Jesucristonam contestargan: “Nogam tsay näninga, rasumpacagga y cawayga cä. Tsaymi nogallawan quiquin Tayta Diosmanga chayta pue diyanqui. <sup>7</sup> Si gamcunata nogata regeyämarga, Taytätapis rasumpam regeyanqui. Tsaymi cananpitaga gamcuna rasumpa regeyanquina quiquipicunapa ñawiquicunawan ricashga car.”

<sup>8</sup> Tsaynam Felipe nirgan: “Señor, quiquin Tayta Diosta regeycatsillämay, regeycurmi sığa rasumpa nogapis regeyäshag.”

<sup>9</sup> Señor Jesucristonam contestargan: “Felipe, unaynam gamcunawan pagta caycä, ¿manaragcu

cananyag regemanqui? Nogata ricämagcagga Tayta Diostapis ricanmi. ¿Imanirtan mañamanqui quiquin Tayta Diosta ricätsinapag? <sup>10</sup> ¿Manacu criyinqui noga Tayta Dioschö caycangäta y Tayta Diospis nogachö caycanganta? Tsay imatapis parlangäcunataga manam quiquipa munaylläpitsu parlä, sinöga nogachö Tayta Dios caycagmi llapan imaycatapis rurarnin trabajan. <sup>11</sup> Criyimay Tayta Dioschö caycanganta y Tayta Diospis nogachö caycanganta. Sinöga criiyiyay llapan imayca milagrucuna rurangäcunata ricarllapis.

<sup>12</sup> “Rasuncagtam niyag: Si nogaman rasumpa criyicurga, llapan imayca rurangäcunatam rurayanga. Tsay llapan rurangäcunapitapis mas imaycatam rurayanga, Tayta Diosman noga aywasquir yanapamupti. <sup>13</sup> Gamcuna llapan imaycatapis shutichö mañacuyangayquitam rurashag, Diospa Tsurin car, Taytä poderöso canganta musatsicunäpag. <sup>14</sup> Nogaman criyicamur shutichö mañacayämaptiquiga, llapan imaycatam yanapayarniqui rurashag.

*Señor Jesucristo änicun Espíritu Santota cachamunanpag*

<sup>15</sup> “Si gamcuna rasumpa criyirnin cuyayämarga, llapan mandacungäcunata cäsurnin cumpliyay.

<sup>16</sup> Tsaynö cawayänayquipagmi Tayta Diosman mañacushag, rasumpacag Espíritu Santota gamcunaman cachamuptin, defendir imaycachöpis yachayninwan yanapayäshurniqui gamcunawan pagta imayyagpis cananpag. <sup>17</sup> Cay mundupa mana alli ruraynincunallachö cawag runacunaga, mana ricarnin mana regermi

Espíritu Santota chasquiyyta pue diyantsu. Pero gamcunam sīga rasumpa regeyanqui, Pay gamcunawan pagta cawaptin. Tsaymi Espíritu Santoga gamcunachö imayyagpis pagtayquicuna canga.

<sup>18</sup> “Manam imayca taytannagtanö y mamannagtanö japallayquicunataga dējayäshayquitsu. Yapaymi cutimushagmi gamcunawan pagta cananpag. <sup>19</sup> Ichicllanam faltan cay mundupa munayllanchö cawagcunaga manana ricäyämänanpag. Pero gamcunam sīga nogata ricäyämar, rasumpa cawangäpita gamcunapis cawayanqui. <sup>20</sup> Tsay junagmi musyayanqui, Tayta Dios nogachö jucllayllanö caycanganta y gamcuna nogachö y noga gamcunachöpis jucllayllanö caycangäta. <sup>21</sup> Yachatsicungäcunata cäsurnin llapan mandamiento cumplirga, rasumpa criyicurmi cuyayäman. Tsay cuyamagcunataga Taytämi cuyarnin imaycachöpis yanapanga. Tsaynöllam nogapis tsay cuyamagcunataga, cuyarnin imanö cangäta musyatsishag.”

<sup>22</sup> Mana Iscariotecag Judásmi Señor Jesucristota tapurgan: “Señor, ¿imanirtan nogacunallata poderoso cangayquita musyatsiyämanqui, cay mundupa munayllanta rurag runacunatapis mana musyatsirga?”

<sup>23</sup> Señor Jesucristonam contestargan: “Nogata criyimar rasumpa cuyamagcagga, llapan palabräta cäsucurmi cumplin. Tsaymi Taytä alläpa yanapar cuyamaptin, ishcä shayämushag tsay runawan pagta cawayänäpag. <sup>24</sup> Si nogata mana cuyayämarga manam llapan

willacungätapis cäsuyantsu. Cay llapan willacungäcuna wiyacäyangayquiga manam quiquipa yarpaylläpitatsu, sinöga cachamagni Taytä nimangallanmi.

**25** “Caycuna llapantam willayag gamcunawan caycarllarag. **26** Pero yachayninwan yanapayagniqui Espíritu Santota shutichö Dios Yaya mandamungannam, llapan imaycatapis yachatsiyäshunqui. Tsaynöllam llapan nogar willar yachatsiyangagta yarpätsiyäshunqui.

**27** “Gamcunapita aywacurmi dejapuyag, alläpa cushishga alli päsacuychö cawayänayquipag. Gamcunatam yanapayäshayqui alli päsacuychö cawayänayquipag. Pero manam yanapayäshayquiga cay mundupa munayllanchö cawagcunanötsu. Ama gamcunaga llaquishga cayaytsu ni mantsacäyaytsu.

**28** Wiyayämargoyquinam aywacungäpita cutiscamur gamcunawan pagta cawanapag canganta. Si rasumpa cuyayämarga alläpam cushicuyanquiman cargan, Taytä caycanganman cutimunäpagcagta musyasquir, Payga nogapita mas Poderöso captin. **29** Caycunatam willayag manarag päsaptin, caynö llapan päsaptin gamcuna nogaman rasumpa criyyänayquipag.

**30** “Caypita mastaga mananam parlapäyäshayquinatsu, cay munduta munayninwan mandag Satanasmí shamuycanna. Paypaga manam ni ima podernipis cantsu nogapagga. **31** Pero tsaynö caycaptinpis llapan runacunam musyayanga Dios Yayata alläpa cuyarnin, Pay mandamangannölla llapan imaycatapis

cumplingäta.  
aywacushun.”

Shäriyay, canan caypita

## 15

*Señor Jesucristo yachatsicun, üvawan iwalatsicur*

<sup>1</sup> Tsaypitanam Señor Jesucristo yapay nirgan: “Nogam rasumpacag üvaga cä y Taytänam cuidagninga. <sup>2</sup> Si juccag rämä mana wayuptinga wallusquirmi jitason, pero si juccag rämä alli wayuptinmi sığa, shumag limpiarnin llaumipar cuidan mas atscata wayunanpag. <sup>3</sup> Gampunaga limpiunam cayanqui, Dios Yayapa Palabran yachatsiyangagta chasquirnin, jutsayquicunapita perdonashgana car. <sup>4</sup> Imaypis nogawan juclayllanö mana raquicarnin quëdayay, nogapis gampunapita ni imay mana raquicar quëdangänö. Juc räma yuranpita camantsacasquirga manam quiquillan üvata wayuyta puedintsu. Tsaynöllam gampunapita nogawan mana pagta imaypis quëdarga, imayca üva wayugnö ni ima rurayangayquipis masga mirangatsu.

<sup>5</sup> “Nogam rasumpacag üvaga cä y gampunam rämäcuna cayanqui. Pipis nogawan pagta imaypis cawarnin quëdarga y noga paywan pagta quëdarga, imayca allish wayug üvanömi mas miratsiyäshag. Tsaynö nogawan pagta mana quëdarninga, manam ni imatapis quiquillayquicunaga rurayta puediyankuitsu. <sup>6</sup> Si pipis nogawan pagta imaypis mana quëdarga, yuranpita wallusquir tsaquinanpag jitaringanta gorisquir ninawan waycaypagmi cayanga.

<sup>7</sup> “Si gamcuna nogachö juclayllanö quëdarnir cawarga, llapan Palabräcuna yachatsiyangagta cumpliyaptiquim, llapan imayca mañayämangayquitapis chasquiyanqui.

<sup>8</sup> Taytä poderöso cangantam llapan runacuna aläbayan, gamcuna imayca alli wayugnö Paypa Alli Willacuyninta mas miratsiyaptiqui. Tsaynöpam gamcunaga nogapa rasumpacag discipulücuna cayanqui.

<sup>9</sup> Gamicunatam alläpa cuyayag, Taytä cuyamangannölla. Tsaynöpam imaypis gamcunaga nogapa cuyacuynichö quëdayanqui.

<sup>10</sup> Si nogapa llapan mandamientuta cäsurnin cumplirga, imaypis nogapa cuyacyuynichömi quëdarnin caycäyanqui. Tsaynöllam nogapis Taytäpa mandamientunta cäsurnin cumplir, imaypis Paypa cuyacuyninchö quëdarnin cawayäcä.

<sup>11</sup> “Tsaynömi willayag nogawan cushishga cayänayquipag y rasumpa cushishga imayyagpis cawacuyänayquipag.

<sup>12</sup> Nogapa mandamientüga caymi: Jucnin jucninwanpis shumag cuyanacurnin cawacuyänayquipag, noga gamcunata alläpa cuyayangagnölla.

<sup>13</sup> Caypita masga manam cantsu, rasumpa cuyacuya: Alläpa cuyarnin amigona janan wañunanpagpis listo cayga.

<sup>14</sup> Llapan mandacungäcunata cäsucurnin cumplirmi, gamcunapis rasumpa cuyay amigöcuna cayanqui.

<sup>15</sup> Gamicunaga mananam servignillatsu cayanqui, juc servicugga manam musyantsu patronnin ni imata rurangantapis.

Pero nogaga alläpa cuyay amigöcunam cayanqui niyag, Taytäpita llapan yachacungäta musyatsishga

cayarniquim. <sup>16</sup> Manam gamcunatsu nogata acrayämargayqui, sinöga nogam gamcunata acrayarniqui encargayashcag, maytsaypa aywar Alli Willacuynüta imay allish wayugnö mas miratsiyaptiqui, imayyagpis mana ushacag cananpag. Tsaynöllam nogapa shutichö llapan imayca mañayangayquitapis, Tayta Dios garayäshunqui. <sup>17</sup> Caycunatam gamcunata mandayag: Jucnin jucninwanpis shumag cuyanacur alli päsacuyänayquipag.

*Cay munduchö mana alli ruracunawan marca-majincuna, Señor Jesucristotawan discípuluncunata chiquiyan*

<sup>18</sup> “Si cay mundupa munayllanchö cawagcuna chiyäshuptiqui, yarpäyay mas puntata nogata chiquiyämanganta. <sup>19</sup> Si gamcunacush cay mundupa munayllanta rurayanquiman, tsay mana alli rurag runacunapis cuyayäshunquimanmi quiquinuncunapuralla cuyanacuyanganno. Pero nogam gamcunata acrayashcag cay mundupa munayllanchö caycagcunapita. Tsaymi cay mundupa munayllanta rurag runacuna gamcunatapis chiquiyäshunqui, gamcunaga manana cay mundupa munayllanta rurag cayaptiqui. <sup>20</sup> Yarpäyay puntatana cayño niyangagta: Manam ni maygan servicugpis, patronninpita masga canamantsu. Si nogata gaticachaycäyämarga, gamcunatapis gaticachäyäshunquim. Si nogapa Alli Willacuynüta cäsucurga, gamcuna yachatsicur willacuyangayquitapis cäsucur cumpliyangam. <sup>21</sup> Tsaynö tucuyläya imaycatam rurayäshunqui

nogaraycu, tsay runacunaga manam regeyantsu ni pí mandamangantapis.

<sup>22</sup> “Paycunaga manam ni juc culpayogtsu cayanman cargan, si noga willagnincuna mana shamuptiga. Pero cananga llapan willacungäta wiwashga carmi, jutsa rurayanganpita mana disculpashga car castigashga cayanga. <sup>23</sup> Pipis nogata chiquimarga, Taytätapis chiquinmi. <sup>24</sup> Manam culpayogtsu cayanman cargan, si noga paycunapa ricänanchö ni pí rurangan milagrucunata rurashga captiga. Pero paycunaga llapan milagru rurangäcunata ricashga caycarpis, nogata chiquiyämarmi Taytätapis chiquiyan. <sup>25</sup> Pero caycuna llapanmi pásanarnin cumplinan, Diospa Palabran quiquinunapa leynincunachö ningan: ‘Chiquiyämargan mana ni imacagpitam.’<sup>25</sup>

<sup>26</sup> “Pero defendir yanapayagniqui shamug rasumpacag Espíritu Santota quiquin Taytäpita cachamungämi, imayca testigunö nogapag musyatsicunga. <sup>27</sup> Pero tsaynöllam gamcunapis nogapa testigü cayanqui, gallananpita nogawan pagta purishga car.

## 16

<sup>1</sup> “Cay llapantam willayag chiquiyäshurniqui sufritsiyäshuptiqui, nogaman criyicuyniquicuna mana dejayänayquipag. <sup>2</sup> Dios Yayaman mañacuyänanpag goricäyänan wajicunapitam chiquir gargoyäshunqui. Tsaynö chiquirmi waquiquitaga wañutsiyäshunqui, Dios Yaya munanganno ruraycäyanganta yarpar. <sup>3</sup> Tsaynö imaycataga rurayäshunqui, Tayta Diostawan

<sup>25</sup> 15:25 Sal 35:19; 69:4.

nogatapis mana regeyämarmi. <sup>4</sup> Caycunatam canan willayag, tsaynö päsayäshungayqui öra yarpäyanayquipag, nogaga gamcunata mas unayna willayangagta. Nogaga manam cayta gallananpitatsu willayargag, gamcunawan cay patsachö pagta caycarllaragga.

### *Espíritu Santopa ruraynincuna*

<sup>5</sup> “Pero cananga aywacü cachamagni Taytawan pagta canäpagmi. Tsaynö niyaptigpis manam ni maygayquillapis tapuyämanquitsu ni maypa aywangätapis. <sup>6</sup> Tsaynö tapuyämangayquipa rantinmi, gamcunaga alläpa llaquishga caycäyanqui, caycuna llapanta willayaptig. <sup>7</sup> Pero rasumpacagtam niyag: Mas mejormi gamcunapag noga aywacungä. Si noga mana aywacuptiga defendir Yanapayagniqui Espíritu Santo manam shamungachö gamcunawan pagta cananpag. Pero si aywacurga, nogam gamcunaman cachamushag. <sup>8</sup> Espíritu Santo shamurnam entëru munduchö runacunata entenditsir musyatsicunga Dios Yaya munangancunata mana cäsuymar mana alli jutsacunata rurarnin cawayanganpita, mana juc janapar Dios Yaya alläpa mantsacaypag castigananpag canganta. <sup>9</sup> Quiquincunapa jutsancunam musyatsicunga nogaman mana criyicayämunganta. <sup>10</sup> Espíritu Santom Dios Yayapa munayninta musyatsicunga, Tayta Diosman aywacupti, pero gamcunaga mananam ricäyämanquinatsu. <sup>11</sup> Tsaynöllam musyatsicunga Dios Yaya juzgarnin cay munduchö mandacug Supayta condenangantapis. Tsay Supayga

infiernuchö alläpa castigashga cananpagmi condenashgana caycan.

**12** “Mas atscaragmi can gamcunata willayänagpag. Pero canan öra llapanta willayaptipis, manam gamcunaga entendiyta puediyanquitsu. **13** Pero Espíritu Santo shamurmi süga, llapan rasumpacagcunallata entenditsiyäshunqui. Payga manam quiquinpa yarpayllanpitatsu entenditsiyäshunqui, sinöga Dios Yaya mandacunganllatam. Tsaynöllam entenditsiyäshunqui ima päasanapag cangantapis. **14** Espíritu Santom poderniwan parlangäcunata musyatsir willayäshunqui, regemangantawan poderöso mandacuyyog cangäta. **15** Tayta Diospa mandacuyninchö llapan imaycan capunganpis nogapam. Tsaymi niyag Espíritu Santo nogapita llapan chasquinganta gamcunatapis willarnin musyatsiyäshunayquipag.

**16** “[Ichicllanam faltan gamcuna manana ricäyämänayquipag. Pero tsaypitanam yapay ricäyämänayquipag tincushun.]”\*

### *Llaquishga cayniquicunam cushicuymanticranga*

**17** Tsaypitanam waquincag discipuluncuna jucnin jucnin tapunacuyargan: “¿Caynöga imaninantatan nicämantsic: ‘Ichicllanam faltan manana ricäyämänayquipag, pero tsaypitam yapay ricäyämanqui, Taytäcagpa aywasquirnin cutiscamupti?’ **18** ¿Ima ninantan ‘Ichicllanam faltan gamcuna manana ricäyämänayquipag’

---

\* **16:16** Versículo 16 manam cantsu puntacag waquin librucu-nachöga.

ninanga? Manam ni ichicllatapis entendintsictsu ni imapag parlangantapis."

<sup>19</sup> Señor Jesucristonam discipuluncuna tapuyninta munayanganta tantiyasquir nirgan: "Nogam niyargog: Ichicllanam faltan manana ricäyämänayquipag y tsaypitanam yapay ricäyämanquir. ¿Tsaypagcu gamcuna yarpachacur tapunacuycäyanqui?" <sup>20</sup> Rasuncagtam niyag: Gamcunaga rasumpam alläpa llaquicurnin wagayanqui, cay mundupa munayllanta rurag runacuna cushishga caycäyaptin. Pero tsaynö alläpa llaquishga wagarnin caycäyangayquipitam, gamcunapis alläpa cushishga cayman ticrayanqui. <sup>21</sup> Juc geshyag warmi geshyacunanpag öran chämuuttinga alläpa llaquicurmi yarpachacun. Pero wamran yurisquiptinmi sïga, nanacuynintawan llaquicur yarpachacuynintapis jancat gongasquin, cay munduman juc wamrata apamungata alläpa cushicurnin. <sup>22</sup> Tsaynöllam gamcunapis canan aywacupti, alläpa llaquishga caycäyanqui. Pero tsaypita yapay tincusquishgam sïga, llapan shongoyquicunawan alläpa cushishga cayanqui. Tsay rasumpacag alläpa cushicuyniquicunataga, manam ni pipis gechuyäshunquinatsu. <sup>23</sup> Tsay junagga manam ni imatapis tapuyämanquinatsu. Rasuncagtam niyag: Taytäga llapan imayca mañayangayquitam garayäshunqui, nogapa shutichö mañacuyaptiquiga. <sup>24</sup> Cananyagga manam ni imatapis nogapa shutichö Taytäta mañacuyashcanquiragtsu. Mañacuyay chasquiyänayquipag llapan rasumpa cushicuyniquicuna gamcunachö cananpag.

*Señor Jesucristoga cay munduchö llapan mana allicunatam venceshga*

<sup>25</sup> “Caycunatam willayashcag iwalatsicuy ejemplucunawan. Pero juc tiempu chamunganam cay ejemplucunawan manana yachatsiyänagpag, sinöga defrentena Taytä imanö cangata willayänagpag. <sup>26</sup> Tsay junagcunagam defrente shutillächöna mañacuyanqui; manam noganatsu Tayta Diosta gamcunapag rugaca-mushag. <sup>27</sup> Tsaymi quiquin Tayta Dios alläpa cuyayäshunqui. Tsaynöga alläpa cuyayäshunqui nogata gamcuna cuyarnin, Diospita shamungäta rasumpa criiyangayquipitam. <sup>28</sup> Nogaga Tayta Diospa puntanpita yargascamurmi cay munduman shamushcä. Tsaynöllam cananga cay munduta dëjasquir Tayta Diospa puntanman cuticushag.”

<sup>29</sup> Tsaynam discipuluncuna niyargan: “Cananmi sïga, manana ejemplucunawan yachatsicur defrente parlapaycäyämanqui. <sup>30</sup> Cananmi sïga musyayä llapan imayca musyangayquita. Mananam wanacannatsu ni pipis tapushunayquipag. Tsaynöpam cananga rasumpa criyicurnin musyayä Diospita shamushga cangayquita.”

<sup>31</sup> Señor Jesucristonam contestargan: “¡Tsaypunga rasumpach cananga criiyianqui! <sup>32</sup> Tsaynö captinpis öra chaycämunnam, canan öra wacpa caypa witsicarnin munayangayquipa aywacur japalläta dëjascayämänayquipag. Pero manam quiquillätsu quëdashag, sinöga Taytämi nogapa pagtä imaypis caycanga. <sup>33</sup> Caycuna

llapantam willayag, nogaman rasumpa firmi criyicamurnin mana llaquinar cushishga alli päsacuychö cawacuyänayquipag. Cay munduchö cayangayquiyagllaragga alläpam sufriyanqui. Pero tsaynö sufrirpis mas valoracurnin ama desanimacuyanquitsu, nogan cay mundupa mana alli ruraynintaga venceshcäna.”

## 17

*Señor Jesucristo Dios Yayaman mañacun discípuluncunapag*

<sup>1</sup> Tsaycunata yachatsicur ushasquirnam, Señor Jesucristo cielman ricarcur nirgan:

“Taytallay, öra chämushganam. Tsuriqui alläpa poderöso canganta ricätsicuy, tsaynölla Tsuriquipis alläpa poderöso cangayquita ricätsicur musyatsicunapag. <sup>2</sup> Gammi Tsuriqui llapan runacunata mandananpag churashcanqui. Tsaynöpam llapan entregangayqui runacunata salvarnin, imayyagpis cawatsinga. <sup>3</sup> Tsay mana ushacag cawayga, gam rasumcag japallan Diostawan cachamungayqui Tsuriqui Jesucristota rasumpa regeyanganmi. <sup>4</sup> Nogam cay munduchö alläpa poderöso cangayquita ricätsicur, llapan mandamangayquicunata rurarnin cumplishcä. <sup>5</sup> Cananga Taytay, cay patsa manarag camashgacaptin, gampa pagtayqui poderöso cangänölla, puntayquichö poderöso cangäta musyatsicuy llapan runacunata.

<sup>6</sup> “Cay mundupita acrasquier entregaman-gayqui runacunatam, pii cangayquitapis

rasumpa regetsishcä. Gampa caycaptin entregamangayquicunatam Palabrayquicunata willacupti rasumpa cäsurnin cumpliyashga. <sup>7</sup> Cananga musyayanmi llapan imayca entregamangayquipis, gamllapita shamunganta. <sup>8</sup> Gam entregamangayqui Palabrayquicunata, yachatsicuptimi rasumpa änir chasquiyashga. Gampita shamungäta rasumpa musyarmi, gam cachamangayquita criiyashga.

<sup>9</sup> “Nogam rugacug paycunapag, manam mañacugtsu cay mundupa munayllanta rurag runacunapagga. Sinöga gammi tsay llapan criyicugcunata entregamashcanqui, quiquipa cayaptin. <sup>10</sup> Llapan entregamangayquicunaga gampam y gampa llapan capushungayquim nogapa. Tsaymi nogapa cushicuypa poderöso cayni paycunachö rasumpa musyatsicur ricacan.

<sup>11</sup> “Nogaga mananam cay munduchöga cashagnatsu, pero paycunanam siga cay mundullachörag cayanga, nogá gamwan pagta canäpag shamungäyag. Jutsannag Taytay, shutiquichö poderniquiwan defendir cuidaycuy, imaypis yachatsingänölla cawacuyänanpag. Tsaynö cawarmi nogantsic juc yarpayyoglla cangantsicnö, paycunapis cuyanacurnin alli yarpayyog juc shongolla gam garamangayqui shutichö imaypis cawayanga. <sup>12</sup> Paycunawan cay munduchö pagta carmi, gampa shutquiraycu y nogata poderni garamangayquiwan imaycapita tsaparnincuna cuidargö. Manam ni mayganpis

ogracarnin jutsaman shicwargantsu. Pero jucnинmi siga, imayca ogracagnö infiernuman aywanga Palabrayquichö gellgashga caycag cumplinanpag.

<sup>13</sup> “Cananga gam caycangayquimanmi shamushag. Pero caycunataga cay munduchö caycarllaragmi willacü, paycunapis alläpa cushishga cayänanpag, nogá jancat rasumpa cushishga cangänö. <sup>14</sup> Nogam gampa Palabrayquita willacurgä. Pero cay mundupa munayllanta rurar cawag runacunam chiquiyan, paycuna gam munangayquinnölla cawacuyaptin. Paycunaga manam cay munduchö runacunanönatsu cayan, nogapis cay mundupita mana cangänölla. <sup>15</sup> Manam cay mundupita jipinayquipagtsu mañacug, sinöga llapan imayca mana allicunapita tsaparnin cuidanayquipagmi. <sup>16</sup> Noga cay mundupita mana cangänöllam, paycunapis cay mundupa munayninchöga manana ni imay cawayannatsu. <sup>17</sup> Rasumpacag Palabrayquian mana jutsannag limpiuta shongota catsiy, jutsaman mana ishquiyananpag. Gampa Palabrayquiga rasumpacagmi. <sup>18</sup> Gam cay mundupa munayllanta ruracunaman cachamangayquinöllam, nogapis paycunata cay mundupa munayllanta rurag runacunaman mandaycä. <sup>19</sup> Paycuna jananmi quiquipis jutsannag cashcä, paycunapis jutsannag car llapan rasumpacagcunallata gam munangayquinö willacurnin puriyänanpag.

*Señor Jesucristo Dios Yayaman mañacun llapan*

*criyicugcunapag*

<sup>20</sup> “Manam paycunallapagtsu mañacug, sinöga paycuna willacuyanganta wiichernin nogaman rasumpa criyicugcunapagpismi. <sup>21</sup> Gamtam mañacug llapanpis juc shongolla imaycachöpis entendinacur nogantsicwan pagta jucllayllanö shumag cawacuyänanpag. Taytallay, gam nogachö y noga gamchö cangantsicnölla llapanpis juc shongolla cayätsun. Rasumpa shumag llapan juc shongonölla cäyätsun, gam rasumpa cachamangayquita cay mundupa munayllanta rurag runacunapis musyayänanpag. <sup>22</sup> Gam alläpa alli cushicuyni garamangayquinöllam, nogapis llapan imayca juc shongonölla cäyänanpag cushicuynincuna garashcä. Gamwan ishcantsic juc persönalla cangantsicnö. <sup>23</sup> Nogam paycunachö y gammi nogachö, tsaynöpa juc japallan rasumpa juc shongolla canapag. Tsaynö cawayanganta ricarmi cachamangayquita musyar waquincag runacunapis chasquiyämanga. Tsaynöpam cay mundupa munayllanta ruracunapis musyayanga cuyamangayquinölla paycunatapis alläpa cuyangayquita.

<sup>24</sup> “Taytallay, gammi paycunata entregamashcanqui. Tsaymi munä noga caycangächö paycunapis pagtä car, alläpa cushcuy poderni garamangayquitawan gampa cushicuy poderniquita ricäyänanpag. Gamga alläpam cuyamargayqui cay mundutapis manarag camarnin. <sup>25</sup> Ay jutsannag Taytallay, cay mundupa manayllanchö cawag runacunaga manam regeyäshunquitsu. Pero nogam siga

rasumpa regeptig, caycunapis musayan gam rasumpa cachamangayquita. <sup>26</sup> Paycunatam entenditsishcä pii cangayquitapis. Tsaynöllam imaypis entenditsir sigishag imanö cangayquita yachatsicurnin. Tsay alläpa cuyamangayquim paycunachö caycan, nogapis paycunata cuyarnin pagtancuna capti.”

## 18

*Señor Jesucristota achcusquir prësu apayan  
(Mateo 26:47-56; Marcos 14:43-50; Lucas 22:47-53)*

<sup>1</sup> Tsaynö Dios Yayaman mañacusquirnam Señor Jesucristo discipuluncunawan yargosquir, Cedrón niyangan ragrapa wac tsimpanman aywayargan. Tsaychö juc werta olivos jachacunamanmi, Señor Jesucristo discipuluncunawan yaycurgan. <sup>2</sup> Tsaychömi Señor Jesucristo imaypis discipuluncunawan goricäyag. Tsayimi traicionarnin ranticug Judás Iscariotepis tsay wertata reger, musyargan Señor Jesucristo tsaychö caycanganta. <sup>3</sup> Tsaymannam Judás mandacug sacerdöticunawan fariseocuna cachayangan wardiacunatawan juc tröpa Romapita soldäducunata pushashga chargan. Paycunam alli armashga linternacunawan y antorchancunawan chäyargan. <sup>4</sup> Pero Señor Jesucristoga llapan päsananpagcagta musyarnam, yargosquir paycunata tapurgan: “¿Pitatan ashiyanqui?”

<sup>5</sup> Paycunanam contestayargan: “Nazaret marcapita Jesústam.”

Señor Jesucristonam nirgan: “Nogam cä.”

Señor Jesucristota traicionar ranticugnин Judáspis tsay runacunawanmi caycargan.<sup>6</sup> Señor Jesucristo “Nogam cä” niyuptinnam, llapan runacuna mantsacar gepapa sicparnin patsaman shicwasquiyargan.<sup>7</sup> Señor Jesucristonam yapay tapurgan: “¿Pitatan ashiycäyanqui?”

Paycunanam yapay niyargan: “Nazaret marcapita Jesústam.”

<sup>8</sup> Señor Jesucristonam yapay nirgan: “Willayargognam nogar asumpa cangäta. Si ashiyämarga caychö waquinacagcuna nogawan caycagcunata aywacuyänanpag dejaycuyay.”

<sup>9</sup> Tsaynöga päsargan quiquin Señor Jesucristo willacungan cumplinanpagmi: “Taytay, llapan entregamangayquipita manam ni juclayllapis ogracangatsu.”<sup>10</sup> Tsaynam Simón Pedro espädanta jipisquir, mas mandacug sacerdötipa wätaynin Malco shutiyog runapa derächucag rinrinta jipicat wallusquirgan.

<sup>11</sup> Señor Jesucristonam, Pedrota nirgan: “¡Tsay espädayquita yapay cutitsiy, maychöpis churaräcunganman! Si Taytä imayca mana awantaypag ayagta upyagnö wañunäta munaptinga, ¿Acäsu manatagcu nogar tsaynö cumpliman?”

*Señor Jesucristota apayan mas mandacug sacerdötia Anaspa wajinman*

(Mateo 26:57-58; Marcos 14:53-54; Lucas 22:54)

<sup>12</sup> Tsaypitanam tröpa soldäducuna mandagnincunawan y judiucunapa templuchö wardiacunawan Señor Jesucristota achcusquir maquinta

watasquiyargan. <sup>13</sup> Puntatam mandacug sacerdöti Anaspa wajinman apayargan, tsay wata llapanpa mandagnin sacerdöti Caifaspa suegrun captin. <sup>14</sup> Tsay mas mandacug Caifasmi, judiucunapa autoridänincunata unayna nirgan: “Mejormicanman juc runalla wañunananpag, Israel marcachö llapan runacuna wañunganpa rantin.”

*Pedro mana regegtucurnin Señor Jesucristota nègan*

(Mateo 26:69-70; Marcos 14:66-68; Lucas 22:55-57)

<sup>15</sup> Simón Pedro discipulunnam Señor Jesucristota gatirnin aywargan. Pero juccag discipulumajinnam mandacug sacerdötiwan regenacur, Señor Jesucristowan wajipa ruri patiunman yaycurgan.

<sup>16</sup> Pero Pedronam wagta puncullachö quëdasquirgan. Tsaynam juccag discipulumajin mas mandacugcag sacerdötiwan regenacur, puncuta quichapucug warmita rugaycur, Pedrotapis ruri patiuman yaycatsirgan. <sup>17</sup> Tsay puncuta quichapucug warminam Pedrota tapurgan: “¿Manacu gampis tagay runapa juccag discipulun canqui?”

Pedronam contestargan: “Manam. Manam nogatsu cä.”

<sup>18</sup> Tsaychö alläpa alalaptinmi servigcunawan wardiacunapis ninata tsarircatsir mashacuycäyargan. Tsayman witiycurnam Pedropis paycunawan pagta ninapa lädunchö mashacuycargan.

*Señor Jesucristota mas mandacug sacerdöti  
Anas tapupan  
(Mateo 26:59-66; Marcos 14:55-64; Lucas 22:66-71)*

<sup>19</sup> Tsaychönam mas mandacug sacerdöti Anas Señor Jesucristota discipuluncunapagwan imata yachatsicunganta tapurnin gallaycurgan.

<sup>20</sup> Señor Jesucristonam nirgan: “Nogaga llapan runacunapa puntanchömi imaycatapis yachatsicurnin parlashcä. Imaypis Dios Yayaman mañacuyänanpag goricäyänan wajicunachöwan templucunachö y judiucuna goricäyanganchömi yachatsicur willacushcä. Manam ni imatapis nogaga parlashcätsu, mana pii wiyaptin pacayllapaga. <sup>21</sup> ¿Imanirtan nogata tapumanqui? Tapuy wiyamashgacunata; paycuna niyäshuy imata noga yachatsicungätapis. Paycunam rasumpa imayca testigunö musyayan imata yachatsicur willacungätapis.”

<sup>22</sup> Señor Jesucristo tsaynö niptinnam, juc wardia gagllachö lagyarnin nirgan: “¿Tsaynöcu contestanqui mas mandacug sacerdötita?”

<sup>23</sup> Señor Jesucristonam nirgan: “Si noga mana allita parlaftiga, nimay imanir mana alli canganta. Pero tsay noga ninga allilla caycaptingga ¿imanirtan magamanqui?”

<sup>24</sup> Tsaypitanam sacerdöti Anas Señor Jesucristopa maquinta watarcatsir, mas mandacugcag sacerdöti Caifasman apatsirgan.

*Pedro yapay Señor Jesucristota nëgan  
(Mateo 26:71-75; Marcos 14:69-72; Lucas 22:58-62)*

**25** Tsaychö runacunawanmi, Pedro ninapa lädunchö mashacur sígirgan. Tsaynam tapuyargan: “¿Manacu gamga tagay runapa juccag discípulun canqui?”

Pedronam négarnin yapay nirgan: “Manam. Manam nogatsu cä.”

**26** Tsaypitanam mandacug sacerdötipa servignin runa, Pedro rinrinta jipicat wallusquin-ganpa ayllun tapurgan: “¿Manacu gamta ricargag tagay runawan olivos niyangan wertachö?”

**27** Pedronam yapay négargan. Tsaynö négangan öram gällu cantasquirgan.

*Señor Jesucristota gobernador Pilatoman apatiyan*

(Mateo 27:1-2,11-14; Marcos 15:1-5; Lucas 23:1-5)

**28** Caifaspa wajinpitanam Señor Jesucristota apayargan, gobernador Pilatopa palacionman. Patsa warämugnöna captinmi, judiucunaga Pilatopa palacionman yaycuyargantsu. Si tsay palacioman yaycurga leynincuna limpiu cayänanpag mandacunganta mana cäsurmi, Pascua fiesta micuyta micuyanmantsu cargan.

**29** Tsaymi Pilato palacionpita yargosquir parlaparnincuna nirgan: “¿Imapitatan cay runata acusayanqui?”

**30** Paycunanam niyargan: “Si jutsannag captinga, manam gamman apayämümantsu cargan.”

**31** Pilatonam nirgan: “Gamcuna aparnin, leyniquicuna mandacungannö juzgayay.”

Judiucunanam contestayargan: “Pero judiucunapaga manam ni ima derëchücupnis cantsu, juc runata juzgarnin wañutsiyänäpag.”

<sup>32</sup> Tsayönümi cumplirgan Señor Jesucristo imanö wañunanpag, mas puntatana willacungan.

<sup>33</sup> Tsaynam Pilato palacionman yapay yaycusquirnin, Señor Jesucristota gayasquir tapurgan: “¿Gamcu rasumpa canqui, judiucunapa Reynin?”

<sup>34</sup> Señor Jesucristonam nirgan: “¿Tsaytaga quiquipa yarpayniquipitacu tapumanqui o juccuna nogapag willayäshungayquipitacu?”

<sup>35</sup> Pilatonam contestargan: “¿Acäsu nogaga judiucu cä? Gampa marcamajiquicunawan sacerdöticunapa mandagnincunam gamta nogaman apatsiyämushushcanqui. ¿Imatatan rurashcanqui?”

<sup>36</sup> Señor Jesucristonam contestargan: “Nogapa Mandacuy Reynöga manam cay mundupitatsu. Si cay mundupita captiga, maytsicag runam servimarni nogata judiu runacunaman entregayämänanta amatsacur llapan peleayanman. Pero nogapa Mandacuyniga manam cay patsapitatsu.”

<sup>37</sup> Tsaynam Pilato tapurga: “¡Tsaypunga gamchi rey canqui!”

Señor Jesucristonam contestargan: “Gammi nirgoysi, rey cangäta. Nogam rasumpa yurirnin cay patsaman shamurgä, Dios Yayapa rasumpacag Palabranta imayca testigunö willacur yachatsicunäpag. Tsaynopam llapan rasumpacagcunallachö cawagcunaga, chasquicur cäsucuyan noga willacungäta.”

<sup>38</sup> Pilatonam nirgan: “¿Imatan rasumpacagga?”

*Señor Jesucristota wañutsiyänanpag Pilato runacunata entregan*

*(Mateo 27:15-31; Marcos 15:6-20; Lucas 23:13-25)*

Tsaycuna llapanta tapupasquirnam, Pilato yapay yargosquir judiucunata parlapar nirgan: “Nogaga manam ni ima jutsantapis cay runachöga tarütsu.<sup>39</sup> Pero gamcunapaga costumbriquicunam can, cada wata Pascua fiestachö juc présuta gargonäpag: ¿Munayanquicu judiucunapa reyninta libri dejaycunäpag?”

<sup>40</sup> Tsaynam llapan goricaschga runacuna yapay gayaycachäyargan: “¡Manam! ¡Tsaytaga ama dejaytsu! ¡Mas bien Barrabasta libri dejaycuygal!” nirnin. Tsay Barrabasga Roma naciunpa contran car, peleanganpitam gaycuraycargan.

## 19

<sup>1</sup> Tsaynö niyaptinnam, Pilato Señor Jesucristota entregargan soldäducuna achcusquir alli astayänanpag. <sup>2</sup> Soldäducunanam cashapita corönata awasquirnin Señor Jesucristopa umanman shucurcatsir, reypa puca mantuntanö ashgotsiyargan. <sup>3</sup> Tsaynö ashgorcatsirmi, puntanman witiycur yapay yapay niyargan: “¡Viva judiucunapa reynin!” nirmi, gagllanchö lagyarnin magayargan.

<sup>4</sup> Pilatonam palacionpita yapay yargosquir nirgan: “Ricäyay, jipimurgö gamcuna tantiyacuyänayquipagmi, cay runachö ni ima jutsanta mana taringäta.” <sup>5</sup> Señor Jesucristonam palaciopita yargascamurgan umanchö casha corönashga y puca cäpan ashgoshga. Tsaynam

Pilato nirgan: “¡Ricäyay cay apayämungayqui runata!”

<sup>6</sup> Señor Jesucristota ricaycurnam sacerdöticunapa mandagnincunawan templuchö wardiacuna gayaycachar gallaycuyargan: “¡Crucifícay! ¡Crucifícay!” nir.

Pero Pilatonam paycunata nirgan: “¡Tsaypunga gamcuna aparnin crucificäyay, nogaga manam ni ima jutsantapis psychö tarishcätsu!”

<sup>7</sup> Judiucunanam obligarnin contestayargan: “Nogantsicpaga juc leynintsicmi can, tsay leynintsic mandacungannömi cay runaga wañunan, ‘Diospa Tsurinmi cä’ ninganpita.’”

<sup>8</sup> Tsayta wiyaycurnam Pilatoga mas mantsacashga cargan. <sup>9</sup> Palacioman yapay yaycusquirnam, Pilato Señor Jesucristota yapay tapurgan: “¿Maypitatan gam canqui?” Pero Señor Jesucristoga manam ni imatapis contestargantsu.

<sup>10</sup> Pilatonam nirgan: “¿Gamga manacu contes-tamanqui? ¿Manacu musyanqui mandacuuyyog cayniwan, crucificänagpagwan librina canayquipag dejaycunagpagpis?”

<sup>11</sup> Tsaynam Señor Jesucristo contestargan: “Manam ni mandacuyniquipis nogapagga canmantsu, si quiquin Dios Yaya mandacuyninta mana garashuptiquiga. Tsaymi gampita mas jutsayogga cayan, gamman apamur entregamagcuna.”

<sup>12</sup> Tsay öraptam Pilatoga ashirgan imay-canöllapis Señor Jesucristota libri dejaycunanpag. Pero judiucunanam masrag gayaycachäyargan. “Si libri dejarga, manam Romapa mas mandacugnин emperador Cesarpa amígontsu

canqui! ¡Maygan runapis reytucurga, emperador Cesarpa contranmi!” nirnin.

<sup>13</sup> Tsayta wiyarnam Pilatoga mandargan Señor Jesucristota wagtaman jipiscatsimur, juzgacuyänan “*Gabata*” ninyanganman jamätsirgan. Hebreo parlaychöga “*Gabataga*” empiedrashga patsa ninanmi cargan. <sup>14</sup> Tsay junagga cargan, Pascua fiestapag pullan junagllana faytaycaptinmi. Tsaynam Pilato judiucunata nirgan: “¡Caychömi reyniquicuna caycan!”

<sup>15</sup> Pero paycunanam masrag gayaycachäyargan: “¡Wañutsun! ¡Wañutsun! ¡Crucificay!”

Pilatonam tapurgan: “¿Acäsu gamcunapa reyniquicunatacu crucificar wañutsishag?”

Sacerdöticunapa mandagnincunananam contestayargan: “Nogacunapaga manam reynicuna canmantsu, Romachö emperador Cesarpita masga.”

<sup>16</sup> Tsaypitanam Pilatoga judiucunata entregaycuptin, Señor Jesucristota crucificag soldäducuna apayargan.

*Señor Jesucristota cruzman clävayan  
(Mateo 27:32-44; Marcos 15:21-32; Lucas 23:26-43)*

<sup>17</sup> Señor Jesucristotanam cruzta matancarcat-sir apayargan, “Calavera” niyanganman. (Tsay Calavera niyangan jircapam shutin cargan, hebreo parlaychöga “Golgota.”) <sup>18</sup> Tsayman chaycatsirnam Señor Jesucristota Roma soldäducuna cruzman clävayargan, Paywan pagta ishcag runacunatapis ishcanläninman. <sup>19</sup> Pilato juc letrérota cruzpa puntanman churatsinganchömi nirgan:

“NAZARET MARCAPITA JESÚSMI, ISRAEL RUNACUNAPA REYNIN” nir. <sup>20</sup> Maytsicag judiucunam tsay letrerota liiyargan, Señor Jesucristo crucificäyangán sitiuga tsay marcapita amänolla captin. Tsay letreroga gellgashga cargan, hebreochö, latincho y griegochömi. <sup>21</sup> Tsaymi sacerdöticunapa mandagnincuna Pilatota niyargan: “Ama gellgaytsu: ‘Judiucunapa reyninmi’ nirga. Mas bien gellgay: ‘Judiucunapa reynintucugmi’ ” nir.

<sup>22</sup> Pero Pilatonam contestargan: “Gellgangäga, tsaynö gellgashgallanam canga.”

<sup>23</sup> Señor Jesucristota cruzman clävasquirnam, llushtitsiyangan llatapanta chusun soldäducuna cada ünu raquipunacuyargan. Shucurangan tünicantapis achcusquirmi, janagpita urayag mana costürannag jucllaylla captin, <sup>24</sup> soldäducuna jucnin jucnin ninacuyargan: “Ama caytaga rachishuntsu, mas bien sortiyasquishun mä maygantsictash töcamäshun.”

Tsaynömi cumplirgan Diospa Palabran gellgashgachö ningan: “Quiquincuna puram llatapäta raquipunacur, tünicätapis sortiyayanga.” Tsaynömi cargan tsay soldäducuna rurayangan. <sup>25</sup>

<sup>25</sup> Señor Jesucristota crucificäyangánpa lädunchömi, mamanpis ñiañianwan caycäyargan. Paycunawanmi caycäyargan Cleofaspa warmin María y María Magdalénapis. <sup>26</sup> Señor Jesucristo mamanpa lädunchö pagtan tsay cuyangancag discípulun caycagta ricasquirnam, mamanta nírgan: “Mamay, tsaychömi wawayqui caycan.” <sup>27</sup> Tsaypitánam tsay cuyangancag discípuluntana

---

<sup>24</sup> 19:24 Sal 22:18.

nirgan: “Tsaychömi mamayqui caycan.” Tsaynö ningan junagpitam, tsay cuyangancag discípulun Señor Jesucristopa mamanta wajinman pushargan imayca mamantanö cuidananpag.

*Señor Jesucristo wañungan*  
(Mateo 27:45-56; Marcos 15:33-41; Lucas 23:44-49)

<sup>28</sup> Tsaypitanam Señor Jesucristoga llapan cumplishgana canganta musyar, Diospa Palabran gellgashga caycag cumplinanpag nirgan: “Yacunämi.”

<sup>29</sup> Tsaychömi juc järu junta alläpa puchgog vïno caycargan. Tsaymi isöpo niyanga jachapa räman gerupa puntanman träputa watarcur, tsay alläpa puchgog vïnoman tullpurcur, Señor Jesucristopa shiminman wititsiyargan. <sup>30</sup> Señor Jesucristonam tsay alläpa puchgog vïnota upyarcur nirgan: “Cananga llapantanam cumplirgö.” Tsaypitanam uraypa umpusquir wañusquirgan.

*Juc soldädu Señor Jesucristopa costillanta tuc-sirnin quichan*

<sup>31</sup> Waränin Pascua fiesta captinmi, judiucunaga munayargantsu wañushgacunapa cuerpun jamay sabado junagchö clävaraycar quëdayänanta. Tsay jamay sabado junagga alläpa respetashga junagmi cargan. Tsaymi Pilatoman aywaycur rugayargan cruzchö clävaraycag runacunapa chancancunata paquisquir, cruzpita ayancunata bâjatsir jipitsinanpag. <sup>32</sup> Tsaynam soldäducuna aywaycur, juccagläninchö runapa chacanta paquisquiyargan. Tsaynöllam Señor Jesucristopa juccagläninchö clävaraycag runapa chancantapis

paquisquiyargan. <sup>33</sup> Pero Señor Jesucristopa chancanta paquiyānanpag witiycurnam, wañushgana caycagta tantiyasquiyargan. Tsaynöpam paypa chancantaga paquiyargannatsu.

<sup>34</sup> Pero tsaynö wañushgana caycaptinpis, juc soldädum costillanta tucsir quichasquiptin, patsa yawarwan yacu yargamurgan. <sup>35</sup> Caycunata cuentacug runaga ricashga carmi, rasumpacaglla willacun. Payga musyanmi rasumpacaglla imayca testigüönö parlanganta, gamcunapis rasumpa criyiyänayquipag. <sup>36</sup> Caycuna llapanmi päşargan, Diospa Palabran gellgashga cumplinanpag ningan: “Manam ni maygan tullunllatapis paquiyangatsu.”<sup>37</sup> <sup>37</sup> Juclächönam Diospa Palabran gellgashgachö nirgan: “Ricäyangam, costillanpa päsat tucsishgata.”<sup>38</sup>

### *Señor Jesucristota pampayangan*

(Mateo 27:57-61; Marcos 15:42-47; Lucas 23:50-56)

<sup>38</sup> Tsaypitanam Arimatea marcapita José shutiyog runa Pilatoman aywarnin rugargan, Señor Jesucristopa ayanta pampananpag. Joséga Señor Jesucristopa gatiragninmi cargan, judiucunapa autoridäcunapita mantsacurnin pacayllapa. Pilato änisqueiptinmi, Señor Jesucristopa ayanta pampananpag José apargan.

<sup>39</sup> Tsaynöllam Nicodemopis juc pagas Señor Jesucristopag parlag aywanganpita, quimsa arröba perfüminwan shamurgan. Tsay perfümiga mirrawan aloe niyanganpitam rurashga

---

<sup>38</sup> **19:36** Ex 12:46; Nm 9:12; Sal 34:20. <sup>39</sup> **19:37** Zac 12:10.

cargan. <sup>40</sup> Tsaynömi Joséwan Nicodemo Señor Jesucristopa cuerpunta apaycur, tsay perfümita säbanasman pichurcurnin, judiucunapa costumbrincunamannö cuerpunta piturcur sepultüraman churayargan.

<sup>41</sup> Señor Jesucristota crucificäyangän lädun wertachömi, manarag ni pitapis churayanga juc mushog sepultüra rurashga cargan. <sup>42</sup> Tsaynö amänolla sepultüra captinmi, Señor Jesucristopa cuerpunta churayargan, waränin judiucunapa Pascua fiestan jamay sabado junag captin.

## 20

### *Señor Jesucristo cawamungan*

(*Mateo 28:1-10; Marcos 16:1-8; Lucas 24:1-12*)

<sup>1</sup> Semäna gallarinan domingo allegnam, María Magdalena tsaca tsacallana Señor Jesucristo pamparangan sepultüraman aywargan. Tsayman chaycurnam, sepultüra tsaparag rumi wititsishgata tarirgan. <sup>2</sup> Tsayta ricaycurmi Pedrotawan Señor Jesucristo cuyangancag discipulun caycäyanman cörrilla aywar nirgan: “¡Sepultürapitam Señor Jesucristopa ayanta apayashga y manam musyaytsu ni mayman churayanganpis!”

<sup>3</sup> Tsaynam Pedrowan Señor Jesucristo cuyangancag discipulun yargsquir, pamparangan sepultüraman aywayargan. <sup>4</sup> Ishcannam cörrilla aywayargan, pero juccag discipulunnam Pedropita mas cörrirnin puntata sepultüraman chargan. <sup>5</sup> Umpuycur gawarnam ricaycurgan, pituyangan säbanasllana jitaraycagta, pero

manam yaycurgantsu. <sup>6</sup> Gepanta Simón Pedro chaycurnam, ruri sepultürayag yaycusquir, piturangan säbanasllatana paypis ricaycurgan.

<sup>7</sup> Tsaynöllam Señor Jesucristopa umanta watäyangän télapis, jucläduchö shumag doblarcur churashga caycargan. <sup>8</sup> Tsaynam cörrilla puntata chagcag discipulunpis, sepultüraman yaycusquir llapan päsanganta ricaycur criyirgan.

<sup>9</sup> Pero manaragmi entendiyarganragtsu, puntapitana Diospa Palabranchoö wañunganpita cawamunanpag gellgashga cangantaga. <sup>10</sup> Tsaypitanam tsay ishcan discipuluncuna, wajincunapa cuticuyargan.

*Señor Jesucristo María Magdalenata yuripun  
(Marcos 16:9-11)*

<sup>11</sup> María Magdalenanam wacta sepultüra lädunchö wagarnin quëdargan. Tsaynö wagaycanganpitam, sepultüra rurinman umpuycur gawaycurnin, <sup>12</sup> yurag llatapashga ishcay angelcuna Señor Jesucristopa cuerpun cangancagchö jamaycäyagta ricaycurgan. Juccag angelmi Señor Jesucristopa uman cangancagchö caycargan y juccagnam chaquin cangancagchö. <sup>13</sup> Angelcunananam tapuyargan: “Warmi, ¿imanirtan waganqui?”

Paynam nirgan: “Señornítam suwar apayashga, manam musyätsu ni mayman churayangantapis.”

<sup>14</sup> Tsaynö nicarnam gepanman tumaycur, Señor Jesucristota ricaycurgan. Pero manam regergantsu ni pí cangantapis. <sup>15</sup> Señor Jesucristonam tapurgan: “Warmi, ¿imanirtan waganqui? ¿Pitatan ashinqui?”

Mariaga tsay wertachö täpacug runa canganta yarparmi nirgan: “Señor, si gam apashga carga, willaycallämay mayman churangayquitapis ashignin aywanäpag.”

**16** Tsaynam Señor Jesucristo nirgan: “María.”

Paynam tumaycur hebreo parlaychö nirgan: “¡Rabuni!” (Tsay ninanga “Maestru” ninanmi car-gan.)

**17** Señor Jesucristonam nirgan: “Dëjamay. Man-aragmi Taytäwan pagta cänäpag aywäragsu. Mas bien saslla aywar, waugécunata willay Taytäcagpa cuticunäpag caycanganta. Taytäga gamcunapapis Taytayquicunam y Diosniña gamcunapapis Dios-niñaquicunam.”

**18** Tsaynam María Magdalena saslla aywarnin, discipuluncunata cuentargan Señor Jesucristota ricanganta. Tsaynöllam cuentargan Señor Jesucristo waugencunapag ningantapis.

*Señor Jesucristo yurinpun discipuluncunata  
(Mateo 28:16-20; Marcos 16:14-18; Lucas 24:36-49)*

**19** Semäna gallanan domingo puntacag junag patsa goyaycaptinnam, Señor Jesu-cristopa discipuluncuna wajipa puncunta wichgapucuycurlla goricäyargan, judiucunapita mantsacurnin. Señor Jesucristonam yaycusquir, puntancunaman ichiycur saludacurgan: “¡Gamcunachö alli päcacuy catsun!”

**20** Tsaynö nisquirnam, maquintawan costil-lan tucsiyangantapis discipuluncunata ricätsirgan.

Paycunananam alläpa cushicuyargan Señor Jesucristota ricaycurnin. <sup>21</sup> Tsaypitanam Señor Jesucristo yapay nirgan: “¡Gmcunachö alli päsacuy catsun! Tayta Dios nogata cachamangannöllam gamcunatapis cachayag, Paypa Alli Willacuyninta willacuyänayquipag.”

<sup>22</sup> Tsaynö nisquirnam discipuluncunaman pücaycur nirgan: “Espíritu Santota chasquiyyay. <sup>23</sup> Si gamcuna pitatapis perdonayaptiquiga, perdonashgam cayanga. Pero mana perdonayaptiquiga, manam perdonashgatsu quëdayanga.”

*Discipulun Tomas Señor Jesucristo cawamushgata rican*

<sup>24</sup> Señor Jesucristo discipuluncunata yuripungan öraga, manam tsaychötsu cargan Millishu niyangan juccag discipulun Tomasga. <sup>25</sup> Tsaynam waquincag discipuluncuna niyargan: “Señornintsictam ricäyargö.”

Pero Tomasnam contestargan: “Si maquinchö clävos uchcungan eridata ricarnin dëdöta mana jatirga y costillanchö tucsinganta mana yatarga, manam criyitsu rasumpa cawamunganta.”

<sup>26</sup> Tsaypita juc semänatana discipuluncuna yapay juc wajichö goricäyanganchönam, Tomaspis paycunawan caycargan. Puncta alli wichgapucushga caycäyaptinmi, Señor Jesucristo yapay yaycusquir llapanpa puntancunaman ichisquir saludacurnin nirgan: “¡Gmcunachö alli päsacuy catsun!”

<sup>27</sup> Tsaypitanam Tomasta nirgan: “Cayman dëduyquita jatirnin maquïta ricay. Maquiquita apamuy cay costilläta tucsiyämungan eridäman

jatinayquipag. Ama mana criyicugga caytsu. ¡Criyimay cawamungäta!"

<sup>28</sup> Tsaynam Tomas cushicuynintinwan mantsacar nirgan: "¡Señornillä y Diosnillä!"

<sup>29</sup> Señor Jesucristonam nirgan: "¿Cawamungäta criyinqui rasumpa ricämangayquipitacu? ¡Alläpa cushishga cayätsun, mana ricaycämar criyicugcuna!"

### *Imapag cay libru gellgashga cangan*

<sup>30</sup> Señor Jesucristoga mas atsca juc milagrucunatam rurargan, discípuluncunapa puntanchö. Tsaycunaga manam llapantsu cay libruchö gellgashga caycan. <sup>31</sup> Pero caycunam siga gellgashga caycan, gamcuna rasumpa criiyänayquipag Señor Jesucristoga Dios Yayapa Tsurin cay patsaman shamushga Salvador canganta. Payman rasumpa firmi criyicurnin, gloriachö mana ushacag cawayta tariyänayquipag.

## 21

### *Señor Jesucristo yuripun, ganchis discípuluncunata*

<sup>1</sup> Tsaypitanam Señor Jesucristo yapay discípuluncunata yuripurgan, Galileachö Tiberias gocha cuchunchö. Caynömi tsaycuna llapan päsargan: <sup>2</sup> Simón Pedrowan pagtam Millishu niyangan Tomas y Natanael caycäyargan. Tsay Natanaelga Galilea provinciachö Cana niyangan marcapitam cargan. Zebedeopa ishcan tsurincuna Santagiowan Juan, ishcag mas discípulumajincunapis. <sup>3</sup> Simón Pedronam

paycunata nirgan: “Pescädota achcugmi aywaycä.”

Waquincagcunanam contestayargan: “Nogacu-napis gamwan pagtam aywayä.”

Tsaynö nirmi büquiman lätarcur llapan aywayargan. Pero tsay pagasga manam ni juc pescädollatapis achcuyargantsu.<sup>4</sup> Patsa waraycämuptinnam Señor Jesucristota gocha cuchunchö yuricasquirgan. Pero discipuluncunaga manam musyayargantsu Señor Jesucristo cangantaga.<sup>5</sup> Señor Jesucristonam paycunata tapurgan: “¡Amögocuna! ¿Manacu ni juc pescädollatapis achcuyanqui?”

Paycunananam contestayargan: “Manam.”

<sup>6</sup> Señor Jesucristonam nirgan: “Büquipa derëchucag lädunman mällayquicunata jitayay, pescädocunata achcuyänayquipag.”

Tsay ningannölla mällancunata jitaycurmi, yacupita mällatapis sutayta puediyargantsu maytsica pescädota captin.<sup>7</sup> Tsaynam Señor Jesucristo cuyangancag discipulun Pedrota nirgan: “¡Tagaya Señornintsicmi!”

Tsayta wiyaycurnam Pedroga llustingan llatapanta sas shucucurcur, büquipita yacuman saltarpurgan.<sup>8</sup> Waquincag discipulucunanam mälla junta maytsica pescädota büquiwan garacharcurnin aywar pläyaman chäyargan. Gocha rurinchö caycäyanganpitaga amänollanam cargan, gocha cuchunman chäyänanpag. Juc pachac (100) metrunöllanam faltargan.<sup>9</sup> Gocha cuchunman chaycurnam patsaman bajesquir, nina tsaritsishga shansha jananchö pescädo caycagtawan tanta churaraycagta tariyargan.<sup>10</sup> Señor Jesucristonam

nirgan: “Apayämuy juc ishcay pescädo tsayrag jipiyämungayquita.”

<sup>11</sup> Tsaynam Simón Pedro büquiman lätarcur mälla junta jatusag pescädocunata gocha cuchunman garachämurgan. Tsay mällachöga juc pachac pitsga chunca quimsa (153) jatusag pescädocunam cargan. Maytsica jatusag pescädo caycaptinpis mällancunaga manam rachirgantsu.

<sup>12</sup> Señor Jesucristonam nirgan: “Shayämuy micuyänayquipag.”

Manam ni maygan discipulunpis ni pi cangatapis tapuynintaga valorargantsu. Paycunaga musyayargannam Señor Jesucristo rasumpa canganta.

<sup>13</sup> Tsaypitam Señor Jesucristo witiyurnin tantata maquinwan aptarcur, discipuluncunata aypurgan. Tsaynöllam pescädotapis rurargan.

<sup>14</sup> Tsay gocha cuchunchö tincuyanganwanga, cawamunganpita quimsa cutinam discipuluncunata Señor Jesucristo yuripurgan.

### *Señor Jesucristo parlan Simón Pedrowan*

<sup>15</sup> Micur ushasquiyaptinnam, Señor Jesucristo Simón Pedrota tapurgan: “Juanpa tsurin Simón, ¿caycunapita mascu cuyamanqui?”

Pedronam contestargan: “Aumi. Señor, musyanquim noga cuyangagta.”

Señor Jesucristonam nirgan: “Tsaypunga mallwacag ushäcunata mitsignö nogaman criyicamugcunata shumag cuidanqui.”

<sup>16</sup> Tsaynam yapay tapurgan: “Juanpa tsurin Simón, ¿cuyamanquicu?”

Pedronam contestargan: “Aumi. Señor, gam musyanquim cuyangagta.”

Señor Jesucristonam nirgan: “Tsaypunga ushäcunata mitsignö nogaman criyicamugcunata shumag cuidanqui.”

<sup>17</sup> Señor Jesucristonam yapay quimsa cutina tapurgan: “Juanpa tsurin Simón, ¿cuyamanquicu?”

Pedronam llaquishga quimsa cutina “¿cuyamanquicu?” nir, tupuptin contestargan: “Señor, gamga imaycatam musyanqui. Tsaynöllam musyanqui gamta alläpa cuyangagta.”

Señor Jesucristonam nirgan: “Tsaypunga üsha mitsicug üshancunata shumag cuidanganno nogaman criyicamugcunata shumag cuidar catsinqui. <sup>18</sup> Rasuncagtam nig: Jövenllarag carga, quiquipayquim munangayquinö llatapayquita shucucurgayqui maypapis munangayquipa aywanayquipag. Pero auquinyasquiptiquim sığa, ricrayquita quichasquiptiqui juccunaraq shucutsiyäshunqui. Tsaynöllam mana aywayta munangayquicunapam apayäshunquipis.”

<sup>19</sup> Tsaynömi Señor Jesucristo entenditsirgan Pedro imanö wañunanpag canganta, Dios Yayapa poderninta wañuyninwan ricätsicur. Tsaypitanam nirgan: “¡Gatimay!”

### *Señor Jesucristo alläpa cuyangancag discípulun*

<sup>20</sup> Pedro gepaman tumaycurnam, Señor Jesucristota cuyangancag discípulun shamuycagta ricargan. Tsaycag discípulunmi Señor Jesucristo manarag wañur meriendayangan öra, jinchi witiycur tapurgan: “Señor, ¿maygantan traicionarniqui ranticushunqui?” <sup>21</sup> Pedro discípulumajinta ricasquirnam Señor Jesucristota tapurgan: “Señor, paytaga ¿imatan päsanga?”

**22** Señor Jesucristonam contestargan: “Si noga cutimungäyag cawananta munaptipis, gamtaga ¿imatan gocushunqui? Gamga gatimaylla.”

**23** Tsaynö niptinmi, waquincag discipulumajincuna yarpäyargan tsay cuyangancag discipulunga imaypis manana wañunapag canganta. Pero Señor Jesucristoga manam ni imaypis manam wañungatsu nirgantsu. Payga caynöllam nirgan: “Si noga cutimungäyag cawananta munaptipis, gamtaga ¿imatan gocushunqui?”

**24** Tsay Señor Jesucristo cuyangancag discipulunmi, caycuna llapan imaycata ricashga car, rasumpa gellgashga. Tsaynöpam musyantsic llapan gellgangancuna rasumpacag canganta.

**25** Señor Jesucristoga maytsica mas milagrucunatam rurashga. Si juc jucpa gellgayaptinga, manam entëru mundupis pagtambantsu cargan, gellgayangan llapan librucunapagga. Tsaynö cay-cullätsun. Amen.

**Señor Jesucristo pa alli willacuyñin  
New Testament in Quechua, Northern Conchucos  
Ancash (PE:qxn:Quechua, Northern Conchucos  
Ancash)**

copyright © 2002 Wycliffe Bible Translators, Inc.

Language: Quechua, Northern Conchucos Ancash

Translation by: Wycliffe Bible Translators, Inc.

Quechua, Northern Conchucos Ancash

qxn

Peru

**Copyright Information**

© 2002, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Quechua, Northern Conchucos Ancash

**© 2002, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.  
Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
77fb173-382c-5cf8-8fc5-0731e0bb3f52